

Luka

Lukau au haoka Teovilasiho hisaliale

1 ¹Teovilasi, di haoka, ata moagaeau hoveve Iesu no vigomo vaveve dua vale ke hisalialu. ²Subuta Iesu esemuiau ata degomolehi Iesu vaveve elehai ata kebia namigevege abu ke hisalialu. ³Ige data isiviale deiada ko hisaliai aho hanavoi. Au ivi balugate. Katealemo di Iesu deiadae umuka ke bahata neniai kaovai hisaliai aho hanavoma. ⁴Iale au ko dodavei bae ihuve bahata ata degomoleau a haivuale ke bahata hilokanela.

Ata babatisogevemale Dioni keu uveve deiada

⁵Vani mole subuta Elodi keu Diudia vata kemo kosive baluga holisege Diue dubu nalimale ata mole Sekalaia keu ua. Abaisa keu subuta Diue dubu nalimale ata baluga. Ige Sekalaia keu lovive ivi vanu. Mahinave ivilike Elisabeti. Keate ke valadae ivilike Eloni. ⁶Malaha keu abu mahinati Dilava nimo inutolotoloai uime Kosive menaka ke bahata evisi valu. ⁷Isito keateve keu esesia. Ilage abu abu ebia holilu.

⁸Vani mole Sekalaiau dubue loviveve vaniu lohoge au tiale dubue Dilava hoesehavoma. ⁹Diue dubu nalimale atae vaveve keu koseanu. Vani igaegae abuna ata igae ebagevage kena deholo hagote mai tiniege dubue uvue batabata golomo ehosivai mahogei. Abu vani kela Sekalaia ebagevage au Kosive dubue uvue tinu. ¹⁰Tialeu dubue uvue deholo hagote mahosege ata moagaeau heie guligulilahama. ¹¹Guligulilahasege anelu moleu Sekalaiae lohoale deholo mahomale batabatae ada inuteveatae laminu. ¹²Ige Sekalaiau ke elehai vabuage uvuveu kibikibiai ua. ¹³Ige anelu keu namihai loui avoe, “Sekalaia, vabu halenela. Dilavau a imiliale ke eviale a mahinana bae ese mai. Ese keu uge ivihai loui kosea, ‘Dioni.’” ¹⁴Vani kela lana bae vahaehoave. Ese keu uge ata moagaebuna bae vahaeholawai. ¹⁵Kosealemo kena bae Dilava nimo kosive baluga holisi. Au bae e toela bahata ke ilivebene. Au uale vani kela Munana Tumutena bae uvuvemo holomage auna negoai. ¹⁶Kena bae Iselala ata moaga malevege abuna tota abu Kosive Dilava ehovai tai. ¹⁷Kena beloveta

Ilaidia vaveve ke nahate vai negoai vuvuneai. Ige hotove kemo eseabuna abu mamuvuhi tota bevuai igaetoai. Kena bae hoto eviholimale ata kebia haivege abuna bae lulele ata holisi vaveve inutolotolote vai. Auna vasohuta tai ata haivege abuna abu vaveve hoesegevege Kosivena lohoi.”

¹⁸ Ige Sekalaiau anelu ke namihai loui avoe, “Kateige dana oleve kateai. Dau koli holige di mahinata mabata holinu.” ¹⁹ Ige anelu keu loui avoe, “Dau di ivilike Geibiliolo. Dau Dilava vudimo umale Dilavau di namihaikavege di hotoe dua ko loui a namihama. ²⁰ Vani mole di hoto louale kena bae velemai. Isito a di hoto eviholinu. Katealemo a bae hotoalivebene. Ana bae uvute nahate valive di louale vani keu lohoge bae hotoanela.”

²¹ Sekalaiau dubue uvue usege ataeau heie hemei uma. Isi loui avoe, “E, Sekalaia keu tiale dubue uvue osioime solekai lohoholinu.” ²² Kateai lousege Sekalaiau heie lohoniale abuhi hotoholige abu huhuige keu dubue uvue tiale vaveve nimotele elehanu. Katealemoike au uvute holisime ada unahata deiada loui haivema.

²³ Iniale Sekalaia dubue loviu uoholige au halei oe tinu. ²⁴ Vani degomoleau uoholisege mahinaveu tobuaima oai tiholisito bata ada mole ke uvumo o unahamo ua. ²⁵ Isi loui avoe, “Vagana moaga di eseholiale kemo Dilavau di tedahonu. Iale ataeau di elehage di eseholiale mati kena uoholisi.”

Iesu uveve deiada

²⁶ Ke iae bata igae uoholisege Dilavau anelu nehe Geibiliolo hanavoge keu Galili vatae tialeu o mole Nasaletae velemanu. ²⁷ O keve velemae ma mole Meli keu ua. Ma ke abu Diosebaho kokovalu. Dioseba keu Deividi valadamo lohonu. ²⁸ Ige anelu keu lohoale avuho loui avoe, “Ana duave. Kosiveu aiti ui a hoesehavoge au nivemo duave.” ²⁹ Kateige Meliu hoto ke evisi vikobaluganu. Isi huhuai avoe, “Hoto oleteike ko.” ³⁰ Ige anelu keu avuho loui avoe, “Vabu hale. Dilavau a eahalenu. ³¹ Ialemo ana bae eseane. Ese keu uge ivihai loui kosea, ‘Iesu.’ ³² Kena uniege kosi baluga holige Dilava ehue umale kena bae loui kosea, ‘Keu di moike.’ Dilavana ebagemage auna vatae kosive holisi au haoka Deividu ugulamomale telonamo ugulamoi. ³³ Iale auna bae vani baita Diekobo valada kebia nalievegei. Isi kateige vuvuneve bae ata kebiamo uoholilivebene.”

³⁴ Aneluu hoto kateale louge Meliu namihai loui avoe, “Dau koliaholinu. Iale dana oleve kateai eseai.” ³⁵ Ige aneluu avuho loui avoe, “Munana Tumutena aemo dobai lohoge Dilava vuvune kena a bamuge ana ese ke manela. Katealemo Dilavana au mo ke ivihai kosea, ‘Di mo tumuteike.’ ³⁶ Ana a neina mole Elisabeti ke hilokanu. Ataeau loui avoe, ‘Keu eseholisito mabata holisi ua.’ Hoto kateale louito keu tobuta uale aike bata ada mole isi igae uoholinu. ³⁷ Dolodolo halenela. Dilava kemo onobeu bae anekialivebene.”

³⁸Kateige Meliu loui avoe, “Dau Kosive esemu daliko. A hoto bahata louale kena daemo lohoge keu duave.” Kateai louge aneluu halei tinu.

Meliu Elisabetie dei ai tinu.

³⁹Vani kemo Meliu solekai au kunai bevuai malei tanae o moleve Diudia vatae tinu. ⁴⁰Isime Sekalaia oe tiale mahinave Elisabeti namihai loui avoe, “Ana duave.” ⁴¹Ige Elisabetiu hoto ke evige unive uvue eseveu kibianu. Ige Dilava Munanae Tumuu avuemo lohoaleu mai vuvunetinu. ⁴²Ige Elisabetiu tovuai avuho loui avoe, “Dilavau a ebagemage a keate bahatae vigomo keate baluga. Iale ese kena uge Dilavana ebagemai hoesehavoi. ⁴³A keu di Kosive neina. Iale a dae dei ai lohoale kou duave baa. ⁴⁴Di a hoto louale ke evisege di ese unita uale keu kibiai vahaehoanu. ⁴⁵Iale vahaeho baluga. A hilokage Dilavau aho hoto louale kena seleve holisi.”

Meliu vahaehoale dei ada

⁴⁶Kateige Meliu avoe,

“Di di uvumo vahaehoai di Kosive hoesehavoma.

⁴⁷Dilavau di tedahomale kemo di vahaeho baluganu.

⁴⁸Dau Dilava nimo iviholinu.

Isito keu di huhuanu.

Nova komo ata bahataebuna loui kosea,

‘Dilavau keate ke hoesehavonu.’

⁴⁹Kosealemo Kosive ivi balugate keu dahoe vaveve baluga vanu.

Ivive keu tumute.

⁵⁰Katealemo oleuoleu Dilava vabuhavoge uvuvena abuemo ui.

Ige auna vani bahata kebiata eseabeta tedaevegei.

⁵¹Ige adave keu vaveve negote vanu.

Isime auna oleuoleu abu ebika tabagevaho huhuimale kebia huhuihuhui bahata malei evihai.

⁵²Keu vatae kosive baluga kebia tatolemagevenu.

Isito au ata uvevete kebia tabagevenu.

⁵³Keu lovie dua ata vaete kebia ovege uniabeu hanilahalu.

Isito ata kunaite kebia iovege abu ada unahala tilu.

⁵⁴Dilavau au ata Iselala tedaevenu.

Au kebia haleveholisito kebiaho uvuale kemo au tedaevenu.

⁵⁵Kosealemo Dilavau subuta nahie buluveho lounu.

Isi Ebalahamuho loui avoe,

‘A valada isi a ese kebia dana vani bahata huhuevei hoesegevegei.’ ”

⁵⁶Meliu hoto kateale louime Elisabeti oe uale bata abuita igaetaeau uoholisege au halei au oe tinu.

Dioni uale deiada

⁵⁷Vani mole Elisabeti eseu uveve vaniu lohoge moveu ua. ⁵⁸Moveu uge valadaeabeau isi haokuvuiabeau ke evisi vahaeho balugalu. Abu hilokage Dilavaike keate ke huhuaima ese ke mai ominu.

⁵⁹Bula igaau uoholige haokuvuiabeau lohoale mo ke hoesehavoi vudive vate etulei isiviale ataeau kemo hilokage keu Ebalahamu valadae ese. Kebia vaveveu kateanu. Vateve etulege uoholige abu isiviai mamave Sekalaia ivita ivihai. ⁶⁰Isito neinaveu loui avoe, “Kate halevave. Iviveike Dioni.” ⁶¹Kateai louge abu keate keho loui avoe, “Au a valada kemo ivi katealebeu uoholinu.” ⁶²Isi kateaima abu ada unahata deiada mamave haivuma. Isiviale mamaveu ivi oleteale mo ke ivihai. ⁶³Kateige au adamo beba mai omiveve tovetove vanu. Ige abu beba mai omige au hisaliai avoe, “Iviveike Dioni.” Kateige abu ke elehai viko balugalu. ⁶⁴Kateisege solekavesite Dilavau Sekalaia ai alavoge au hotoai Dilava hoesehavonu. ⁶⁵Ige haokuvuiabeau ke elehai vabu balugalu. Ige ataeau Diudia tanae uale keau bahata hoto ke evilu. ⁶⁶Ige ata bahataeau ke evisi huhulahai avoe, “Ese kena bae vadeai.” Isime abu hilokage Kosive adae vuvuneu ese kemo ua.

Sekalaiau au mo Dioni vaveve lounu.

⁶⁷Dioni mama Sekalaia keu Dilava hoesehavosege Munana Tumuteu uvuvemo holomage au gabie velemaeve hoto lounu. ⁶⁸Isi loui avoe, “Nahi nahie Kosive hoesehavoi.

Keu Iselala ata nahie lohoale isiviai nahie vatetumumo nahie tetaevei malevei.

⁶⁹Kosealemo keu nova au esemu Deividi valadamo nahie toelamo nahie maleveveve ata negote ebagemanu.

⁷⁰Subuta mole Dilavau hoto kateale loui au beloveta tumute kebia namigevenu.

⁷¹Au louale auna nahie aiogevemale ata kebia isi nahiho itumulahamale ata kebia adamo nahie tetaevei.

⁷²Au subuta nahie buluvehu loui mamoa ke auna huhuai nahiho uvuai nahie tetaevei.

⁷³Ke nahate au subuta nahie buluve Ebalahamu keho hoto tumute lounu.

⁷⁴Au hoto tumute louale kemo auna nahie aiogevemale kebia adamo nahie tetaevei.

Auna nahie tetaevege nahiabuna vabuholisito lovive vai.

⁷⁵Isime ata tumute holisi vani bahata Kosive nimo vaveve inutolotolote vagei.

Dilavau hoto loualeu kemo kateai ua.

76 Iale di mo, ataeabuna ahoe loui kosea,
‘Dilavau ehue umale ke beloveta alike.’

Iale ana vasohuta tai Kosive humaha elulumasege auna bae lohoi.

77 Ana bae Kosiveu toelamo au ata maleveve hoto louge abuna bae abu
vaveve toela halevege Dilavana kebia toela ulihai.

78 Kosealemo nahie Dilava keu uvue Dilava.

Keu nahiho uvuai nahie tedaevema.

Iale vau alamoale ke nahate Kosive atagana nahiemu halui.

79 Nahiemu haluge oleuoleu vavie vaveve vamale kemo haluviho
vasege Kosivena kebia holoevege abuna uveve duae humahala tai.”

Sekalaia hotou kemo kateai ua. 80 Igeto moveu balugai kosi holisege
uvuveu negoige au o halei botoe tialeu ataeau uvesite keve ua. Keve
uniale vani moleu lohoge au lohoaleu Iselala ata haivenu.

Iesu uale deiada

(Matiu 1.18-25)

2 1Dioni uale vani keve Loma kosive baluga Ogasita keu menaka
mole mamoi isiviale ata bahataeau gamanie buka baluga kemo abu
ivi otovei. 2Ogasita keu menaka ke mamosege Kuliniasi keu Silia vata
ke kosive. 3Menaka keu loui avoe, “Ata bahataeabuna abu vavivue oe
hoidevei talive abu ivi otovei.” 4Menaka keu kateige Nasaleta malaha
mole ivi Dioseba keu Galili vata halei lohoale Diudia vatae velemanu.
Vata keve valadave Deividi ke ou ua. O ke ivilike Betelihamu. 5Iale
Diosebau abu keate kokovale keti tiale o keve velehovolu. Tiale keau
au ivita Meli ivita buka balugamo otovelu. 6Keate keu tobuta tiale
Betelihamue usege eseveu uveve vaniu lohonu. 7Ige ladeveve ou uoholige
abu tiale ovoi oe usege move ovokinaveu ua. Ige au ogo mai viliai mai
ovoeau lovi imale batabata ke golomo lahoenu.

Anelu isi mamoe nalimale ata

8Vavi kemo ata degomoleau ovo nalimale keau o ke vavae abu mamoe
nibievema. 9Isege Dilava anelu moleu abue lohoge Kosive atagau abuemu
halunu. Ige abu vabu balugatahoalu. 10Isito anelu keu namigevei loui
avoe, “Vabu halevave. Di hotoe duaie mai laheho lohonu. Iale ata
bahataeabuna hoto ke evisi vahaeho balugai. 11Hotoe dua keu koseanu.
La toelamo la tedaevave ata, keu nova Betelihamue ua. Keu la Kosive
baluga Keliso. 12Iale lana oleve kateai di louale ke hilokai. Talive abu
ogota ese ke viliai mai batabatae golomo lahoeale ke elehave.”

13Hoto keu uoholisege solekavesite anelu moagaeau otogo halevai
loholiale anelu keti nogoli loui Dilava hoesehavoma. 14Abu loui
avoe, “Nahi otogoe Dilava ivi balugate ke hoesehavoi ivive ebagevai.
Kosealemo auna vata komo uveve dua au isivie ata kebia ovi.”

¹⁵ Aneluiiau kateai louito halevai ehue tilu. Isege mamoe nalimale keau moleho loui avoe, “Bato lohoge nahi Betelihamue talive Kosive esemuu louale vaveve ke elehai.” ¹⁶ Kateai louito halevai bibuluvisi tilialeau Meliu Diosebati uale ke kaovalu. Isi tialeau elehasege ese neheu iene batabata golomo lahai ua. ¹⁷ Ige mamoe nalimale ata keau lohoale ese ke elehai anelue hoto ke loui ata namigevelu. ¹⁸ Ige ata bahata keau mamoe nalimale hotoe deiada ke evisi vikolahalu. ¹⁹ Isito Meliu tobekai ui hoto ke gaeahavoi ke huhuima. ²⁰ Ige mamoe nalimale keau hoidevei abu oe tiale keau nogoli loui Dilava hoesehavoma. Kosealemo abu anelu louale ke evisi ke bahata elehalu.

Abu Iesu ivihalu.

²¹ Bula igae uoholige abu vudive vate etuleveve vaniu lohoge abu ivihai loui avoe, “Iesu.” Kosealemo neinaveu tobulohisege aneluu ivive kateale mamonu.

Abu Iesu mai dubue tilu.

²² Vani moleu lohoge Diosebau abu keateti Dielusalemale tilu. Abu isiviale Mosese menakau louale ke vai abu ebika hoesegeveime ese mai Kosive nimo mavoi isiviale au Kosive ata tumute holisi. ²³ Kosive menakamo keu loui avoe, “Oleme ese ovokinau uge abu mai Kosive omige au Kosive ata tumute holisi.” ²⁴ Vaveve kateale valiho valiege vasohuta abuna mesoho imutava abuita mesoho kelea abuita malei dubue mahoi abu ebika hoesegevege valive Kosiveu hoesegevei eseabeta hoesehavoi. Kosive menaka keu kateai lounu. ²⁵ Vani kela malaha mole Dielusalemale uale iviveike Simioni. Malaha keu malahae dua. Dilava vabuhavomale malaha. Keu vani baita Iselala tedaeveve ata ke hemei uma. Ige Munana Tumuteu avuemo ua. ²⁶ Isime namihai loui avoe, “Ana uniege Dilavau Iselala ata tedaeveve Keliso ke hanavoge elehaito bae hatinela.” ²⁷ Katealemo Munana Tumuteu Simioni melamege au Diue dubu balugae tinu. Isege Diosebau Meliti abuta Iesu mai dubue menaka neheu louale ke nahate valiho loholu. ²⁸ Ige Simioniu Iesu mai evudei Dilava hoesehavonu. ²⁹ Au imihai loui avoe,

“Di Kosive, dau a esemu.

A di namihale ke nahate di a ese ko elehanu.

Iale dana nova bae uvue duamo hatai.

³⁰ Di di nitela Iselala tedaeveve ata ko elehanu.

³¹ A ata ko hanavoge lohoale ata bahatae abuna elehai.

³² A hanavoge lohoale kou atagae ata.

Iale atagavena vatae ataemo atagage abuna humahave elehai.

Isi Iselala ata kebiatamo atagage abuna vuvune baluga malei.”

³³ Simioniu hoto kateale louge ese ke mamau neinaveti ke evisi viko balugalu. ³⁴ Ige Simioniu hoesegevei neinaveho loui avoe, “Dilavau ese ko

ebagemage Iselala ata degomole abuna hotove evige auna hoesegevei. Isito Iselala ata degomole abuna hotove eviholige auna aiogevei. Keu Dilava vaveveike. Iale ataeabuna itumuai bae avuho lougei. ³⁵Ige Dilavana bae uvuiabeta huhuihuhuiabe keta hilokai. Iale Meli nohoma. Vaveve toela katealeu lohohoi a uvu ke bige kibikibiage ana bae ke huhuai uvuige.”

³⁶Simioniu hoto kateale loualeu gabiho vasege belovetae keate mole Ana keu lohonu. Ige Mamave ivilike Banuelo. Keu Asa valadamo lohonu. Keate keu koliale abu koliati uale vagana ada mole isi abuitaeau uoholisege koliaveu hatinu. ³⁷Isege au gobu holisi ualeu vagana eiti voa (84) uoholinu. Keu mabata seleve. Iale keu vani baita dubu haleholima. Isito vanimo vavimo auna dubue uvue ui Dilava hoesehavoge. Iniege vani mole guliguliho vaniege au bae lovi ilivebene. Isito auna guliguli unahagei. ³⁸Iale keate nehe keu ese ke elehaime Dilava hoesehavonu. Isime Dielusalemae ata namigevei avoe, “Nahie tedaevei nahie maleveve ataike ko.” ³⁹Kateai louge Dilava menakau louale ke nahate abu bahata vage uoholige Diosebau abu mahinati halevai hoidevei Galili vatae tiale abu o seleve Nasaletae ua. ⁴⁰Keve velehovoi usege Iesuu ihunivesite lamisi au ebia holisi negoanu. Ige luleleveu avuemo balugage Dilavau hoesehavoi avuti ua.

Iesuu mohohota dubue tinu.

⁴¹Vagana bahata Iesu mamana neinaveti Dielusalemae Basovae lovi iliho tigei. ⁴²Kateimalela Iesu vaganau tueloisege (12) abu halevai lovi ke iliho Dielusalemae tilu. ⁴³Ke ige uoholige mamaveu neinaveti hoidevei oe tisege Iesuu Dielusalemae ua. Isito mamaveu neinaveti ke hilokaholilu. ⁴⁴Ige abu elehaholisime huhuai loui avoe, “Au elemo mesoho ata ko moaga uvue lohoma.” Isi kateai vani kemo halevai tilu. Tiale keau gutumoike abu bae humaha tavae haokuvuiabe belagevelu. ⁴⁵Belagevege Iesu uoholige abu hoidevei Dielusalemae tota kaovaho tilu. ⁴⁶Kaovalage vani abuita igaeta uoholige abu Diue dubu baluga uvue tiale elehage au Iselala ata haivemale baluga kebia vigomo ugulamoi ui hotoeabe evisi belagevema. ⁴⁷Ige keau namihage au hotoeabe haliko kemo baita luleleage ataeau ke evisi vikolahalu. ⁴⁸Kateisege mamaveu neinaveti ke elehai tetelahalu. Ige neinaveu namihai avoe, “Di mo, a vadeulike ko noemo vama. Ige no a mamati a huhuai aho uvulahai a kaovama.” ⁴⁹Ige Iesuu namigevei loui avoe, “La vadeuhoike di kaovama. Lana hilokaholilu. Dau di Mamae oe uvue ui lovive vale keu duave.” ⁵⁰Isito au abuhu louale ke keau ke hilokaholilu.

⁵¹Ige Iesu abuhi hoilahai tota Nasaletae tinu. Tialeu hotoeabe evisi abu louale ke vama. Ige neinaveu vaveveve kateimale au uvumo huhuima. ⁵²Ilage Dilavau elehage ataeau abuta elehage Iesuu kosi holige vaveveveu negoige luleleu avuemo baluganu.

Ata babatisogevemale Dioniu loviamale deiada
(Matiu 3.1-12; Maka 1.1-8; Dioni 1.19-28)

3 ¹Vani moleu lohoge Loma kosive baluga Taibeliosi keu vagana vivtini (15) ke uvumo vatae kosive baluga holinu. Isege Botiasi Bailoti keu Diudia vatae kosive holinu. Isege Elodi keu Galili vatae kosive. Isege hohove Bilibi keu Itulia isi Talekonaita vata kebia nibievema. Isege Lisaniasi keu Abilini vata ke kosive. ²Isege vani kemo dubu nalimale kosive abuitaeau ua. Iviabeike Anasi isi Kaiabasi. Kosive katealeau usege vani kemo Dilavau Sekalaia mo Dioni botoe umale ke namihanu. ³Ke namihage au tialeu e mole Diodani ke vavae matama igaeagela ata haivei loui avoe, “La vaveve toela ke halevai hoidevei babatisolahave. Ige Dilavana la vaveve toela ke ulihage auna uoholisi.” ⁴Iale Dioni vaveve keike beloveta mole Aisaiau subuta loui hisaliai avoe,

“Ata molena bae ataeau uvesiteve hoai kosea,

‘Kosiveho humaha ke inuta loive.

Isi au tiveve humaha ke inuta vave.

⁵Loho ke omisi vealuvive.

Isi hevaha ke lovoi omisi hevaluvive.

Isi ke hoesehavege au inutolotoloi.

Humahau keukakeukage ke inutolotolohavove.

Isi humahae toela keta hoesehavove.

⁶Katealemo ata bahataeabuna Dilavau toelamo ata maleveveve ke elehai.’ ”

⁷Ata moagaeau Dionie lohoi isiviale au babatisogevei. Isito Dioniu namigevei avoe, “La keau ute nahatea. Laeau isiviholilu Dilava itumuu lae loholiho. Isito la hoidevei Dilava ehovaholilu. Katealemoike Dilava itumuu laemo lohoma. ⁸Iale vasohuta la vaveve toela halevai vaveve dua vave. Isi kemo bae babatisolahave. Isi lainaho huhulahai kosea, ‘Noeau Ebalahamu valada noeabuliko. Iale Dilava itumu keu bae noemo loholivebene.’ Di la namigevege evive. Dilavana isivianiege mune kobiamo Ebalahamu valada degomole vaevege abuna la lovomo ui. ⁹Soeu idie umukamo heiliho hemei ua. Iale idi oletena baioholige auna idi ke heisi mai venemo mihatuge auna lahai.”

¹⁰Kateai louge ataeau loui avoe, “Iale noeabuna vadeai.” ¹¹Ige Dioniu namigevei avoe, “La oleuoleu ogo abuiabuialiege mole mai ogoholiale ke omive. Isime la oleu lovi balugau avuemo uge degomole malei lovioholiale kebia oveve.” ¹²Kateige takesi moni malemale ataeau Dioniu babatisogeveho avue loholu. Isi namihai avoe, “No haivemale ata, noeabuna vadeai.” ¹³Ige au loui avoe, “Lainaho vavolo nahate valive. Gamaniu takesi loumale moni ke unaha maleve.” ¹⁴Kateige tuvalie ataeau Dioni namihai loui avoe, “Isege noeabuna vadeai.” Ige keu loui avoe,

“Lainaho bae ata havei moniabe malelive. Isi lainaho ata molemo loboe hoto loui moniabe malelive. Lainaho la ibina ke elehai kabebilahalive.”

¹⁵ Kateige vani kemo ata bahataeau Dioni hoto maimelou avoe, “Mesoho ata kou nahie ata tediaeveve Kelisoike ko.” Kateai louime ke kaovai molehi hotohotolahama. ¹⁶ Ige Dioniu kebia bahata namigevei loui avoe, “Dana emo la babatisogevei. Isito ata mole baluga di evihale keu aike lohoma. Di baluga holioholialemo tamakave iamoveve keu daemo anekianu. Eu kosive. Isege dau valave. Iale auna Munana Tumuteta veneta la babatisogevei. ¹⁷ Iale ata kena lohoniege au keilota laisue i bisi kitoai hatuge momoluve abuna moleve keiolahasege ive abuna moleve keiolahai. Ige auna laisue i malei au valahumo otoveito momoluve ke malei veneu hodovavesite kemo mahoevei.”

¹⁸ Dioniu hotoe dua moaga kateale loui ata haivenu. ¹⁹ Isi gamanie kosive Elodiho hoto tolote lounu. Kosealemoike Elodiu au hohoe mahina Elodiasi ke etulei melamenu. Isi vaveve toela degomoleta vaevenu.

²⁰ Vaveve toela moaga vaveito ke golomo Dioni mai dibulae hanavonu.

Iesuu babatisoale deiada
(*Matiu 3.13-17; Maka 1.9-11*)

²¹ Au mai dibulae hanavoholisege Dioniu ata degomole babatisogevenu. Isi Iesuta babatisohavonu. Ige Iesu hovelahai lamisi guliguliassege otogou dikolahanu. ²² Ige Munana Tumuteu imutava ke nahate holisi dobai lohoaleu avuemo ua. Isege hoto moleu otogomo dobai lohoaleu loui avoe, “Au di uvue mo seleve. Iale di a vahaeho va baluganu.”

Iesu valadae deiada
(*Matiu 1.1-17*)

²³ Iesu babatistomale vani kela vaganaveu teti (30). Ige ataeau huhulahai avoe, “Iesu keu Dioseba mo.” Isito ke mama seleveike Dilava.

Ige Dioseba mamaike Heli.

²⁴ Ige Heli mamaike Matati.

Ige Matati mamaike Livai.

Ige Livai mamaike Meliki.

Ige Meliki mamaike Dianai.

Ige Dianai mamaike Dioseba.

²⁵ Ige Dioseba mamaike Matataiasi.

Ige Matataiasi mamaike Emosi.

Ige Emosi mamaike Nahumi.

Ige Nahumi mamaike Esili.

Ige Esili mamaike Nagai.

²⁶ Ige Nagai mamaike Meati.

Ige Meati mamaike Matataiasi.

- Ige Matataiasi mamaike Semeni.
 Ige Semeni mamaike Dioseki.
 Ige Dioseki mamaike Dioda.
 27 Ige Dioda mamaike Dioanani.
 Ige Dioanani mamaike Leisa.
 Ige Leisa mamaike Selubabeli.
 Ige Selubabeli mamaike Siatieli.
 Ige Siatieli mamaike Neli.
 28 Ige Neli mamaike Meliki.
 Ige Meliki mamaike Adi.
 Ige Adi mamaike Kosami.
 Ige Kosami mamaike Emadami.
 Ige Emadami mamaike Eli.
 29 Ige Eli mamaike Diosua.
 Ige Diosua mamaike Eliesa.
 Ige Eliesa mamaike Diolimi.
 Ige Diolimi mamaike Matati.
 Ige Matati mamaike Livai.
 30 Ige Livai mamaike Simioni.
 Ige Simioni mamaike Diuda.
 Ige Diuda mamaike Dioseba.
 Ige Dioseba mamaike Dionami.
 Ige Dionami mamaike Eliakimi.
 31 Ige Eliakimi mamaike Melea.
 Ige Melea mamaike Mena.
 Ige Mena mamaike Matata.
 Ige Matata mamaike Natani.
 Ige Natani mamaike Deividi.
 32 Ige Deividi mamaike Diesi.
 Ige Diesi mamaike Obedi.
 Ige Obedi mamaike Boasi.
 Ige Boasi mamaike Salemoni.
 Ige Salemoni mamaike Nasoni.
 33 Ige Nasoni mamaike Aminadabu.
 Ige Aminadabu mamaike Alamu.
 Ige Alamu mamaike Heseloni.
 Ige Heseloni mamaike Belesi.
 Ige Belesi mamaike Diuda.
 34 Ige Diuda mamaike Diekobo.
 Ige Diekobo mamaike Aisiki.
 Ige Aisiki mamaike Ebalahamu.
 Ige Ebalahamu mamaike Tela.

- Ige Tela mamaike Nahoa.
³⁵ Ige Nahoa mamaike Seluki.
 Ige Seluki mamaike Leu.
 Ige Leu mamaike Beleki.
 Ige Beleki mamaike Ebeli.
 Ige Ebeli mamaike Sala.
³⁶ Ige Sala mamaike Keinani.
 Ige Keinani mamaike Avasadi.
 Ige Avasadi mamaike Semu.
 Ige Semu mamaike Noa.
 Ige Noa mamaike Lameki.
³⁷ Ige Lameki mamaike Metusala.
 Ige Metusala mamaike Inoka.
 Ige Inoka mamaike Dieleti.
 Ige Dieleti mamaike Mahalaleli.
 Ige Mahalaleli mamaike Keinani.
³⁸ Ige Keinani mamaike Enosi.
 Ige Enosi mamaike Seti.
 Ige Seti mamaike Adamu.
 Ige Adamu mamaike Dilava.

Seteneu Iesu lobohavoale deiada

(Matiu 4.1-11; Maka 1.12, 13)

4 ¹Iesuu Diodani e halei tige Munana Tumuteu avuemo baluganu. Avuemo balugai melamei ataeau uvesite keve tinu. ²Tiale keu keve usege Seteneu lohoale vani voti (40) ke uvumo lobohavoi isiviale elehage Iesuna kemo dobai o negoai. Keu vani ke ni bahatamo lovi iholialemo vae baluganu.

³Ige Seteneu avuho loui avoe, “A Dilava mo holiniege mune ko namihage au beleidi holige inela.” ⁴Ige Iesuu namihai loui avoe, “Bukae Hotou loui avoe, ‘Atabeu bae lovi unaha ke isi kemo negoalivebene.’ ”

⁵Kateige Seteneu tota melamei tanae tiale solekavesite vata bahata mai haivunu. ⁶Isi loui avoe, “Dana vata ko bahata mai aoge ana kemo vuvune baluga mai bae kunai moaga malenela. Dilavau louge vata ko bahata di vata. Kunai keta di kunai. Iale dana mai di isivie ata omige auna malei. ⁷Iale ana a kome bokoai vata bisi di hoesehavege dana ke bahata malei aomai.” ⁸Ige Iesu namihai avoe, “Bukae Hotou loui avoe, ‘A Kosive Dilava ke igae hoesehavoi isivive unaha vanela.’ ”

⁹Kateige Seteneu tota Iesu melamei Dielusalemoe tinu. Tialeu Diue dubu baluga ke kobola lavihovosege Seteneu loui avoe, “A Dilava mo holiniege komo lamisi biloa. ¹⁰Kosealemo Bukae Hotou loui avoe, ‘Dilavana au anelu hanavege abuna a nibisi a hoesehavoi.’ ¹¹Hoto

keu tota loui avoe, ‘Anelu abuna a evudei. Ige a bae dobai munemo a ebika hamalivebene.’ ” ¹² Ige Iesu hotove ibina avuho loui avoe, “Hoto seleveike. Isito Bukae Hotou tota loui avoe, ‘Lainaho heiata la Kosive nego ke kaovalive.’ ” ¹³ Ige Seteneu hoto kateale loui Iesu lobohavoge uoholige au halei tinu. Isiviai talive ukaukaito tota avue lohoi.

Iesuu vasohuta au lovie uli vale

(Matiu 4.12-17; Maka 1.14-15)

¹⁴ Iale loboe vaveve keu uoholige Iesuu halei Galili vatae tinu. Keve tiale Munana Tumute vuvunemo ua. Ige au vamale ke hotou vata ke bahatae tinu. ¹⁵ Ige au tiale dubuiabemo ata haivege abu bahata hoesehavolu.

Iesu ataeau Iesu kabebihavolu.

(Matiu 13.53-58; Maka 6.1-6)

¹⁶ Vani mole Iesu hoilahai tiale Nasaletae au esebuluta uale keve velemanu. Vani bahata bulau lohoge auna tiniege guliguliagei. Iale bula kemo au tiale dubue lamisi isiviai Bukae Hoto dodavei. ¹⁷ Kateige abu beloveta Aisaia buka mole mai omilu. Ige au buka ke mai vavehai iviganiai dodavei tinu. ¹⁸ Dodavei avoe,

“Dilava Munanau daemo ua.

Au di ebagemage dana hotove dua loui kunaiholimale kebia haivei.
Au di hanavoge dana tiniege vaveveabe toela kemo iovege abuna ke halevai.

Au di hanavoge ni kedute keabuna bae nilahai elehai.
Au di hanavoge dana olemeau uvu unahamo umale kebiata hoesegevei.

¹⁹ Au di hanavoge dana ataho loui kosea,
‘Kosivena bae aike la hoesegevei la tedaavei.’ ”

²⁰ Hoto ke dodavege uoholige au buka mai dubue ata mole omisito ugumanu. Ige ata bahataeau tobekai nibisi ua. ²¹ Ige Iesu namigevei abuhu loui avoe, “Di hoto dodavege la eviale keu nova velemanu.” ²² Hoto kateale louge abu hotoe dua ke evige uvuiabeu teteanu. Isi vikolahai loui avoe, “Dioseba monike. Au oleve kateai hoto ke manu.” ²³ Ige Iesu abuhu loui avoe, “Di hilokage la hoto kosealeike dahoe louliho. ‘Au vavahanite hoesegevemale ata. Iale a ebika hoesehavonela.’ Mesoho lana tota daho loui kosea, ‘A Kabenumu oe vaveve ni molete vale ke nahate a vata seleve kove kateale vanela.’ La la uvumo hoto kateale huhulahama. ²⁴ Isito di la namigevege evive. Beloveta ata kena au vata kemo hoto louge atave seleve keau bae hotove evilivebene. ²⁵ Dana kemo hoto mole loui. Subuta mole Ilaidiau usege veniu lohoholiale vagana abuita igaeta isi bata ada mole isi igaau uoholinu. Katealemoike vata ko bahatamo loviu uoholige

vae balugau lohonu. Kateimale vanila Iselala gobuvu moagaeau vata kove ua. ²⁶Isito kebiaho Dilavau Ilaidia hanavoholinu. Ke hanavoge vata mole Saidoni keve tiale Salebeta oe gobu mole tedahonu. ²⁷Subuta vani kela Iselala ata moagaeau vavahani mole lebolasi ke malu. Isito beloveta Ilaisau kebia tediaeholinu. Isito Silia kosive mole Neimeni ke igae tedahoge au momoleanu.” ²⁸Iesu hoto isute kateale louge ata bahataeau dubue uvue ke evisi avuho itumu balugalu. ²⁹Isi kemo hoveve Iesu kabitisi isiviale mai oe iae seikamo mihatui. ³⁰Isito Iesuu ata bahatae edekaeabemo velemai tinu.

Malaha mole munana toelate

(Maka 1.21-28)

³¹Iesuu matama ke halei Galili vatae o mole Kabenumue tiale keve bulamo ata haivenu. ³²Ige abu Iesuu louale ke evisi vikolahalu. Kosealemo hoto keu vuvuneanu. ³³Ige dubu ke uvue tilogoe malaha moleu baita hoai kekoanu. ³⁴Kekoai loui avoe, “Tesu Nasaleta ata, no halevei tenela. Ana no aiogevelihonike kove lohonu. Di hilokage au Dilava mo tumute.” ³⁵Ige Iesuu munanae toela ke namihai loui avoe, “Hoto halei malaha ke halei tenela.” Kateige munanae toela keu malaha ke laluvai mai vudiabemo vata hamanu. Isi ata ke halei tige au dua vanu. ³⁶Ige ata bahataeau vikolahai moleho loui avoe, “E, hoto onoleiko. Malaha kou au vuvunemo munanae toela kebiaho baita louge abu halevai tima.” ³⁷Iale Iesuu vamale hoto keu vata ke bahata sonumai tinu.

Iesuu ata moaga hoesegevenu.

(Matiu 8.14-17; Maka 1.29-39)

³⁸Iesu hovelahai dubu halei Saimoni oe tinu. Tiale keu Saimoni meau hobe balugale ke abu loui Iesu namihalu. ³⁹Ige Iesuu tiale vavavemo lamisi vavahanive ke hotohavoge uoholinu. Ige keate keu solekavesite hovelahai lovi vai ovenu.

⁴⁰Gutumo vaniu dobasege ataeau haokuvuiabeau vavahaniamale kebia malevei Iesue loholu. Ige Iesu au ada mai igaegae kebia golomo mamoge abu bahata momolelalahalu. ⁴¹Isime munanae toela moaga kebia nunuvege abu kekolahai loui avoe, “Au Dilava mo alike ke.” Kateai lousege Iesu hotoeabe bamunu. Kosealemo abu hilokage Dilavau ke hanavoge keu ata tediaeveve Keliso holinu.

⁴²Vani mole vau alamosege Iesuu o halei ataeau uvesiteve tinu. Ige ataeau kaovalata bae elehalu. Ke elehai namihai loui avoe, “Ti haleito no o komo unela.” ⁴³Isito Iesu namigeveve loui avoe, “Dilavau di hanavoalemo dana o benahateve tiniege ataeau Dilava adae vuvunemo uveve hoto ke loui ata haivei.” ⁴⁴Kateai louime halei tiale Diudia vata ke bahatae dubuiabemo ata haivenu.

Iesuu au esemu degomole hohavenu.

(Matiu 4.18-22; Maka 1.16-20)

5 ¹Vani mole Iesuu tiale tabu mole Genesaleti esagae laminu. Keve lamisege ata moagaeau Dilava hoto eviliho lohoale molemo neniholilu. Isi Iesu kabitige au lamiveve humahau uoholinu. ²Kateisege huena malemale keau bouti abuita malei esagamo otovei abu ugabi malei totoisege Iesuu kebia elegevenu. ³Ige Iesuu ata mole Saimoni ke boutimo biloai Saimoni namihai loui avoe, “Aike esagamo ko hanavoge au e goloe tikitikai.” Kateaito golovemo ugulamoi ata moaga kebia haivenu.

⁴Ata moaga kebia haivege uoholige au Saimoni namihai loui avoe, “Bouti ko hanavoge au tota e ni seleve tai. Isime la ugabi malei hatui huena moaga maleve.” ⁵Ige Saimoni loui avoe, “No baluga, no nova vavi ko bahatamo e maholata huenabe maleholilu. Isito a loualemo noeabuna ugabi tota emo hatui.” ⁶Kateai louito abu ugabi malei hatulu. Ige huena moagatahoeau ugabiabemo tobalohoge ugabiu dikolahaho vekeanu. ⁷Kateige keau bouti mole keve abu haokuvu hohavei loui avoe, “Lohoi no tediaeveve.” Kateige abu lohoale huena malei bouti abui ke bilage keau ililohoho vekeanu. ⁸Ige Saimoni Bitau huena moaga elegevei Iesu vudimo au kome bokoai vata bisi namihai avoe, “Kosive, di halei tenela. Kosealemo dau atae toela.” ⁹Kateai louale keu koseanu. Keu au esemuhi huena moaga kebia elegevei vikolahalu. ¹⁰Ige haokuvuiabe Sebedi mo abui Diemisiu Dioniti abuta viko balugalu. Ige Iesuu Saimoni namihai loui avoe, “Vabu halenela. A subuta huena malema. Isito ana aike daho ata malevenela.” ¹¹Kateige abu bouti malei lohoale esagamo otovei halevai Iesu ehovai tilu.

Iesuu lebolasite hoesehavonu.

(Matiu 8.1-4; Maka 1.40-45)

¹²Vani mole Iesuu o moleve tige lebolasite ata moleu lohoaleu Iesu elehai vudivemo kome bokoai vata bisime holumai baita avuho loui avoe, “Di Kosive, a isivianiege di hoesehavonela.” ¹³Ige Iesu au ada hatui malaha kela holisi namihai avoe, “Ito, dana a hoesehavoi.” Ke lousege solekavesite malaha kemo lebolasiu uoholinu. ¹⁴Ige Iesu isuta avuho loui avoe, “Inuta talive a ebika mai dubu nalimale kosive ke haivuge au a vava elehai a namihage Moseseu louale ke nahate vai ono mole mai mahoi Dilava hoesehavoge ataeabuna elehai hilokage a vavau duaveanu. Isito ainaho bae atabehe di a hoesehavoale ko loulive.” ¹⁵Iesuu kateai louito vaveveve keu o bahatae tai gabianu. Ige ata moagaeau isiviai loholive hotove evisime au vavahaniabe kebia hoesegevei. ¹⁶Isito Iesuna vani degomole halevei tiniege ataeau uvesite keve guliguliagei.

Iesuu ata mole hoesehavonu.*(Matiu 9.1-8; Maka 2.1-12)*

¹⁷Vani mole Iesu ata haivesege Balisia ata isi menaka haivemale ata keau Galili vatae, Diudia vatae isi Dielusalema o baluga keve loholu. Lohoale keve uguiavoi hoto ke evisese Dilava vuvuneu Iesuemo uge au vavahaniamale kebia hoesegevevema. ¹⁸Isege ata degomoleau malaha mole ada toelate isi velo toelate ke kaulamo mavoi ebavoi loholu. Isiviale malaha ke mai lohohoi oe uvue Iesu vudimo mavoi. ¹⁹Isito ata moagaeau molemo nenioholiale kemo abu mai oe vahae lohoveve keu anekiage abu ebavoi mai tiale oe goloe mavoi o ke kobuhai kaula ke umuvai mai vahamo manevege malaha keu kaula kemo dobai tiale ata kebia vigomo Iesu vudimo dobai ua. ²⁰Ige Iesuu vaveveabe ke bahata hilokage abu abu evievi Iesuemo mavolu. Iesu malaha keho loui avoe, “Di haoka, di a toela ke bahata ulihage uoholinu.” ²¹Kateai lousege Diue menaka loui haivemale ata isi Balisia ata keau huhulahai avoe, “Oleike ko hoto koseale loui Dilava ivi aiahavoma. Atabeu bae vaveve toela ulihalivebene. Isito Dilava igaena kateale vai.” ²²Kateai lousege Iesuu huhuihuhuiabe ke hilokai namigevei loui avoe, “Vadeuhoike la huhuihuhuiabe toela kateale huhulahama. ²³Dana hoto vadeu loui. Dana malaha ke namihai kosea, ‘Di a vaveve toela ke bahata ulihanu.’ Emena dana loui kosea, ‘Hovelahai tenela.’ La huhuige hoto oleteu toloholinu. ²⁴Isito halege dana vavahanite ke hoesehavoge lana kemo hilokage vaveve toela ulihaveve vuvune ketau daemo ua.” Kateai louito vavahanite ke namihai loui avoe, “Hovelahai a ava egumai mai a oe tenela.” ²⁵Kateai lousege malaha keu solekavesite vudiabemo hovelahai au avamo lahamale ke egumai mai au oe tiale keu Dilava hoesehavonu. ²⁶Ige ata bahataeau ke elehai tetelahai vabulahai Dilava hoesehavoi avoe, “Vaveve oletealeike nahi nova elehale ko.”

Iesuu Livai hohavonu.*(Matiu 9.9-13; Maka 2.13-17)*

²⁷Iesuu kateaito halei tialeu takesi malemale ata mole elehanu. Ivideike Livai. Malaha keu takesilahamale oe uvue ugulamoi usege Iesuu namihai loui avoe, “Di ehomanela.” ²⁸Ige Livaiu hovelahai au kunai bahata halevei Iesu ehomanu.

²⁹Vani mole Livaiu au omo lovi balugataho Iesuho vai hoage takesi malemale ata isi haokuvuiabe degomole keau lohoale abuhi lovi ima. ³⁰Ige Balisia ata isi Diue menaka loui haivemale keau Iesu esemu namigevei loui avoe, “Osiohoike la takesi malemale atae toela kebiahi igaetoai lovi ima. Isime atae toela degomole kebiahi igaetoai lovi ima.” ³¹Kateai louge Iesu namigevei avoe, “Medikolou bae negote kebiaho loholivebene. Isito auna vavahanite kebia unaha hoesegevelihoi lohohoi.

³²Iale dau lohoale kou atae dua kebia hohaveliho lohoholisito vaveve toela vamale kebiahoike di lohonu.

Lovi ioholisito guliguli unahaveve belala

(Matiu 9.14-17; Maka 2.18-22)

³³Iesuu kateige menaka haivemale ata keau tota Iesu namihai avoe, “Dioni esemu keau vani igaegae lovi iholisito guliguli unahama. Ige Balisia esemu kebiata kateale vama. Isito a esemu keau kateale vaholima.” ³⁴Ige Iesuu namigevei avoe, “La huhuige mo molena ma mole melamege haokuvuiabe abuna lovi isi. Emena abuna halevai. Ba, abuna lovi isi vahaeholahi. ³⁵Isito vani mole atae toelaabuna loholiege mo ke hamage haokuvuiabe abuna bae vani kela uvulahi lovi i halevai.”

³⁶Kateaito tota dovudovue hoto mole loui namigevei loui avoe, “Atabeu bae ogoe dogae ivi etulei mai ogoe mamie vaha badivulivebene. Auna kateige ogoe doga kena toelai. Ige mamive ke elehage elehilehivena toelai. ³⁷Ke nahate atabeu bae uainie doga mai ovoe vate badivuale mamivemo ehosivalivebene. Auna kateige kena savai dikolahi. Ige uainie e kena hosilahi lotihatui. ³⁸Isito atabena uainie doga mai ovoe vatee dogamo ehosivage keu bae dikolahalivebene. Iale di vaveveu bae vatae vavevehi igaetolivebene. ³⁹Isito atabena vani bahata uainie mami ke iniege auna uainie doga keho isiviholisi. Isito auna huhuige uainie mami keu avuemo heanu.”

Bula hoesehavoveve belala

(Matiu 12.1-8; Maka 2.23-28)

6 ¹Vani mole bulamo Iesu au esemuhi oai tiale konee bulu molemo tisege esemuiabeau kone dakoai ke boboai ilu. ²Ige Balisia ataeau ke elehai namigevei loui avoe, “La vadeuhoike menaka eguvai bulamo katelalahu.” ³Ige Iesu namigevei avoe, “Lana Bukae Hotomo Deividui au esemuhi vaelahaime vale ke dodaveholilu. ⁴Isi Dilava dubue uvue tiale beleidi tumute ke mai iale keta lana dodaveholilu. Dubu nalimale unahaeabuna beleidi ke igei. Isito vani kela Deividui menaka ke egumai beleidi ke isi au esemu ovege kebiata ilu.” ⁵Hoto kateale louito hotoeabe kemo loui avoe, “Atae Ese keu bulae Kosive. Iale auna onole louge abuna ke vai.”

Malaha mole ada golote

(Matiu 12.9-14; Maka 3.1-6)

⁶Bula mole vanimo Iesuu tota dubue tiale ata haivesege malaha mole adave inuteu goloale keu keve ua. ⁷Isege Diue menaka loui haivemale ata isi Balisia ata keau Iesu nibisi isiviai elehage Iesuna bulamo malaha ke hoesehavoge abuna vaveveve kemo kotalahi. ⁸Ige Iesu huhuihuhuiabe

ke hilokai ada toelate keho loui avoe, “Hovelahai kove loho.” Ige malaha keu hovelahai laminu. ⁹Ige Iesuu dubue kosive kebiaho loui avoe, “Dana la namigevei. Nahie menaka keu nahie haivege nahiabuna bulamo osoi. Nahiabuna bulamo vaveve dua vai. Emena vaveve toela vai. Nahiabuna bulamo ata hoesegevei. Emena ata aiogevei.” ¹⁰Ige abu hotohotoholige Iesuu elegevei lotinu. Isime malaha nehe ada toelate ke namihai avoe, “A ada hatunela.” Ige malaha keu au ada hatuge adaveu inuanu. ¹¹Ige dubue kosiveau ke elehai avuho itumu selevelahalu. Isime hotohotoai Iesu hamaliho humaha kaovama.

Iesuu esemu tuelo (12) tabagevenu.

(Matiu 10.1-4; Maka 3.13-19)

¹²Vani mole Iesuu tanae guliguliho tialeu vavi ke bahatamo guliguliai Dilava imihanu. ¹³Ilage vau alamoge au esemu bahata hohavege abu lohoge au kebia bahatamo esemu tuelo (12) tabagevei loui avoe, “Laeau di abostolea.” ¹⁴Kebia iviabe abuike koea. Moleike Saimoni. Isito Iesu ivihaleike Bita. Ige hohove Andulu. Ige Diemisi. Ige Dioni. Ige Bilibi. Ige Batolomi. ¹⁵Ige Mati. Ige Tomasi. Ige Aloveasi mo Diemisi mole. Ige Saimoni mole keu Selotie ata. ¹⁶Ige Diemisi mo Diudasi. Ige Iesuho haiaveve malaha mole Diudasi Kaliota. Iesuu esemu kateale tabagevege abu avuluvuta ua.

Iesuu ata haivei hoesegeveale deiada

(Matiu 4.23-25)

¹⁷Iesuu abuhi tana ke halevai heie lohoale loho moleve velehovoge esemuve moagaeau loholu. Ige ata moagamoagaeau Iesu hoto evilihio abu o halevai loholu. Kebia degomoleau Diudia vatamo loholu. Isege degomoleau o baluga Dielusalema halevai loholu. Ige tota degomoleau davalavae o abuita Taea isi Saidoni kebiamo loholu. ¹⁸Lohoale isiviale Iesu hoto evige au vavahaniabe kemo hoesegevei. Ige degomoleau munanae toelau abuemo umale kebiataeau lohoge au kebia hoesegevenu. ¹⁹Ige ata bahataeau Iesu vuvuneu ata hoesegevemale ke elehai isiviale levei.

Vahaeho isi uvu lahaveve deiada

(Matiu 5.1-12)

²⁰Iesuu au esemu niavei abuho loui avoe, “Kunai holimalea, vahaeholahave. Dilavana ata la nahate malevege lana adave vuvunemo uve.

²¹“Vaelahamalea, vahaeholahave. Gabie la uniabuna bae hanilahai. “Ninalahamalea, vahaeholahave. Gabie lana bae helahave.

²²“Di esemuia, ataeabuna bae laheho isiviholisi la hoto hamai la aiogevei laheho loui kosea, ‘La keau atae toelaea.’ Kosealemo laeau di esemuia. Abu

kateige vahaeholahave. ²³ Vani kateimalela hovedevei vahaeholahave. Kosealemo lana bae otogoe ibina baluga maleve. Subuta buluveabeau kateale vai beloveta aiogevelu. Ialemo ataeau la aiogevege vahaeholahave.

²⁴ “Isito kunai moagatebia la nohovu. La vatae vahaeho unaha vaito otogoe kunai maleholilu.

²⁵ “Isi uniabeu aike hanilahamale la nohovu. Lana bae gabie vaelahave. “Aike helahamale la nohovu. Lana bae gabie ninalahave.

²⁶ “Ataeau hotoe dua loui la hoesegeveale la nohovu. Kosealemo subuta buluveabeau lobo hoto kateale loui lobo beloveta hoesegevelu.”

La aiogevemale kebia isivi oveve.

(Matiu 5.38-48; 7.12)

²⁷ “Isito di hoto evimalea, di la namigevege evive. La aiogevemale kebia isivi ovei hoesegeveve. Isi laheho itumuamale kebiata hoesegeveve. ²⁸ Isime laheho hotoe toela loui la aiogeveale kebia hoesegeveve. Isi laheho vaveve toela vamale kebiataho Dilava imihave. ²⁹ Ata oleu la mono vaki molemo hamage louge au tota vaki moleveatae hamai. Ige ata oleu la dabae ogo mage louge au la sieti keta mai. ³⁰ Ata oleu onoleho isiviai la namigevege isivive ke mai omive. Isi ata oleu la kunai malege lainaho bae au mai hoilahaveve keho namihalive. ³¹ La isiviage ataeau la hoesegeveho vage lata ata kebia hoesegeveve.

³² “Isito ata oleuoleu laheho isivilahai la hoesegeveale kebia unahaho lana isivilahage Dilavana oleve kateai la hoesegevei. La hilokage atae toela keau vaveve kateale vai abu haokuvu unahaho isivilahama. ³³ Isito lana oleuoleu laemo vaveve dua vamale kebia unahaemo vaveve dua vage Dilavana oleve kateai la hoesegevei. La hilokage atae toela keau vaveve ke nahate vai abu haokuvu unahamo vaveve dua vama. ³⁴ Mesoho ata molena lae lohoi laemo moni malege lainaho au gabie ibinave laoveveve ke huhulahalive. Kosealemo atae toela unahaebuna vaveve kateale vagei. Lana kateai huhulahage Dilavau bae la hoesegevelivebene. ³⁵ Lainaho vaveve kateale valive. Isito la aiogevemale kebia isivi oveime vaveve dua abuho vai hoesegeveve. Laemo moni malemale ke lainaho huhulahai kosea, ‘No moni kena hoilahai noe lohoi.’ Lana vaveve kateale valiege ibina baluga malei bae ehue umale Kosive baluga ese holieeve. Kosive vaveve keu koseanu. Keu atae toela kebia hoesegevei huhuihuhuie toela huhuimale kebiata hoesegevema. ³⁶ La Mamau otogoe vamale ke nahate lata ata huhuevei kebia tedaeveve.”

Mole vaveve kaovamale hoto

(Matiu 7.1-5)

³⁷ “Lainaho mole vaveve toela kaovai abuemo loui kosea, ‘Keau vaveve toelate.’ Lana mole vaveve kaovaholige Dilavana avuta bae la vaveve

toela kaovalivebene. Isi lainaho mole toelamo hoto loui ibinaeabe ovegelive. Isi lainaho molemo vaveve toela vale ke huhulahagelive. Lana katelahage Dilavana avuta la toela ke huhuoholisito ulihai. ³⁸Lana kunaimo isi otogoe hotomo ata tedaevege Dilavana bae kunai laovei la tedaevei. Lana kateale vage kunaina bae laemo balugai. La vaveve oletealemo ata tedaevege Dilavana avuta la tedaevei.”

³⁹Iesuu hoto kateale louge uoholigeto dovudovue hotomo namigevei avoe, “Malaha mole ni kedute keu bae malaha mole ni kedute ke melamei avui talivebene. Abuna avui katelahaliege abuna abata ke igae vuvegevei. ⁴⁰Esemue hoto keu bae haivemale atae hoto evihalivebene. Isito esemuiabe keabuna hotove ke kaovai negolahaliege abu kosive nahate holisi.

⁴¹“La isiviale la haokae nimo louka mai. Isito la kateisege la nimo louka balugau ua. ⁴²Louka balugau la nimo uale kemo lana oleve kateai la haokaho loui kosea, ‘Lohoge di a nimo loukae esehameu uale ke mai.’ Lainaho katelahai la haoka loboaholive. Isito vasohuta louka balugau la nimo uale ke maito bae la haokae nimo loukae esehameu uale ke mave.”

Idi bahata hahuhumite ke la hilokalu.

(Matiu 7.16-20; 12.33-35)

⁴³“Idie dua keu bae hahuhumie toela valivebene. Ige ke nahate idie toela keu bae hahuhumie dua valivebene. ⁴⁴Idi bahata hahuhumite ke la hilokalu. Iale la bae laokamo madilini ehalivebene. Isi la bae sesenamo vulutu ehalivebene. ⁴⁵Atae dua ke uvumo huhuihuhuie duau uale kemo auna hotoe dua lougei. Isito atae toela ke uvumo huhuihuhuie toelau uale kena kemo hotoe toela lougei. Kosealemo ataeau abu aimo loumale keu abu uvumo huhulahamaleike abu ke louma.”

O houmale ata abui

(Matiu 7.24-27)

⁴⁶“La osiohoike di namihai kosea, ‘No kosive. Isito la di louale ke eviholilu. La kateige toelanu. ⁴⁷Isito oleuoleu dae lohoi di hoto evisi vamale ata kebia vaveveu koseanu. ⁴⁸Ata moleu oe dua houmale ke nahate. Auna abata lovoi hade malei emee dua vai mune golomo au o houge hanunuu lohoge o keu bae hobelahalivebene. Kosealemo keu au o houge dua vanu. ⁴⁹Isito ata moleu di hoto evisito vaholimale keu oe toela esagamo houmale ke nahate. Keu neniai abata lovoi hade malei neniai emeholinu. Ialemo hanununa lohoge o kena solekai hobelahai bahata toelai.”

Kosive esemuu momoleanu.

(Matiu 8.5-13)

7 ¹Iesuu hoto kateale loui ata namigevege uoholigeto au halei Kabenumue tinu. ²O kemo Loma tuvalie kosive moleu ua. Uvuve

esemu keu vavahaniale hatiho vekeanu. ³Ige tuvalie kosiveu Iesu vamale hoto ke evisime Diue kosive hanavei isiviale abu Iesu namihage au loholive esemuve hoeshavoi. ⁴Kateige abu lohoale Iesu namihai avoe, “Tuvalie kosive moleu isiviale lohoi talive esemuve hoeshavonela. No isiviale ke tedaho. ⁵Kosealemo malaha keu atae dua. Keu no ata bahata hoesegevei noheho dubu mole hounu.” ⁶Abu hoto kateale loui Iesu namihage au halei abuhi tinu. Tialeau oe vavae tisege tuvalie kosiveu au haokuvu hanavege abu lohoale Iesu namihai avoe, “No kosiveu loui avoe, ‘Di kosive, halege ainaho di oe loholive. Dau bae atae duabene a bae di oe uvue lohoi. ⁷Katealemoike di data isiviholinu ae loholiho. Isito ana hoto unaha louge di esemu kena momoleai. ⁸Di hilokage tuvalie kosive baluga keau vuvune mai daovale kemo dana di tuvalie esemu namigevege abuna di isivi ke vai. Dana mole namihai kosea, ‘Tenela.’ Ige auna tai. O mesoho moleho loui kosea, ‘Loho.’ Ige auna lohoi. O mesoho dana di omo loviamale esemu namihai kosea, ‘Ke vanela.’ Ige auna vai. Iale ana hoto unaha louge di esemu kena momoleai.” ⁹Ige Iesuu hoto ke evisi vikoai hoilahai ata moagaeau ehovai tiale kebiaho loui avoe, “Di la namigevei. Iselala ataemo di evievi kosealebe negote elehaholinu.” ¹⁰Kateai louge tuvalie kosive haokuviabe keau tota hoidevei ove tilu. Tiale ove velehovosege esemuveu momoleanu.

Gobue mou hovelahanu.

¹¹Vani mole Iesuu halei o mole Neinie tinu. Keve tige esemuiabe isi ata moaga keau avuluvuta tilu. ¹²Tiale keau ologoe velehovoho vasege o ke biaeau ata moleu hatiale ke kesita ebavoi mai abuela loholu. Hatiale keu gobu mole mo igahameike ke hatinu. Ige oe ata moagaeau gobu keluvuta loholu. ¹³Ige Iesuu gobu ke elehai avuho uvu balugai namihai loui avoe, “Nina hale.” ¹⁴Kateai louito tiale au ada mai kesi kemo mamoge ebavoi lohoale keau lavilu. Ige Iesuu loui avoe, “Moia, di a namihama. Hovelaha.” ¹⁵Kateige hatiale atau hovelahai hotoanu. Ige Iesuu mai neinave ominu. ¹⁶Ige ata bahataeau ke elehai vabulahai Dilava hoeshavoi loui avoe, “Beloveta balugau nova noe lohonu. Dilavau au ata tadeaveliho lohonu.” ¹⁷Ige Iesuu vamale hoto keu Diudia matama keve tinu. Isime Diudia ke iae o degomole ketave tinu.

Dioni esemuiiau Iesue loholu.

(Matiu 11.2-19)

¹⁸Kateige Dioni esemuiiau ke evisi lohoale namihalu. Ige Dioniu au esemu abuita hohavege abu avue loholu. ¹⁹Ige au kebia hanavei loui avoe, “Talive Iesu namihai loui kosea, ‘Dioniu subuta loui avoe, No tadeaveve ata kena bae lohoi. Iale ata ke anike ko. Emena noeabuna mole hemei ui.’” ²⁰Ige abu Iesue lohoale avuho loui avoe, “Dioni ata

babatisogevefemale keu no hanaveike vage no a belahaho loholu. Dioniu isiviai hilokai. No tedaeveve ata ke anike ko. Emena noeabuna mole hemei ui.” ²¹ Kateai belahasege Iesu niabemo ata moaga vavahaniamale kebia hoesegevema. Ata degomoleau munanae toelau abuemo umale. Isege degomoleau ni kedutea. Iale Iesu kebia hoesegevema. ²² Isi kemo Dioni esemu namigevei loui avoe, “Hoidevei talive la vadeu elehai eviale ko loui Dioni namihai kosea, ‘Ni kedute keau nilahama. Ige velo golote keau lavisi olahama. Ige lebolasite kebia vavahaniu uoholima. Ige golemate keau hoto evima. Ige haluviale kebiata hovedevema. Isime di hotoe dua loui kunaiholimale kebiata haivema. ²³ Ige oleuoleu dolodoloholisito au evievi daemo mamoeale kena vahaeho balugai.’ ”

²⁴ Iesuu kateai lougeto Dioni esemuiau halevai hoidevei tisege au bae Dioni deiada loui ata moaga kebia namigevei avoe, “La komo botoe tiale Dioni elehage keu ata oleteale. La huhuige auna au uvu mai Dilavaemo mamoi negobedai laminu. Emena helukau kulumo mamoge kulu kibikibiale ke nahate auna vanu. ²⁵ La keve tiale ata oleteale elehalu. Lana elehage kena ogoe dua vamale atanike ke. Ba, ogoe dua vamale keau bae botoe ulivebene. Isito abuna oe duamo ugei. ²⁶ Di tota la namigevei. La keve tiale vadeu elehalu. Lana beloveta elehalu. Seleveta belovetaike la ke elehalu. Isito keu beloveta kebia evigevei baluganu. ²⁷ Dioni vaveve keike Bukae Hotou loui avoe, ‘Dana di esemu mole hanavoge auna aho uli holisi tiniege ata namigevei kosea, Kosiveu lohoma.’ ²⁸ Di hoto mole louge evive. Dioniu ata bahata vata komo uale kebia evigevemu. Isito ivivesiteu di ata holisi Dilava adae vuvunemo uale keu Dioni evihanu.”

²⁹ Oe ata moaga isi takesi malemale ata kebiau Iesuu louale hoto ke evilu. Ata kebiau subuta Dioniu haiveale hoto ke huhuai avoe, “Dilava menaka keu noemo duave seleve.” Kebiaike Dioniu babatisogevemu. ³⁰ Isito Balisia ata isi menaka haivemale ata keau Dioniu louale hoto evisito isiviholilu Dilava humahala taliho. Katelahage Dioniu kebia babatisogevemaholilu.

³¹ Ige Iesuu kebia namigevei avoe, “Dana vadeu tovetove novae atate kobiaho loui. ³² Keau esebulua ologomo molehi gilulahamale ke nahate. Esebulu abuna moleho loui kosea, ‘Noeau laheho sale hamageto laeau havulahaholilu. Ige noeau ninalahageto laeau nohehi ninalahaholilu.’ Iale novae vani komo uale la vaveve keau esebulue vaveve ke nahate. ³³ Isi ke nahate ata babatisogevefemale Dioni keu lohoale vani degomole lovi ioholisi uaini halege la loui kosea, ‘Keu tilogoe ataike.’ ³⁴ Iniale Atae Eseu lohoniale uainita lovita ige la loui kosea, ‘Ata ke elehave. Keu lovi ivolovoloimale ataike. Keu uaini isi momaime takesi malemale atae toela kebiahi haokuvuanu.’ ³⁵ La louale kemo ataeau hilokage la luleleholilu. La hoto keu esebulue hoto nahate.”

Iesuu Saimoni oe tinu.

³⁶Vani mole Balisia malaha moleu isiviale Iesuu talive ove avuti lovi isi. Ige Iesuu tiale ove avuti ugumai lovi ima. ³⁷Isege o keve keate mole toela seleveu ua. Keu Iesuu o keve uale ke evisi deholo mole hagote mai lohonu. ³⁸Ke mai lohoale Iesu vavamo lamisi ninasege nimetavaveu Iesu velomo dodama. Ige au kome bokoai vata bisi au kinata Iesu velo ulihage uoholige au velove ke ulikukuhavoi deholo hagote ke mai velove ominu. ³⁹Ige Balisia malaha nehe Iesuho lovi vale keu ke elehai au uvumo huhuai avoe, “Iesu kou beloveta holivatebe keate keu levege au vaveveve toela hilokanu.” ⁴⁰Balisia malaha keu huhuihuhui kateale vage Iesuu ke hilokai avuho loui avoe, “Saimoni, dana hoto mole aho loui.” Ige Saimoni loui avoe, “Di kosive, louge di evisi.” ⁴¹Kateige Iesuu deiada mole loui namihai avoe, “Vani mole malaha mole abuaiu kosive mole monimo bukalu. Moleu vai handele (500) kinamo bukanu. Isege moleu vivti (50) kinamo bukanu. ⁴²Moni ke abu malei biage omiveve vaniu lohonu. Isito moniu abuemo uoholinu. Ige monie biageu namigeveve avoe, ‘Lainaho moni daovaveve ke huhulahagelive.’ Iale deiada kemo a huhuige malaha oleteu kosive ke vahaehove va baluganu.” ⁴³Ige Saimoni namihai loui avoe, “Di huhuige moni baluga maleale malaha keu.” Ige Iesuu loui avoe, “Avulike.” ⁴⁴Isi kateai au ebia ekovehai keate ke niavoime Saimoni namihai loui avoe, “Keate ko eleha. Di a o kove lohoge a e hai di velo totoholinu. Isito keate kou ninage nive eu di velomo dodage au kinata di velo ulihanu. ⁴⁵Di vasohuta a oe lohoge au di vahaeho vai di ulikukuhavoholinu. Isito di lohoge keate kou di velo bubuhavonu. ⁴⁶A deholobeta di kina omiholinu. Isito keate kou au deholo hagoteta di velo ominu. ⁴⁷Di a namihage evi. Di keate ko vaveve toela moaga ulihage uoholinu. Kosealemo keu au isivi bahata mai daemo mamoi di hoesehavo seleveanu. Isito ata olena di huhu eseveage dana vaveveve toela eseve ulihai.” ⁴⁸Kateai louito keate ke namihai loui avoe, “Di a vaveve toela bahata ulihage uoholinu.” ⁴⁹Kateige lovi imale ata degomoleau moleho loui avoe, “Hoto oleteale ko. Vaveve toela ulihamale atanike ko.” ⁵⁰Ige Iesuu keate ke namihai avoe, “A a evievi daemo mamoeale kemo Dilavau a toelamo a tedahonu. Iale vahaehomo tenela.”

Keate degomoleau Iesuluvuta tiale

8 ¹Vani degomoleau uoholige Iesuu au esemu tuelo (12) ehai abuhi tialeau o moagamoaga keve ataeau Dilava adae vuvunemo uveve hotoe dua ke loui haivelu. ²Ige keate degomoleau abuhi tiale kebia degomoleau vavahanitea. Isege kebia degomolemo munana toelau ua. Iale Iesuu kebia hoesegevege keau abuhi tilu. Keate mole Meli Magidaleni Iesuu avuemo munanae toela seveni (7) nunuvenu. ³Ige kebiamo koeau

abuhi tilu. Kosive mole Elodi ke esemu Tusa. Iale mahinave. Dioana. Ige Susana. Ige emo keate degomole kebiata igaetoai abu monita Iesu isi esemuiabe kebia tedaevegeliho abuhi tilu.

I degomole sesiale deiada
(*Matuu 13.1-9; Maka 4.1-9*)

⁴Ata moagaeau o igaegaemo Iesue lohoale mole bevuevei igaemo usege Iesuu dovudovue hoto mole loui haivenu. ⁵Haivei avoe, “Ata moleu au govaea i malei au bulue sesiaho tinu. Au sesievesege degomoleau humahamo keiohovolu. Ige ataeau kemo dasege ugueau degomole ige uoholinu. ⁶Isege degomoleau munemunemo keiohovoi vakilahai ulisito alumuiabeau dobai tiholige abu gililahu. ⁷Isege degomoleau adu bekate ke uvumo keiohovoge adu beikate keau ulisi kebia vavagevelu. ⁸Isege degomoleau vatae duamo keiohovoale keau ulie dua vai hahuhovoale keu moagataho.” Kateale louge uoholige au namigevei avoe, “La oleteau hoto evimaleau hoto ko evive.”

Dovudovue deiada
(*Matuu 13.10-17; Maka 4.10-12*)

⁹Ige esemuiabeau belahai avoe, “Dovudovue hoto ke ihuike onole.” ¹⁰Ige Iesu namigevei avoe, “Di isiviale Dilavau au matamae dogae vemale ke hilokave. Isito ata degomoleau evieviholimale kebiaho di dovudovue hoto louge abu bae ke evisi avuemo lulelelahalivebene. Abuna niavoito bae elehalivebene. Isi evisito bae lulelelahalivebene.”

Dovudovue ihu
(*Matuu 13.18-23; Maka 4.13-20*)

¹¹“Di dovudovue hoto louale ke ihuu koseanu. Dilava hoto keu govaeae i ke nahate. ¹²I degomoleau humahamo keiohovoale keau ata degomole nahate. Ata keabuna hotoe dua ke evisige Setenena lohoniege uvuiabemo hotoe dua ke aiohavoge. Ige elike abu hoto ke evi halevalive ukolikoli ma halevai. ¹³I degomoleau munemunemo keiohovoale keau ata degomole nahate. Keau hoto ke evisi maleime vahaeholahaito hoto ke ma seleve holioholilu. Iniege vani mole vaveve toelana abuemo lohoge abuna solekavesite hotoe dua ke evioholisi halevai. ¹⁴I degomoleau adu bekate uvumo keiolahale keau ata degomole nahate. Ata keau hotoe dua ke evisito vani mole abu vatae vaveve huhulahai kunaita huhulahage vaveve katealeu hotoe dua bamuge evieviabeu negoholinu. ¹⁵Isege i degomoleau vatae duamo keiohovoale keau ata degomole nahate. Ata keau hotoe dua evisi abu uvumo ke huhue dua vai negolahama. Ige evieviabeu balugatahoage abu vaveve dua vama.”

Lameba haneveve
(Maka 4.21-25)

¹⁶ “Atabeu bae lameba hanei mai maua uvumo mamolivebene. Isime mai ladevemale betie valae mamolivebene. Isito auna mai ehanumage ata olemeabuna o keve loholiege abuna atagavemo ui. ¹⁷Di hoto louale ke ihuu koseanu. Ataeabuna abu vaveve mahogovage Dilavana bae vaveveabe ke mai umidamo mamoge ataeabuna ke elehai hilokai. Isi vani kela atae vaveve bahatana Dilava atagamo bae velehovoi umidamo ui.

¹⁸ “Iale nenilahai la hoto eviale ke huhulahave. Kosealemo olena di hotomo luleleige Dilavana lulele baluga omisi. Isito ata olena au lulele unahamo hoto ke evisito keho isiviholige Dilavana avuemo luleleve ke mai evihai.”

Iesu neinuvu isi hohuvuiabe
(Matiu 12.46-50; Maka 3.31-35)

¹⁹ Iesu neina isi hohuvuiabe keau isiviai avue lohohi. Isito ataeau moagai nenioholige abu avue lohoveve keu anakianu. ²⁰Ige ata moleu Iesu namihai avoe, “A neinau a hohuvuhi heie ua. Abu isiviai a elehai.” ²¹Ige Iesuu ata bahata kebia namigevei loui avoe, “Olemeau Dilava hoto evisi vamale keau di neinuvu isi di hohuvu abulike.”

Iesuu eta hanunuta hotogevenu.
(Matiu 8.23-27; Maka 4.35-41)

²² Vani mole Iesuu au esemu ehai boutimo biloluvisege au namigevei avoe, “Lohoge nahi tabu ko houi vaki moleve tai.” ²³Kateaito halevai tisege Iesuu lahanu. Lahasege heluka balugau lohoge eu boutie uvumo hahosihovoge toelage esemuiabeau loui avoe, “Nahiabuna nova haluvisi.” ²⁴Kateai louito lohoale Iesu etuvai loui avoe, “Ei, no Kosive, no aike emo tima.” Ige Iesuu hovelahai eta hanunuta hotogevege hanunuu uoholige eu tolemanu. ²⁵Ige Iesuu au esemu namigevei avoe, “Lana la uvu mai daemo mavoholilu.” Kateai abuho louge abu namihaholisito vabulahai tetelahalu. Isi abu moleteho loui avoe, “Malaha oletealeike ko. Kou hanunuta eta hotogevege abu hotove evisi isivive valu.”

Iesuu tilogoe malaha hoesehavonu.
(Matiu 8.28-34; Maka 5.1-20)

²⁶ Hoto keu uoholige abu boutimo Galili halevai tabu ke vaki mole Gelasene vatae velehovolu. ²⁷Velehovoge Iesuu dobai esagae lamisege tilogoe malaha moleu avue lohonu. Malaha keu vani moaga ogo hatuholisito vava unahata umale malaha. Ata keu oe uoholisito kena vani bahata alue vutae ugei. ²⁸Iale malaha keu Iesu elehai baita kekoai

lohoale Iesu vudimo holumaime baita namihai avoe, “Iesu, otogoe umale Kosive ke mo, osiohoike a dae lohonu. Di a imihage ainaho bae di aiohavolive.” ²⁹Au louale keu koseanu. Au vasohuta lohoge Iesuu munanae toela keho loui isiviale nunuvage au malaha ke halemai tai. Kosealemo vani moaga munanae toela keu avuemo ui aiohavoma. Auna kateisege ataeabuna adave velove ke seimita umudievei mai omo bamuge auna ke bohisi detitisi botoe tigei. Munanae toelau avuemo uale kemoike au kateale vama. ³⁰Ige Iesuu namihai avoe, “A ivilike ole.” Kateige au loui avoe, “Di ivilike Moaga.” Malaha keu louale keu koseanu. Munanae toela moagaeau uvuvemo holoeavolu. ³¹Ilike vage abu Iesu imihai loui avoe, “Ainaho kumoe no hanavegelive.”

³²Kateaito elehasege ovo degomoleau tanae lovi isi olahama. Ige munanae toela keau Iesu namihai avoe, “No hanavege noeabuna ovoe uvue tai.” Ige Iesuu loui avoe, “Teve.” ³³Kateai louge munanae toelaeau malaha ke halevai ovoe uvue deluhovolu. Ige ovoeau detuluvisi tialeau seika vuvegevei tabu balugamo biloluvisi e isi haluvilu. ³⁴Ige ovo nibievemale keau vaveve ke elehai detuluvisi tialeau humaha tavae ata namigevei tialeau oe ata bahata namigevelu. ³⁵Ige ata bahataeau vaveve ke elehaho Iesue loholu. Lohoge malaha nehe au munanae toela avuemo nunuveale keu ogoe dua vai tilogoholisito momoleai Iesu veloe heimo ugulamoi ua. Ige abu ke elehai tetelahalu. ³⁶Ige vaveve ke elehale keau tilogoe atau momoleale ke deiada loui oe ata haivelu. ³⁷⁻³⁸Ige Gelasene ata bahataeau Iesu namihai avoe, “Halei tenela.” Kosealemo keau vabu balugalu. Ige Iesuu boutimo biloai tiho vasege malaha nehe munanae toelau avuemo uoholiale keu Iesu namihai avoe, “Dana aiti tai.” Ige Iesuu keluai loui avoe, “Unela. ³⁹Isi hoilahai talive Dilavau aemo vaveve dua vale ke loui a oe ata bahata haivenela.” Kateige au halei tiale Iesuu vaveve dua avuemo vale ke loui au oe ata haivenu.

Diailosi mau hovelahanu.
(*Matiu 9.18-26; Maka 5.21-43*)

⁴⁰Ige Iesuu bouti mai e vaki moleve tige ata moagaeau hoesehavoho hemei uma. ⁴¹Ige Diue dubu nalimale kosive mole Diailosi keu lohoale Iesu veloe heimo kome bokoai vata bisi imihai avoe, “Lohoge nahi di oe tai.” ⁴²Au louale keu koseanu. Mave igaehameu vagana tuelo (12) kemo vavahaniale hatiho vama. Ige Iesuu malaha keti tisege ata moagaeau lohoale evilikahavolu.

⁴³Kateisege keate mole vavahanie toela male keu lohoale Iesu ogola holinu. Vavahanive keu koseanu. Vagana tuelo (12) kemo tahoe toelau uvuvemo lohoma. Iale keu dua valiho au moni bahata ata hoesegevemale kebiamo hatuito vavahanive keu sohu avuemo ua. ⁴⁴Iale keate keu ata moaga uvumo lohoaleu Iesu iae ogove ivila holinu. Ige solekavesite tahoe toelau avuemo

lohomale keu uoholinu. ⁴⁵Ige Iesuu loui avoe, “Oleike daela holinu.” Ige ata bahataeau loui avoe, “No hilokaholilu.” Ige esemuve mole Bitau loui avoe, “Kosive, ata moagatahoeau a evilikahavoale kemo nahi oleve kateai bae hilokai.” ⁴⁶Ige Iesuu loui avoe, “Di ata hoesegevemale vuvuneu daemo uoholige di hilokage ata moleu daela holinu.” ⁴⁷Ige keate keu huhuige Iesuu vaveveve ke hilokanu. Isi teteai lohoale Iesu veloe heimo dobai holumai ata bahatae nimo au deiada loui Iesu namihai avoe, “Di lohoale a ogola holige di vavahani keu uoholi seleveanu.” ⁴⁸Kateai louge Iesuu avuho loui avoe, “Di ma, a a uvu bahata mai daemo mamoi ke vage vavahani keu aemo uoholinu. Iale vahaehomo tenela.”

⁴⁹Kateai lousege Diailosi esemu moleu lohoale Diailosi namihai avoe, “A mau aike hatiale ainaho kosive keho louge au loholive.” ⁵⁰Isito Iesuu hoto ke evisi Diailosi namihai avoe, “Vabu hale. Ana a uvu mai daemo mamoge a mana bae hovelahai.” ⁵¹Ige abu tialeu oe velehovoge Iesuu louge ataeau oe uvue tioholilu. Isito Iesu, Bitu, Dioni, Diemisi isi ma ke neinave isi mamave kebia unahaeau o ke uvue tilu. ⁵²O ke uvue tisege ata bahataeau o kemo uale keau ma keho ninalahama. Ige Iesuu loui avoe, “Ninalaha halevave. Ma keu hatioholisito lahaike au ke vanu.” ⁵³Kateai louge abu bituhavoi hehavolu. Kosealemo abu hilokage ma keu hati seleveanu. ⁵⁴Isito Iesuu ma ke adala holisi loui avoe, “Maia, hovelahanela.” ⁵⁵Kateai louge ma ke munanau hoilahai lohoge au solekavesite hovelahanu. Ige Iesuu kebia namigeveve avoe, “Lovi mai omige au isi.” ⁵⁶Kateige mamave isi neinave keau ke elehai tetelahu. Ige Iesu abuho loui avoe, “Lainaho di vale ko loui ata namigevelive.”

Iesuu au esemu tuelo (12) hanavenu.

(Matiu 10.5-15; Maka 6.7-13)

9 ¹Vani mole Iesuu au esemu tuelo (12) hohavege abu lohoale igaetoasege au munanae tola nunuveveve vuvune ovei vavahanitebia hoesegeveveve vuvune keta ovenu. ²Isime hanavei loui avoe, “Talive ataeau Dilava adae vuvunemo uveve hoto ke loui ata haivei vavahaniamale kebia hoesegeveve.” ³Isi tota loui avoe, “La tiliege lainaho onobehame malelive. Mesoho bedoea, mogamoga, lovi, moni, dabae ogo lainaho bae kateale malelive. ⁴La o moleve tiliege ata moleu la malevei o hatuevege avuluvuta ovemo uve. Ilive la tiho valiege bae o ke halevai teve. ⁵Isito ata degomoleau laheho isiviholisi la malevei o hatueveholige o ke halevai anakaeabemo la veloe gogea sesilahave. Ige abuna la vaveve ke elehai kemo huhuai kosea, ‘Dilavana no aiogeveve.’” ⁶Kateai hoto ke lougeto esemuibeau halevai tialeu o igaegaela ata haivei tilu. Tiale hotoe dua loui ata haivei vavahanite kebia hoesegevema.

Elodiu Iesu vavevemo daudauanu.

(Matiu 14.1-12; Maka 6.14-29)

⁷Kateimalela Galilie kosive baluga Elodiu Iesu vaveve ke bahata evisi dolodoloanu. Kosealemo ata degomoleau loui avoe, “Mesoho

ata babatisogevemale Dioniu hatiale keike tota hovelahanu.” ⁸Isege degomoleau loui avoe, “Mesoho Ilaidiau hovelahanu.” Isege degomoleau loui avoe, “Mesoho subuta beloveta moleu hovelahanu.” ⁹Isito Elodiu loui avoe, “Di louge abu Dioni eno etulelu. Isito ata ole igaeike vaveve ko vama.” Isi katealemo vani baita isiviai ata ke elehai.

Valava ada mole isi huena abuita

(Matiu 14.13-21; Maka 6.30-44; Dioni 6.1-14)

¹⁰Iesu abostoloeau hoidevei lohoale abu vamale ke bahata loui Iesu namihalu. Ige Iesuu kebia holoevege abu unahaeau o mole Betesaidae tilu. ¹¹Keve tisege ata moagau ke evisi ehovei tilu. Ehovege Iesuu itumuholisito kebia hoesegevei ataeau Dilava adae vuvunemo uveve hoto ke loui haivei vavahanitebia hoesegevenu.

¹²Iniale vau dobasege Iesu esemu tuelo (12) keau lohoale Iesu namihai avoe, “Ata kobia iovege abu tai. Loviu uvesite matamaike ko. Iale abu talive bulue lovi malei abu oe ladevei.” ¹³Kateai louge Iesuu namigevei loui avoe, “La biaeau lovi ovege abu isi.” Ige abu namihai avoe, “Noeau valava ada mole isi huena abuita unahahameike ko. Iale a huhuige noeabuna oleve kateai lovi moaga ata kobiaho malei.” ¹⁴Kosealemoike abu hoto ke loulu. Malaha bahata keve uale keau moagataho vai taoseni (5,000). Ige Iesuu au esemu namigevei avoe, “Bahata namigevege abu vivti (50) vivtia iuguiavoi tai.” ¹⁵Ige esemuiabeau ke nahate loui ata namigevege ataeau ugulelevai lotilu. ¹⁶Ige Iesuu valava ada mole isi huena abuita nehe ke malei otogoe niai ke hoesehavoi vakoinata malei au esemu ovege abu malei ata kebia igaegaeai ovei lotilu. ¹⁷Ige ata ke bahataeau lovi ige uniabeau hanilahalu. Ige Iesu esemuiiau lovie sigu ke iuhai malei basiketi tuelomo (12) udage ililoholu.

Iesuu avoe, “Dau ole.”

(Matiu 16.13-19; Maka 8.27-29)

¹⁸Vani mole Iesu ahuveta Dilava imihasege esemuiabeau avue lohoge au abuhou loui avoe, “Ataeau huhuige dau ole.” ¹⁹Ige abu loui avoe, “Ata degomoleau a mai loui avoe, ‘Ata babatisogevemale Dioni keike ke.’ Isege degomoleau a mai loui avoe, ‘Ilaidiai ke.’ Isege degomoleau a mai loui avoe, ‘Subuta beloveta moleu hatiale munanave keike ke.’” ²⁰Ige Iesuu loui avoe, “Isege laeau huhuige dau ole.” Ige Bitau avuhou loui avoe, “A keu Keliso. Dilavau a hanavoale ke ailike.”

Iesuu au hativeve deiada lounu.

(Matiu 16.20-28; Maka 8.30-9.1)

²¹Kateai louge Iesuu isuta namigevei avoe, “Lainaho bae ke loui ata namigevelive. ²²Atae Esena bae vatetumu baluga malei. Oe kosive, dubu

nalimale kosive baluga isi Diue menaka loui haivemale ata keabuna bae kabebihavoi hamage auna hatisito vanie ni abuita igaetaeau uoholisege auna tota hovelahai.”

²³ Iesuu namigevei avoe, “La oleu daiti tiho vaniege au lako au isivi va halei au vatehani maleveve ke huhu haleito vani bahata di ehomagei. ²⁴ Iale olena au ebika unaha huhuaniege au bae ukolikoli malivebene. Isito olena au ebika huhuholisito di ivimo vatehani malei hatiniege auna ukolikoli mai. ²⁵ Isi olena vatae onobenobemo kunaite holisito Dilavaemo au uvu mamoholisito hatiniege auna oleve kateai ukolikoli mai. ²⁶ Isime oleuoleu di mati vai di hoto ke louliho isiviholige dana bae di lohomale kela di atagamo, di Mamae atagamo, anelu tumute atagamo lohoniege data ata kebia matigevei. ²⁷ Iale seleveta di la namigevege evive. La degomoleau kove uale keau bae haluvilivebene. Isito ataeau Dilava adae vuvunemo uveve ke elehaito bae haluvisi.

Mosese isi Ilaidia

(Matiu 17.1-8; Maka 9.2-8)

²⁸ Iesuu kateale louito bula igaeu uoholige au Bita, Dioni, isi Diemisi kebia holoevei abuhi tana mole balugae guliguliho tilu. ²⁹ Keve tiale guliguliassege Iesu ni keu nimoleanu. Ige ogoveu tae selevelanu. ³⁰ Ige ihunivesite Moseseu Ilaidiati avuluvuta hotohotoima. ³¹ Keau lohoale vavaeabe keu levolevoai ua. Keau Iesuluvuta au Dielusalemae hativeve hoto ke louma. Isi avoe, “A hativeve keu Dilava isivilike.” ³² Kateisege Bita isi haokuvuiabe keau ladeveale hovevevei Iesu ataga elehage malaha mole abuitaeau avuluvuta lavisi ua. ³³ Iniale malaha abuita keau Iesu halevai tisege Bitau Iesu namihai avoe, “Kosive, hoeseike no vai kove loholu. Iale noeabuna la nenita oe ese abuita igaeta hovevei. Ilive elike moleu ahoe. Moleu Moseseho. Isege moleu Ilaidiaho.” Keu hoto ke louito luleleholinu. ³⁴ Kateai lousege goeu dobai lohoale bamuevege Iesu esemuiau vabulahalu. ³⁵ Ige goe kemo hoto moleu lohoale loui avoe, “Di moi ke. Dailike ke ebagemanu. Iale hotove evive.” ³⁶ Hoto keu kateai uoholige Iesu igaeu lamisi ua. Ige Iesu esemuiau vani moaga abu elehale ke loui ata namigeveholilu.

Iesuu munanae toela nunuvanu.

(Matiu 17.14-18; Maka 9.14-27)

³⁷ Vavita abu tana ke halevai lohosege ata moagatahoeau Iesuluvuta belehovolu. ³⁸ Ige ata moagataho kebia vigomo malaha mole igaeu hovelahai baita Iesu hohavoi avoe, “No haivemale ata, di di mo igae mai lohoge elehanela. ³⁹ Vani igaegae munanae toelana avuemo lohosege auna dobai kekoai teteisege aivemo sabavena hahosihovogei. Vani moaga munanae toela kena kateai di mo ko aiohavogei. ⁴⁰ Ige di a esemu kebia

namigevege abu di mo hoesehavoveve keu abuemō anekianu.” ⁴¹ Kateai louge Iesuu abuhō loui avōe, “La uvu keau tolobe nimolealemoike la evieviholilu. Iale la huhuige dana vali vani moaga lahehi ui laheho loviai.” Kateai abuhō louito malaha ke namihai avōe, “A mo mai kove loho.” ⁴² Ige au mo mai lohosege munanae toelau move aiohavoge moveu dobai vatamo tobilakanu. Ige niveu vealuvilu. Kateisege Iesuu munanae toela iomai mo ke hoesehavoge au dua vanu. Ige Iesuu mai mamave ominu. ⁴³ Ige ata bahataeau Dilava vuvune ke elehai vikolahalu. Isime Iesuu onolenole vamale ke huhulahai Iesu hoesehavoma.

Iesuu tota au hativeve lounu.
(*Matiu 17.22-23; Maka 9.30-32*)

⁴⁴ Iesuu tota au esemuhō loui avōe, “Di aike hoto ko louge evive. Ataeabuna Atae Ese mai ata degomole ovege abuna hamage hatai.” ⁴⁵ Kateigeto Iesu esemuiāu hoto ke evisito Dilavau huhuihuhuiabe bamualemo ke ihu hilokaholilu. Abu isiviai Iesu belahai. Isito vabulahalemo belahaholilu.

Olena kosive holisi.
(*Matiu 18.1-5; Maka 9.33-40*)

⁴⁶ Iniale abu mole belagevei avōe, “Iesuna nahiemo ole ebagemage auna kosive baluga holisi.” ⁴⁷ Kateisege Iesuu huhuihuhuiabe hilokaime ese mole ese mai lohoale au vavamo mamonu. ⁴⁸ Isi abuhō loui avōe, “Olena di ivimo ese ko nahate mai o hatui hoesehavoniege daike au ke hoesehavonu. Isi Dilavau di hanavoale keta hoesehavonu. Iale la oleu au ebika etolemai eseese vaveve nahate vale kena bae kosive baluga holisi.”

⁴⁹ Ige Dioniu loui avōe, “No kosive, no malaha mole elehasege keu a ivimo munanae toela nunuvema. Ige no namihai kosea, ‘Halenela.’ Kosealemo keu a esemu holioholinu.” ⁵⁰ Ige Iesuu abuhō loui avōe, “Lainaho kelualive. Ata oleu kateale vale keu nahie aiogeveholisito nahie tetaeveike au ke vama.”

Samalia ataeau Iesuho isiviholilu.

⁵¹ Iesuu ehue tiveve vani keu vuguvuguanu. Ige au tiveve ke huhuaito halei Dielusalemae tinu. ⁵² Isi au esemu degomole hanavege abu ulila tiale Samalia ata namigevege abu Iesu hoesehavoho bevuai hemei uliho. ⁵³ Isito o ke biaeau isiviholilu Iesuu loholive abuhi uliho. Kosealemo abu hilokage Iesu keu Dielusalemae tima. ⁵⁴ Kateige Diemisi isi Dioni keau ke evisi Iesu namihai avōe, “Kosive, ana isiviage no Dilava imihage au vene hanavoge otogomo dobai lohoi ata kebia aiogevei.” ⁵⁵ Kateai louge Iesuu hoilahai keluevei namigevei avōe, “Lainaho kateale valive.” ⁵⁶ Kateai louito abuhi halevai o moleve tilu.

Iesu ehovaveve deiada

(Matiu 8.19-22)

⁵⁷Abu tiale humaha tavae tisege malaha moleu lohoale Iesu namihai avoe, “Ana oleva keve tige dana aiti tai.” ⁵⁸Ige Iesuu avuho loui avoe, “Seleveta ana isiviale daiti tai. Ovaeabuna abu aeamamo ladevegei. Ige uguiabuna abu hanidamo ladevegei. Isito Atae Eseu lahaweve o keu uoholinu.” ⁵⁹Kateai louito malaha mole namihai avoe, “Di ehomanela.” Isito malaha keu loui avoe, “Kosive, usege di vasohuta talive di mamau hatiale ke mai gulialito bae lohoi a ehomai.” ⁶⁰Ige Iesu loui avoe, “Halege nahi tisege haluviveve keau bae mole malevei gulievei. Isito lohoge nahi talive ataeau Dilava adae vuvunemo uveve hoto ke loui haivei.” ⁶¹Isege ata moleu Iesu namihai avoe, “Kosive, dana aiti tai. Iale di isiviai vasohuta talive di ese elegeveito bae lohoi.” ⁶²Ige Iesuu avuho loui avoe, “Oleuoleu di lovi kemo inuta tioholisito hoilahai au iae niale keu bae ataeau Dilava adae vuvunemo uveve hoto ke loui ata haivevemo negolivebene.”

Iesuu au esemu seveniti (70) hanavenu.

10 ¹Iesuu vaveve kateale vage uoholige ke iae au esemu seveniti (70) malevei isiviale abuibuiai hanavege keau vasohuta talive o bahata keve ata haivesege Iesuu bae gabie ehovei tai. ²Isi namigevei avoe, “Lovi moagaeau baelahalu. Isito lovi ke malei valahumo otoveveve ataeau moagaholilu. Iale bulu ke biageho guliguliage au lovi ke malei otoveveve ata hanavege abu lovive bahata malei otovei.” ³Isi tota loui avoe, “La keau mamoe ese nahate. Tobalu kebia vigomo di la hanavema. ⁴La tiho valiege lainaho moni, mogamoga isi tamakata matagevelive. Isi humahala tiliege atahi belehovoi abuhi nona halevave. ⁵Talive la o oletemo biloluviliege o kebia ata hoesegeveve. ⁶Ige abu la hoto evige la kebia hoesegeveale hoto abuho louale kena abuemo vuvuneai. Isito mesoho abu la hoto evioholige la kebia hoesegeveale keu bae abuemo vuvunealivebene. ⁷Abu la hoto mage lainaho bae o degomolebiatala vealuvilive. Isito o ke igae uvumo uve. Isime abu lovi onole laovege ke ive. Kosealemo la di lovi vale ke ibinahoi ke abu ke lovi laovelu. ⁸La o oleva keve tige ataeau la hoesegevei lovi laovege ke ive. ⁹Isi o kemo ata vavahaniteau uge kebia hoesegeveve. Isi namigevei kosea, ‘Ataeau Dilava adae vuvunemo uveve vaniu aike lohoma.’ ¹⁰Isito la o oleva keve tige abu la hoesegeveholige halevai talive o ke ivila lavisi bae abuho louve. ¹¹Namigevei loui kosea, ‘La oe vatau no veloe votomo uale ko noeabuna tota la omo sesilahai. Iale ko elehai huhulahave. Ataeau Dilava adae vuvunemo uveve hoto no mai lohoge la avuho isiviholilu.’ ¹²Iale kemo di la namigevei. Dilava kotae vaniu lohoge au vata ko aiohavomale vanila

keabuna bae vatehani malei. Subuta Sodoma ataeau maleale keu eseve. Isito keabuna bae vatehani baluga seleve malei.”

O degomoleau Iesu hoto evioholialea
(*Matiu 11.20-24*)

¹³ “Kolasini ata la nohovu. Isi Betesaida ata la nohovu. Vatehani balugana bae laemo lohoi. Kosealemo di laemo vikoe vaveve moaga vaveve la ke elehaito la vaveve toelamo hoideveholilu. Subuta Taea isi Saidoni keve di vaveve kateale vatebene abu ogo bukate hatui uti hohuvai uvulahai abu vaveve toela halevalu. Isito laeau kateholilu. ¹⁴ Iale Dilavana au kotae vanilla vatehani baluga laoveito Taea isi Saidoni ata kebia vatehani eseve ovei. ¹⁵ Isi Kabenumu ataea, di laheho louge evive. La keau isiviale la ebia tabagevei malei otogoe otovei. Isito di la namigevei. La keabuna veneu lahai hodovavesite keve tihatuve.”

¹⁶ Kateai louito au esemu namigevei avoe, “Olete abuna la hoto eviliege abuna di hotota evisi. Isito olete abuna la hoto hamaliege abuna di hotota hamai. Isi olete abuna di hoto hamaliege keabuna di hanavoale ke hotota hamai.”

Esemu sevenitiau (70) hoidevelu.

¹⁷ Iniale vani mole ata bahata seveniti (70) keau vahaeho balugata hoidevei lohoale Iesuho loui avoe, “No Kosive, no a ivimo munanae toela kebia namigevege abu no hoto evilu.” ¹⁸ Hoto kateale louge Iesuu namigevei avoe, “La vaveve kateale vage di elehage hatau nivolekale ke nahate Setene vuvuneu solekavesite uoholinu. ¹⁹ Di hoto evive. Di nego mai laoveni. Iale la bahoe Setene ke vuvuneu bae laemo negoalivebene. Iale la utee toela isi haeho kebiamo dage abu bae la uagevelivebene. Ige vaveve toelabeu bae la aiogevelivebene. ²⁰ Lainaho munanae toelaebu la hoto eviale kemo vahaehoalive. Isito otogoe la iviu uale kemo bae vahaeholahave.”

Iesuu vahaehoanu.
(*Matiu 11.25-27; 13.16-17*)

²¹ Kateimale vanilla Munana Tumuteu Iesu mai vahaehotige au vahaeho baluganu. Isi loui avoe, “Di Mama, au otogota vatata Kosive. A a lulele malei luleleholiale kebia ovenu. Isito vatae ataeau abu ebika tabagevei kemo luleleage a lulele malei kebia oveholinu. Di Mama, a kateale vale keu a isivilike. Katealemo di a hoesehavoma.”

²² Kateai louito ata namigevei avoe, “Di Mamau onobenobe bahata daonu. Ige ataeau Moveta Mamaveta hilokaholilu. Isito Mamave igaeike au Mo hiloka seleveanu. Ige Move igaeike au Mama hiloka seleveai isivive ata tabagevei lulele ovege abu Mamave hilokalu.”

²³Hoto kateale louge uoholige au esemu unahaho loui avoe, “Laeau hoeselahu. Kosealemo onobenobe bahata di vamale ke la elehalu. ²⁴Isito di la namigevege evive. Subuta beloveta isi vatae kosive keau isiviale la elehale ke nahate elehai. Isito abu elehaholilu. Isi abu isiviale la eviale ke nahate abuta evisi. Isito abu ke eviholilu.”

Samalia malaha duae deiada

²⁵Kateige menaka haivemale malaha moleu hovelahai isiviale Iesu lobohavoi. Isi namihai avoe, “No haivemale ata, dana onole vai bae ukolikoli mai.” ²⁶Ige Iesuu namihai avoe, “Bukae Hotou hisaiale kemo a hoto oleteale dodavenu.” ²⁷Ige malaha keu namihai avoe, “A uvu bahata, a isivi bahata, a nego bahata, isi a lulele bahata malei a Kosive baluga Dilava omisi hoesehavonela. Isi a a ebika hoesehavoale ke nahate a haokuvu kebiata isivi ovei hoesegevenela.” ²⁸Ige Iesuu avuho loui avoe, “A hoto keu inutolotoloale ke nahate vaimae bae ukolikoli manela.”

²⁹Ige malaha keu ata tedaeveliho isiviholialelua Iesu hoto ke evisi loui avoe, “Di haokaike ole.” ³⁰Ige Iesuu malaha ke namihai loui avoe, “Malaha moleu Dielusalema halei Dielikoe tisege laskoloe ataeau humaha tavae evudei ogove dikohai hamai ehalovage au nibedai lahai ua. ³¹Lahai usege Diue dubu nalimale ata moleu humaha nehe kela tiniale malaha nehe abu hamai mai humaha vavae ehalovale ke elehai aehai halei tinu. ³²Ige Livai malaha moleu humaha nehe ke igaela tinu. Keve tiniale malaha nehe ke elehaito aehai tinu. ³³Ige Samalia ata moleu humaha kela tinu. Malaha keu Diue ata holioholinu. Isito keu tiale malaha nehe ke elehai avuho uvuanu. ³⁴Isime tiale abu hamale ke ohe hoesegevei mulamulai vilianu. Isi malaha ke ebagemai mai au ovoo golomo mamoi avuti tiliale ladevemale o moleve tilu. Isi vavi kemo hoesehavoi avuti ua. ³⁵Iniale vavita hovelahai mune bai baluga malei o ke nalimale malaha omisi namihai avoe, ‘Ko mai malaha ke nalisi hoesehavonela. Ilive vani mole di tota hoilahai loholive a avuemo vaesute hatuale ke dana bae tota aoi.’” ³⁶Deiada kateale louge uoholige au malaha ke namihai avoe, “A huhuige malaha abuita igaeta kebia vigomo oleteu abu malaha nehe hamale keti haokanu.” ³⁷Ige malaha keu Iesu namihai avoe, “Avuho uvuai hoesehavoale ata ke.” Ige Iesuu avuho loui avoe, “Seleveike. Iale ata talive ke nahate vanela.”

Iesuu abui tatatie dei ai tinu.

³⁸Iesuu hoto kateale louge uoholige au esemu holoevei tialeau keate mole ivi Mata ke oe tige au malevei o hatuevenu. ³⁹Isege hohove Meli keu o kemo ua. Iale Iesuu hoto lousege hohoveu velove heimo ugulamoi ui hotove ke gaeahavoma. ⁴⁰Isege Matau ahuvela lovi vanata Meliho itumuai lohoaleu Iesu namihai avoe, “Kosive, a huhuige di hohou di

tedahoholisito keve ugulamoi uge kena duave. Ana vali iomage au loholive di tedahoi.” ⁴¹ Kateai louge Iesuu namihai avoe, “Mata, a keu unie hani huhu baluganu. Isi a kemo huhuihuhuibe ni mole vanu. ⁴² Isito di hotoe dua eviveve keu baluga. Iale Meliu vaveve keho isiviai vanu. Iale atabeu bae vaveve ke avuemo malivebene.”

Iesuu guliguli au esemu haivenu.

(Matiu 6.9-13; 7.7-11)

11 ¹ Vani mole Iesuu matama moleve tiniale au Mama imihaniale uoholisege esemuve moleu avuho loui avoe, “Kosive, guliguliaveve humaha no haive. Dioniu au esemu haiveale ke nahate ata no haivenela.” ² Ige Iesuu abuho loui avoe, “Noinoi ko nahate louve. No Mama, no isiviale ata bahataeau a ivie tumu hoesehavoge. Ilive a matamae dogau lohoge duave. ³ Isi vani igaegea no isivie lovi ke noevegenela. ⁴ Ige ata oleteau noemo vaveve toela vage no vaveveabe toela ke huhuoholige ata no vaveve toela ulihai huhuoholi. Isi ainaho no halevesege no Setene lobomo dobuluvilive.”

⁵ Guligulie hoto ke loui haiveito kemo hoto mole abuho lounu. Isi loui avoe, “Mesoho la moleu vavie minamo au haoka oe tiniege namihai kosea, ‘Aemo lovibe abuita igaetaeau uge daonela. ⁶ Di haoka moleu oai lohoale di oe velemanu. Ige daemo lovibehameu uoholinu.’ ⁷ Ige mesoho auna aho loui kosea, ‘Ainaho di nita huegelive. Di udaha bamui di ese holoevei abuhi aike ladevema. Iale di bae hovelahai lovibe aolivebene.’ ⁸ A haokana hoto kateale louge ana osioi. Isito di laheho louge evive. A haokave holialemo au bae hovelahai lovi aolivebene. Isito ana matiholisito negobedai udahavemo hamai imihalage auna bae lovi aoi. ⁹ Iale di laheho louge evive. Lana Dilava imihage auna la isivi ke laovei. Isi lana ono mole kaovaliege bae mave. Isi lana udaha hamage auna bae laheho alavoi. ¹⁰ Kosealemo oleuoleu onoleho Dilava imihage auna isiviabe ke ovei. Isi oleuoleu ono mole kaovale ke abuna mai. Isi oleuoleu udaha hamage auna abuho alavoi. ¹¹ La olena eseveu huenaho imihage auna vali ute mai omisi. ¹² Isi mesoho auna ugue uniho isiviage auna vali haeho mai omisi. Ba, keu anakianu. Lana isiviabe mai oveve. ¹³ Laeau vaveve toela vamale ataea. Isito laeau la ese kebia hoesegeveve isiviabe ke oveveve ke hilokalu. Iale ke nahate lana la Mamau otogoe umale ke imihage auna la vaveve evihai Munana Tumute laovei.”

Iesu isi Setene

(Matiu 12.22-30; Maka 3.20-27)

¹⁴ Iesuu malaha mole uvute kemo munanae toela nunuvanu. Munanae toela keu avuemo uge keu hotoholinu. Isito munanae toelau uholige malaha keu bae hotoai hoto louge ataeau ke elehai vikolahalu. ¹⁵ Isito ata degomoleau

ke elehai loui avoe, “Munanae toelae kosive Biesabolo ke vuvunemoike Iesuu munanae toela kebia nunuvema.” ¹⁶Ige ata degomoleau lobohavoi namihai avoe, “Bato, vavevebe negote otogomo vanela. Ige no bae ke elehai hilokai kosea, ‘Dilavaike a hanavonu.’” ¹⁷Kateai lousege Iesuu huhuihuhuiabe hilokaime abuhou loui avoe, “Vata igaemo ataeau mole tasalievei molehi mole haveliege abu bae ui egealivebene. Isi valada igaeau mole tasalievei molehi mole haveliege abu bae ui egealivebene. Abuna katelahaliege solekai uoholisi. ¹⁸Iale ke nahate Setene ataeabuna mole tasalievei molehi mole haveliege abuna oleve kateai. Keu anakianu. La loui kosea, ‘Seteneike au vuvune daoge di munanae toela kebia nunuvema.’ Isito di ke vuvunemo kebia nunuveholima. ¹⁹Dana kateai Setene vuvunemo munanae toela nunuvege la esemu abuna ole vuvunemo munanae toela kebia nunuvei. Iale lana la esemu belagevege abuna loui kosea, ‘Dilava vuvunemoike no kebia nunuvema.’ ²⁰Ige data Dilava vuvunemoike munanae toela kebia nunuvema. Kateige lana ke elehai hilokage Dilava matamae doge ke vuvuneu laemo lohonu.

²¹“Ata negotena au soe mai bi mai au o nibige ove kunai keabuna ue dua vai. ²²Isito ata negote selevena lohoniege ovemo velemai hamai soeveta biveta malei ove kunai malei tai. Dovudovue hoto kemo la hilokage di negoai Setene aiahavoi atave nunuvema.

²³“Iale ata oleuoleu di tedahoholimale keau di aiahavomale ataeabulike. Isi oleuoleu ata maleveveve kemo di tedahoholiale keau ata kebia nunuvema.”

Munanae toelaeau hoidevelu.

(Matiu 12.43-45)

²⁴“Di hoto mole louge evive. Munanae toelana ata mole halei tiniege eu uvesiteve uveve matama kaovai. Isito uveve matamabeu uoholige auna huhuai kosea, ‘Dana hoilalahi di subuta uale kemo ui.’ ²⁵Kateaime hoilalahi lohoniege ata nehe ke elehage au au uvu hoesehavoge onobenobe toelau avuemo uoholinu. ²⁶Ige auna tota hoilalahi tiniege munanae toela seveniau (7) vuvune balugale kebia holoevei abuhi lohoniege ata nehe kemo deluhovoi. Ige ata kena toela seleveai. Kosealemo subuta munanae toela igaeu avuemo ua. Isito gabie munanae toela eiti (8) keau avuemo ua.”

²⁷Iesuu kateai louge keate moleu ata moaga kebia vigomo hovelahai Iesuho loui avoe, “A mamoi a amumale keate ke vahaehou baluga.”

²⁸Ige Iesuu avuhou loui avoe, “Ito. Isito ataeau Dilava hoto evilike vaime vahaeho balugatahoalu.”

Ataeau isiviai vikoe vaveve elehai.

(Matiu 12.38-42)

²⁹Ige ataeau bahata mole bevievei igaetoai Iesu evilikahavosege Iesuu namigevei avoe, “Novae ata la koeau atae toelaea. La di belahai

isiviale di vikoe vaveve vai. Isito di bae la louale ke valivebene. Isito dana beloveta mole Dionau vale ke nahate dana data vai. ³⁰Subuta beloveta Dionau vani abuita igaeta huena baluga uvue uge Niniva ataeau ke elehai hilokage Dilavau Diona hanavonu. Ige novae vani komo Atae Esena ataemo vaveve ke nahate vai. ³¹Iale Dilava kotae vani kela vata mole kuini Siba kena hovelahai la vaveve toela ke laemo loui. Keate keu haeavamoleve Solomonu luleleai ata haivemale ke elehaho lohonu. Isito di louge evive. Ata moleu Solomonu ke evihale keike ko la vigomo ua. Isito laeau hotove evioholilu. ³²Iale vani kela Niniva ata kebiataeabuna bae hoveveve la vaveve toela ke laemo loui. Kosealemo Dionau kebia haivege abu evisi abu vaveve toela halevalu. Isito di hoto ko louge evive. Ata moleu Diona ke evihale keike ko la vigomo ua. Isito laeau hotove evioholilu.”

Vavae ataga
(*Matiu 5.15; 6.22-23*)

³³“Atabeu bae lameba hanei mai batabatae valae mahogovalivebene. Isito auna hanei mai batabata golomo mamoge elike ataeau oe uvue loholive atagavemo ui. ³⁴La ni keau la vavamo lameba nahate. La nina dua vage la uvuna atagai. Isito la niabuna toelage la uvuna loi. ³⁵Iale huhutumuaive. Onoilage atagau la uvumo uale keu loama. ³⁶Isito la uvu bahatamo atagau uge behameu bae loalivebene. Isito lamebau atagale ke nahate auna ataga seleveai ui.”

Iesuu ada totoholinu.
(*Matiu 23.1-36; Maka 12.38-40*)

³⁷Iesuu hoto kateale louge uoholige Balisia ata moleu namihai isiviale au avuti lovi isi. Ige Iesuu ove uvue tiniale avuti ugulamoi lovi inu. ³⁸Keu ada totoholisito avuti lovi ige Balisia ata keu ke elehai vikoanu. ³⁹Ige Iesuu avuho loui avoe, “Balisia ata la vaveve keau abu melegita kabutae vava totoaito uvuve totoholiale ke nahate. Ataeau la vava elehage keu duave. Isito la uvu kemo huhuihuhuie toela moagaeau uge la mole kunaiho isivilahama. ⁴⁰La keau Dilava vaveve kemo luleleholilu. Dilavau isiviale la la uvuta la vavata hoesegevei. ⁴¹Iale la uvuu duavealemo lana kunaiholimale kebia tedaevege la vavevena duaveai.

⁴²“Isito lana kateholige Balisia ata, la nohovu. Laeau la bulue lovi ke bahatamo taidi vaito ata hoesegeveholisi Dilava huhuoholilu. La taidi vale keu duave. Isito ata hoesegeveholisi Dilavata huhuoholiale keu toelanu.

⁴³“Iale Balisia ata la nohovu. La keau isivialeike dubue uvue talive vomue duamo uguiavogeti. Isi isivialeike talive ata moagaeau umale keve olahai tige abu la elegevei la hoesegevei. ⁴⁴Iale la nohovu. La keau alue

vuta nahate. Ataeau golovela tai lohoito hilokaholilu. Abu huhuai kosea, ‘Mesoho matama duaiki ko.’ Isito vata ke uvue ataeau sakavaleike ua.”

⁴⁵ Kateai louge Diue menaka loui haivemale ata moleu lamisi avuho loui avoe, “Kosive, a hoto kateale louale keu notaike a ke aiogevenu.” ⁴⁶ Ige Iesuu loui avoe, “Menaka haivemale lata la nohovu. Laeau la menaka moaga loui ata haivema. La kebia haiveito tediaeholige abu unaha ke vage keu abuemio isuanu. ⁴⁷ Iale la nohovu. Subuta la buluveau Dilava beloveta haveale kebia vuta laeau nova kaeagevei huhuai kosea, ‘No beloveta kebia hoesegevevema.’ ⁴⁸ La vaveve kateimalemoike la buluvehi mole nahate. Kosealemo la buluveau beloveta kebia havege haluvilu. Ige la kebia vuta kaeagevei hoesegeveale kemo la la buluvehi huhuihuhui igaealu. ⁴⁹ Katealemo Dilavau subuta au lulelemo hoto mole lounu. Isi avoe, ‘Dana beloveta isi di hoto loumale ata degomole hanavege abuna ata kebia haiveho tige ataeabuna degomole havei degomole aiogevege abuna vatetumu malei.’ ⁵⁰ Dilavau hoto kateale loualelua novae atate abuna vatehani malei. Kosealemo Dilavau vata vasege ke iae la buluveau beloveta moagamoaga havelu. Ige laeau la buluvehi vaveve igaealu. ⁵¹ Abu vasohuta Eibolo hamalu. Isi kemo lavisi beloveta havei loholata gabivela Sekalaia hamalu. Ke abu dubuta mune vitaleta vigo hamage au hatinu. Iale di la namigevei. Katealemo Dilavana vatetumu baluga novae atate la kebia ovi.

⁵² “Iale menaka haivemale ata la nohovu. La lulele umuka mahogovai ataemo hoto seleve vovoholu. Katealemoike la isiviholilu Dilava hoto eviliho. Isime ata bamuevei isiviholilu abu Dilava hoto eviliho.”

⁵³⁻⁵⁴ Kateai louito halei tisege Diue menaka loui haivemale isi Balisia ata keau itumulahai Iesu lobohavoi isiviale au hotoeabe kemo dobage abu mai hamai.

Balisia ata nibieve tumuave.

(Matiu 10.26-27)

12 ¹ Abu katelahasege ata moagataho seleve keau lohoale molemo neniholisi molemo dai loholu. Ige Iesuu vasohuta au esemu namigevei avoe, “Balisia ata kebia nibieve dua vave. Kebia vavau duave. Isito uvuiabe keau toelalu. Katealemo kebia nibieve tumuave. ² Abu vaveve toela vai mahogovamale keabuna bae umidamo ui. Ige abu hotoe toela loui mahogovamale kebiataeabuna bae umidamo ui. ³ Iale la onole vavimo mahogovai loumale ke ataeabuna bae vanimo evisi. Isi oe uvue mulumuluamale keta abuna bae ologomo holahai baita louge ata bahataeabuna evisi.”

Nahi ole vabuhavoi.

(Matiu 10.28-31)

⁴ “Di haokuvuia, di laheho louge evive. Lainaho ata havemale kebia vabugevelive. Keabuna vava unaha haveito abu bae munana

havelivebene. ⁵Isito di la haivei. Dilava igae vabuhavove. Auna au vuvunemo ata havei malevei veneu lahai hodovavesite keve hatuevei.

⁶⁻⁷“Isito au bae laemo kateale valivebene. Laeau Dilava nimo baluga. Abu ugue ese ada mole malevei voievege ibinaeabena benie kina abuita. Keu ibina baluga holioholinu. Isito Dilavau kebia igaegae nibievema. Isi keu la igaegae kinaenumu ke bahata dodavei hilokaevenu. Iale lainaho vabulahagelive. Ugueau Dilava nimo eseve. Isito laeau nivemo baluga.”

Iesu ivi loui ata haiveveve

(Matiu 10.32-33; 12.32; 10.19-20)

⁸“Di la namigevege evive. Oleuoleu atae vigomo loui kosea, ‘Dau Iesu ata dailike ko.’ Ige dana data Dilava anelu kebia vudimo loui kosea, ‘Keu di atalike.’ ⁹Isito oleuoleu atae vigomo loui kosea, ‘Dau Iesu ke hilokaholinu.’ Ige dana data Dilava anelu kebia vudimo loui kosea, ‘Di ata ke hilokaholinu.’

¹⁰“Iale oleuoleu hotoe toela loui di aiahavoge Dilavana toelave ke ulihai. Isito oleuoleu hotoe toela loui Munana Tumute ke aiahavoge Dilavau bae toelave ke ulihalivebene.

¹¹“Ige abu la malevei dubue kosive biae kotaho tige lainaho gasigasiai vabulahalive. Isi mesoho abu la malevei gamanie kosivemo kotaho tige lainaho la hoto louveve ke huhulahalive. ¹²Kosealemo vani kela Munana Tumutena bae la hoto louveve ke la haivege bae louve.”

Kunaite ata luleleholiale

¹³Au kateai loui au esemu namigevesege ata moaga kebia vigomo ata moleu hoai loui avoe, “Kosive, no mamau hatialelua di nana namihage au di mamae kunai tasaliai degomole dao.” ¹⁴Ige Iesuu namihai loui avoe, “Ba, di bae la avutie vaveve ke kaovai kunai ke tasialilivebene.” ¹⁵Kateai louito namigevei avoe, “Loboe vaveve vamale kebiamo la ebika nenigeveve. Lainaho kunai kebia huhueve moagalive. Kosealemo lana la kunai moaga huhueveliege bae uveve dua seleve valivebene.” ¹⁶Iesuu hoto ke loui kemo dovudovue hoto mole loui haivei avoe, “Malaha mole kunai moagate ke vatau duave. Iale keu kemo lovi haevege lovive bahata keau holoeavo dua valu. ¹⁷Iale malaha ke valahuu tobalohoge keu huhuai avoe, ‘Dana onole vai. Dana oleve kateai di lovi otovei.’ ¹⁸Isi huhuai avoe, ‘Di koseige duave. Di di valahu kobia koieveli balugataho unaha houevei. Ilive elike kebiamo di lovi di kunai otovege abu dua vai. ¹⁹Dana kateale vaniege di ebia hoesehavoi ue dua vai. Ilive vagana moaga kemo teigeve unaha isi vahaehoai ugei.’ ²⁰Malaha keu vaveve kateale huhuisege Dilavau avuho loui avoe, ‘A keu luleleholinu. Iale ana novae vavi komo hatinela. Isege ataeabuna bae a lovi nehe bevuevei otovemale ke bahata malei.’ ” ²¹Iesuu hoto kateale louito ke ihu loui ata namigevei avoe,

“Oleuoleu Dilava kunai huhuholisito vatae kunai huhulahai abu omo otovemale keau malaha nehe ke nahate.”

Dilava igae huhulahave.

(Matuu 6.19-34)

²² Iesuu kateai louito au esemu namigevei avoe, “Katealemoike di laheho loui kosea, ‘Lainaho la iveve isi ogo vaveve kebia huhu balugagelive.’ ²³ Kosealemo nahie uveve keu lovi iveve ke evihanu. Isi la uveve keu ogo hatueveve keta evihanu. ²⁴ Ugu kebia elegeveve. Keau bululahai valahu houi avuemo lovi lovoi otoveholima. Isito Dilavau kebia nibievei lovi ovema. Iale laeau kebia evigeveale kemo Dilavana la tedaeve dua vai. ²⁵ La oleu au uveve ke huhu moaganiege auna oleve kateai au uveve vagana ke mai egetisi. Katealiveu anakianu. ²⁶ Vaveve esehame keu laemo anakiasage la osiohoike onobenobe kebia huhueve moagama. ²⁷ Isi botoe valavalaeau ulimale vaveveabe kebia elegeveve. Keau lovilahai ogo vaeveholima. Isito di la namigevege evive. Solomoni keu kunai moagate. Isi keu ogoe dua vama. Isito ogoe dua keau valavalae dua kebia evigeveholilu. Iale Dilavau kaeagevei nibieve dua vamale kemo la hilokage auna lata nibieve dua vai. ²⁸ Valavala keabuna nova uito nivu tutukai gililahage ataeabuna bevievei mahoevege keabuna uoholisi. Isito Dilavau gadegevei nalieveale ke nahate auna la nalievei ogo laovei. Seleveta auna laheho kateale vai. Isito la evievi keu esevhameanu. ²⁹ Iale lainaho lovita eta iveve kemo huhu moagagelive. ³⁰ Evieviholimale ata keabulike vatae onobenobe huhu moagama. Isito la Mamau otogoe umale keu laemo onoleu uoholiale ke hilokanu. Iale auna ke laovei. ³¹ Iale lana vasohuta Dilava matamae doge ke humaha kaovai isivive vage auna onobenobe kebia bahata laovei.

³² “Iale di esea, lainaho vabulahalive. Laeau moaga holioholilu. Isito Dilavau au isivimo la hoesegeveale laeabuna bae adave vuvunemo uve. ³³ Iale la kunai ke malei voievei moni ke malei kunaiholimale kebia oveve. Lana kateale vage otogoe la mogamogana tobalohoi ui. Ige keve la kunaina balugage ataeau bae vavoloalibene. Isege segeleu bae bohilivebene. ³⁴ Iale vani bahata la kunai umale keve la uvuna ugei.”

Esemue dua isi esemue toela

³⁵⁻³⁶ “Di hoto mole louge evive. Esemuiabu ogo vai abu lameba hanei abu kosive hemei umale ke nahate la vaveve hoesegevei la kosive hemei uve. Kosealemo kosiveabeu abu mole holoeveale keve tiale hoilahai lohoma. Iale auna lohoniege udaha hamage abuna solekavesite avuho udaha alavoi. ³⁷ Esemuiabe keau abu vaveve gadehavoi nita hemei ualemo kosiabe kena lohoniege velemai elegevege abuna vahaeholahai. Ige kosiveabena namigevege abuna uguiavosege auna au ogo vukai

tiniege abuho vasiai ovege abuna isi. ³⁸Mesoho auna vavie vigomo o vae alalamita lohoge esemuiabe keabuna nita uliege elehai vahaeholahai. ³⁹Katealemo ko huhulahave. Mesoho oe biageu vavoloe atau lohoveve vani ke auna hilokai nita uniege vavoloe ata keu bae ovemo vavoloalivebene. ⁴⁰Iale lata nita uve. Kosealemo Atae Eseu lohoveve vani ke lana hilokaholisege auna bae lohoi.”

Evievite isi evieviholiale esemu
(*Matiu 24.45-51*)

⁴¹Au kateai louge Bitau namihai loui avoe, “Kosive, ana no unahahoike ke louma. Emena ata kobiatahoike a ke louma.” ⁴²Ige Iesuu avuho loui avoe, “Oleuoleu evievi ata holisi kemo lulelelahale kebiahoike di ke lounu. Iale balugavena abuho louge abuna ove ke nalisi bae esemu degomoleta nalievei lovi ovegei. ⁴³Isege kosivevena tiniege tota hoilalahai lohoniege esemuveu lovie dua vale ke elehai vahaehove vai. ⁴⁴Iale seleveta di la namigevena. Kosivevena au esemu ke ebagemage kena kunaive bahata nalievei. ⁴⁵Isito kosivevena haeavamole tige esemuvena huhuai kosea, ‘Keu bae solekai loholivebene.’ Isi kateai au kosive esemu degomole havei lovi baluga isi e toela ige kinavena luleleholisi. ⁴⁶Iniege vani mole kosiveveu lohoveve ke hilokaholisege auna lohoniege esemu ke elehai hamai lovive kemo iomage auna tiniege evievi ata holioholiale kebiahi ui.

⁴⁷“Keu kosive ke isivi hilokanu. Isito isiviholinu ke valiho. Katealemo auna bae vatehani baluga malei. ⁴⁸Isito esemu olena au kosive isivi hilokaholisisito vaveve toela vaniege auna vatehani esehame malei. Kosealemo Dilavau lulele isi vuvune baluga ata olete bia oveime isiviale keau abuta kemo lovi baluga vai. Isito lulele isi vuvune eseve ata olete bia oveime isiviale keau kemo lovi eseve vai.”

Abu Iesu vavevemo mole tasalievevu.
(*Matiu 10.34-36*)

⁴⁹Iesuu tota loui avoe, “Dana lohoniege vata ko mahoi aiohavoi. Isito di isiviale aike vene ke beige au lahai. ⁵⁰Gabie dana babatiso ni molete vai. Iale di isiviale vatehani ke solekai mage au uoholisi. ⁵¹Iale la huhuige ataeau molehi ue dua valihonike di vatae lohonu. Ba, di kateho lohoholinu. Isito ataeau mole tasalievehoike di kove lohonu. ⁵²Iale novae vani komo ese bahata ada mole keabuna mole tasalievei. Abuita igaeta keabuna ivi mole. Isege abuita keabuna ivi mole. Moleabuna di ata holisege moleabuna di aiohavoi. ⁵³Iale mamuvu abuna abu ese aiogevesege eseabe abuna abuta abu mamuvu aiogevesege neinuvi abuna abu ese aiogevesege eseabe abuna abuta abu neinuvi aiogevei. Isege maivu abuna abu maivu aiogevesege maivuabe abuna abuta abu maivu aiogevei.”

Vanie vaveve elehai lulelelahai.

(Matiu 16.2-3)

⁵⁴Iesuu kateai au esemuho louito ata bahata namigevei avoe, “La vaveve keu koseanu. Lana vaniu dobamale keve elehage goeu lohoge lana loui kosea, ‘Venina lohoi.’ Ige auna lohoi. ⁵⁵Isi lana elehage helukana seloeatae lohoge lana loui kosea, ‘Vanina vuvuneai.’ Ige auna vuvuneai. ⁵⁶Isito laeau loboe ataea. La vata elehai otogo elehai lulelelahalu. Isito laeau aike laemo lohoveve ke hilokaholilu.”

La bahoe hoesehavoveve deiada

(Matiu 5.25-26)

⁵⁷“Osiohoike laeau la ebika hoesegevei vaveve dua kaovaholilu. ⁵⁸Iale mesoho malaha moleu isiviale la malevei kotaho tige vasohuta avuti igaetoai la vaveve ke kaovai hoesehavove. Iale lana kateale vaholige la bahoena la malevei kotamale atae tai. Ige kotae ata kena la malevei bukate ovege abuna la malevei dibulae hanavei. ⁵⁹Iale di la namigevei. Laeabuna dibulae ulige ke ibina vahatugeto abuna bae la iovei.”

Vaveve toela halevaveve

13 ¹Kateimale vanila ata degomoleau deiada mole loui Iesu namihalu. Deiada keu koseanu. Vani mole Galili ata degomoleau ovo havei mahoi Dilava hoesehavosege gamanie kosive Bailoti esemuiau ata kebia havege abu haluvilu. ²Ige Iesuu deiada ke evisi namigevei avoe, “La huhuige kosive keu kebia haveale vaveveabe toela kena Galili ata degomole kebia toela evigevenu. ³Ba, di la namigevei. La huhuige keau vaveve toela vamale ataea. Isito laeau mole nahate. Lana la vaveve toela halevaholilige lana lata haluvive. ⁴Ige subuta Dielusalemae o mole egetana ivi Salomu keu bokolahai dobai ata eitini (18) havege abu haluvilu. Iale la huhuige haluviale keau Dielusalema ata degomolebia vaveve toela evigevelu. ⁵Ba, di la namigevei. Mesoho lana la vaveve toela halevaholilige lana lata haluvive.”

Idimo dovudovue hoto mole

⁶Iesuu kateai louito kemo dovudovue hoto mole loui haivei avoe, “Malaha mole bulue uvumo idi mole ivi vigi keu kemo laminu. Iale malaha keu tiale idi ke adamo niage baioholinu. ⁷Ige au bulumo loviamale ke namihai loui avoe, ‘Vagana abuita igaeta di idi ko adamo niage keu baioholinu. Iale heinela. Keu vata komo lamisito hahumaholige keu toelanu. Idi keu uoholige mole duana kove ulisi.’ ⁸Ige esemuve keu namihai avoe, ‘Kosive, halege au vagana ko igaemo ui. Isege di bae vata bisi momoluta bisi malei umukave omisi. ⁹Ige au gabie vaganamo baiage keu duave. Isito au baioholige nahi bae heisi.’ ”

Iesuu bulamo keate mole hoesehavonu.

¹⁰Iesuu hoto kateale tovetove lounu. Iniale bula molemo tiniale Diue dubue ata haivema. ¹¹Isege dubu ke uvue keate mole munanae toelau avuemo biloale keu keve ua. Vagana eitini (18) ke uvumo munanae toela keu keate keti uale vavahaniage inuveu keukanu. Ige au inuta lamiholisito holumai oima. ¹²Ige Iesuu keate ke elehai hohavoi avoe, “Ei, nova a vavahani keu aemo uoholinu.” ¹³Isi au ada mai tatavemo mamoge solekavesite inuve nehe keu inutolotoloige au inuta lamisi Dilava hoesehavonu. ¹⁴Keate keu kateige dubue kosive keu itumuanu. Kosealemo Iesuu bulamo keate ke hoesehavonu. Ige kosive keu ata namigevei loui avoe, “Vanie ni bahata ada mole isi igae ke uvumo nahi lovilahai dubue loholive vavahanite kebia hoesegevegei. Isito bulamo vavahanite kebia hoesegeve halevave.” ¹⁵Kateai louge Iesuu avuho loui avoe, “Loboe ataea. Ataeau la vaveve elehage duave. Isito la uvu keu toelanu. Iale di louge evive. La keau bulala la ovo vavegevei malei ebavae e oveho timale kemo la ovo kebia hoesegevema. ¹⁶Isito la isiviholialeike di bulamo Ebalahamu valada ko hoesehavoliho. Setene keu vagana eitini (18) ke uvumo keate ko aiohavoge keu toelai ua. Iale la huhuige dana bulamo hoesehavoge kena duave.” ¹⁷Kateai louge aiohavomale ataeau matilalahu. Isege ata bahataeau Iesuu vaveve dua vamale ke elehai vahaeholalahu.

Masitae ie deiada

(Matiu 13.31-32; Maka 4.30-32)

¹⁸Ige Iesuu kebia namigevei avoe, “Ataeau Dilava adae vuvunemo uveve kemo dana dovudovue hoto oleteale louge lana bae kemo lulelelahave. ¹⁹Ataeau Dilava adae uvumo uveve keu masitae i nahate. Masita ke iu esevehame. Isito lana ke sesilahage kena ulisi balugage uguiabuna loholiege adavemo hasolahai. Iale ataeau Dilava adae vuvunemo ui moagatahoai ue dua vaveve keu kateanu.”

Beikini baudae deiada

(Matiu 13.33)

²⁰Iesuu tota hoto mole abuhō lounu. Avoe, “Dana oleve kateai ataeau Dilava adae vuvunemo uveve ke laheho loui. Keu beikini bauda ke nahate. ²¹Keateabuna beikini bauda ke mai valavamo keiohai ebuehage kena valava ke mai balugatisi. Iale ataeau Dilava adae uvumo ui moagaveve keu ke nahate.”

Udahae ese

(Matiu 7.13-14, 21-23)

²²Iesuu kateai louito halevei Dielusalemae tinu. Isi keve timale humaha tavae o igaegaela ata haivei tima. ²³Ata haivei tisege ata mole igaue

avuho loui avoe, “Kosive, ata moagavesite unahaeabuna otogoe tai.” ²⁴Ige Iesuu ata bahata namigevei avoe, “Otogoe udaha keu esevehame. Ialelua negolahalive udaha kela velehovoi teve. Ata moagaeabuna isivilahai o ke uvue tai. Isito kena abuemo anekiai.

²⁵“Kosealemo o ke biagena hovelahai udaha ke bamui. Ige lana tiliege iave lavisi udaha hamihamiai loui kosea, ‘Kosive, noheho udaha alavo.’ Ige o ke biagena laheho loui kosea, ‘Di la hilokaevoholinu. La oleve keveike loholu.’ ²⁶Ige lana hotove ibina vai loui kosea, ‘Ba, noeau subuta aluvuta lovi isi e imale ata noeabulike ko. Isi no oe a no haivemale ata noeabulike ko.’ ²⁷Ige oe biagena tota loui kosea, ‘Di la namigevei. Di la hilokaevoholinu. La oleveike loholu. Laeau atae toela unaha. Iale tai di haliove.’ ²⁸Kena kateai laheho loue lana udahae iae ui uvulahai ninalahaima bae monomo hediavoge. Kosealemo Ebalahamu, Diekobo, Aisiki isi beloveta bahata keau Dilava matamae doge keve usegeto laeabuna heie uve. ²⁹Isege vaniu velemai dobamale keve isi vaki mole isi vaki mole keve ataeabuna loholiege Dilava matamae doge keve igaetoai uguiavoi lovi isi. ³⁰Ige kateimale vanila uli holiale keabuna gabi holisi. Isege gabi holiale keabuna uli holisi.”

Iesuu Dielusalemata obiaho huhuanu.

(Matiu 23.37-39)

³¹Iesuu kateale louniale uoholisege Balisia ata degomoleau lohoale avuho loui avoe, “O ko halei matama moleve tenela. Kosealemo gamani kosive Elodiu isiviale ahamoi.” ³²Ige Iesuu namigevei avoe, “Malaha keu ata lobogevemale mi mole veleki ke nahate. Iale talive ke namihai loui kosea, ‘Dau nova nivu vavahanite kebia hoesegevei degomolemo munanae toelau umale kebia nunuvema. Iale alamege dana Dielusalemata velemasege di lovi kona uoholisi.’ ³³Iale dana nova tai nivu tai alamege velemai. Kosealemo abu subuta Dielusalemata Dilava ata moaga havemale kemo Dilavau isiviale di talive Dielusalemata abu dahavoge di hatai.

³⁴“Iei, Dielusalemata ata la nohovu. Dilavau au hoto louveve beloveta laheho hanavege la muneta kebia havege abu haluvilu. Vani moaga di isiviale la malevei di adae uvumo otovei. Kokoluguu au ese bevuevei goloeabemo amuleale ke nahate. Isito laeau daho isiviholilu. ³⁵La katealemo gabie la o kena samiai uoholisi. Iale di la namigevege evive. La bae tota di elehalivebene. Isito lana la vaveve toelamo hoidevei loui kosea, ‘No Kosiveu Dilava ivimo lohohi no hoesegevenu.’ Lana kateai louliege bae tota di elehave.”

Iesuu vavahanite malaha hoesehavonu.

14 ¹⁻²Bula molemo Iesuu tiniale Balisia kosive mole oe avuti lovi isege malaha mole adaveu veloveti uvu balugaleu Iesue lohosege

ataeau nibi tumutumumuama. ³Ige Iesuu menakae kosive isi Balisiae ata kebia belagevei avoe, “La huhuige nahie menaka kemo nahiabuna valive bulamo vavahanite kebia hoesegevei. Emena osioi.” ⁴Kateai louge abu hotobe louholilu. Ige Iesuu malaha ke mai hoesehavoge vavahaniveu uoholige iomage tinu. ⁵Isege au bae namigevei avoe, “La esebeu o la ovobeu bulamo abata vuvehage lana vali osioi. Lana solekai ke laluvave.” ⁶Kateai louge kosive keau hotove ibina louveve humahau uoholinu.

Iveve hoto

⁷Iesuu kateaito elehasege lovi iliho lohoale keau isiviale ata ivite kebia nahate vai vomue duamo uguiavoi. Ige Iesuu ke elehai hoto koseale abuhu lounu. ⁸Avoe, “Mesoho malaha moleu au mae ibina vaveve kemo la namigevege lainaho talive vomue duamo uguiavolive. ⁹Isito mesoho la kemo uguiavosege oe biagena kosive mole baluga melamei lohoniege laheho loui kosea, ‘Eviasege kosive kou a lovomo ugumai.’ Kateige lana matilahai bae heie matamae toelamo uguiavove. ¹⁰Lainaho katealive. Isito oe biageu laheho ionage talive heie matamae toelamo uguiavove. Isege oe biageu bae laheho loui kosea, ‘Di haoka, hovelahai ehue matamae dua kove uguma.’ Lana vaveve kateale vage ataeabuna la elegevege lana ata baluga holive. ¹¹Iale oleu au ebika ebagemale ke Dilavana etolemai. Isito oleu au ebika etolemale ke Dilavana ebagemai.”

¹²Iesuu hoto kateale loui ata namigevege uoholige au avuti lovi iale ke namihai loui avoe, “A iveve baluga vaniege ainaho bae a haokuvu, a deholuvu isi kunai moagate kebia hohavelive. Kosealemo ana kateale vage keabuna gabie abuta kateale valiege a hohavoi. ¹³Isito a iveve baluga vaniege kunaiholimale, velo toelate isi ni kedute kebia hohavenela. ¹⁴Ana kateai lovi kebia ovege keau bae a lovi ke ibina vai aovalivebene. Ige kemo ana vahaehoanela. Kosealemo gabie Dilava nimo vaveve dua vamale keau hovedevemale vanila Dilavana bae ibinae dua aoi.”

Kosive moleu alia baluga vai ionale deiada (Matiu 22.1-10)

¹⁵Iesuu kateai louge malaha moleu keve ugulamoi lovi iniale hoto ke evisi avuhu loui avoe, “Ata olena Dilava matamae dogae tiniege avuti lovi iniege auna vahaehoai.” ¹⁶Ige Iesuu deiada mole loui namihai avoe, “Malaha moleu lovi baluga vai au haokuvuhu ionanu. ¹⁷Iniale lovi vamale vani kela au esemu namihai avoe, ‘Talive di haokuvu namigevei kosea, Di lovi vage uoholialelua lohove.’ ¹⁸Ige esemuve keu tiale haokuvuiabe bahata namigevenu. Ige keau bahata isiviholilu lohohi. Moleu namihai avoe, ‘Tei, di vata mole voiale dana tiniege elehai. Iale talive a kosive namihai kosea, Keu katealemoike lohoholinu.’

¹⁹Ige moleu esemuve ke namihai loui avoe, ‘Di ovo bahata ada mole isi ada mole voievenu. Iale dana aike tiniege kebia elegevei. Iale talive a kosive namihai kosea, ‘Keu katealemoike lohoholinu.’ ²⁰Ige moleu esemuve namihai avoe, ‘Di aike di mahina melamenu. Katealemo di bae talivebene.’ ²¹Ige esemuve hoilahai tiale hoto ke bahata loui au kosive namihage kosive keu ke evisi itumuai au esemu hanavoi avuho loui avoe, ‘Solekai talive humahae do, humahae ese kebiala velo golote, ni kedute, isi kunaiholimale kebia holoevei lohonela.’ ²²Ige esemuve keu tiale ata kebia holoevei lohoale kosive ke namihai avoe, ‘Di a louale ke vage uoholinu. Isito a o kou gigioholinu.’ ²³Ige au tota namihai avoe, ‘Talive botoe ata namigevei holoevei lohonela. Ige di o kou elike tobalohoi. ²⁴Seleveta di a namihai. A vasohuta namigeveale keau bae di lovi ko ilivebene.’ ”

Iesu ehovaveve deiada

(Matiu 10.37-38)

²⁵Vani mole Iesuu tige ata moagatahoeau ehovai avuluvuta tilu. Ige au hoilahai abuho lounu. ²⁶Isi avoe, “Oleuoleu vasohuta di ehovaho valiege abu lako abu ebia huhuevelive. Isi abu mamuvu, abu neinuvu, abu mahinuvu, abu ese, abu hohuvu, abu mahoho, abu mohoho huhuevelive. ²⁷Oleuoleu di ehovai vatehani maleale keau di esemu selevela. Isito oleuoleu di ehovai vatehani maleho isiviholiale keabuna oleve kateai di ata holisi. ²⁸Mesoho malaha moleu isiviai o houliho vaniege auna vasohuta ugumai onobenobe voieveve ke ibina huhuai hisalievei. Isiviai hilokage monive kena vali onobenobe bahata malege au gabiai. ²⁹Isito auna onobenobe ke ibina hilokaholisito vasohuta o houniege auna hade unaha uluvei golovemo ilada unaha detisito o houholige ataeabuna ke elehai hehavo. ³⁰Abuna loui kosea, ‘Malaha keu au o houito hou gabioholinu.’ ³¹Ke nahate mesoho vatae kosive moleu au esemu teni taoseni (10,000) holoevei vatae kosive mole isi esemuiabe tueniti taoseni (20,000) kebiahi mole haveho vaniege vasohuta auna huhuai kosea, ‘Dana vali negoalive kosive ke isi esemuiabe kebia havei nunuvei.’ ³²Isito auna huhuige avuemo anekiage auna au esemu hanavege abu vasohuta tiliege kosive nehe keu haeavamole lohosege abuna namihai kosea, ‘No kosiveu isiviale nahi mole have halevaito igaetoai molehi ue dua vai.’ ” ³³Iesuu deiada kateale louito abuho loui avoe, “Ke nahate la di ehovaho valiege vasohuta la onobenobe vaveve ke huhu halevaito bae di ehovave.”

Madea hoto

(Matiu 5.13; Maka 9.50)

³⁴“Madea keu duave. Isito auna toelage hevena uoholige auna oleve kateai bae tota heai. Keu anekianu. ³⁵Madea keu toelage lana ke mai

mihatuve. Iale ata laeau madea ke nahate. La Dilava hotoe dua evisito la vaveve kena ataemo toelage lana oleve kateai bae tota duave holisi. Iale oleuoleu hoto evimaleau hoto ko evive.”

Mamoeu tebuale hoto

(Matiu 18.12-14)

15 ¹Vani mole takesi malemale ata moaga isi atae toela degomole keau Iesu hoto eviliho loholu. ²Ige Balisia ata isi Diue menaka loui haivemale kosive keau ke elehai loui avoe, “Ata keu vaveve toelaike au vaima atae toela kebiahi igaetoai lovi inu.” ³Kateai louge Iesuu abuhoto koseale lounu. ⁴Avoe, “Mesoho la moleu mamoe bahata uani handele (100) maleniege igaue detitisi tebuige auna osioi. Auna mamoe moaga kebia halevei igae ke kaovanata ke elehai. ⁵Auna ke elehai vahaehoai. Isime ke ebagemai mai au begomo mamoi ebamoi tai. ⁶Isi auna ke ebamoi hoilahai au oe tiniege au haokuvu namigevei kosea, ‘Di ovo nehe detitiale ke di kaovanata elehai mai lohonu. Iale lohoge nahi igaetoai vahaeholahi.’ ” ⁷Iesuu deiada kateale louito namigevei avoe, “Iale ke nahate atae dua nainti naini (99) keau detuluviholisito vaveve dua unaha vage otogoe aneluabuna vahaeholahi. Isito ata igaena vaveve toela vaniege kemo hoilahai Dilava ehomage otogoe aneluabuna vahaeho balugalahi.

⁸“Isi mesoho keate moleu kina vahate teni (10) maleale kemo igae ehalomaniege auna ke osiohavoi. Auna lameba hanei atagavemo o hamai vahate ke kaovai. Auna oe uvu bahata kemo kaovae dua vaniege elehai mai. ⁹Ke maniege au haokuvu hohavege abu igaetoai usege auna namigevei kosea, ‘Di vahate ehalomale ke kaovanata elehai vahaehoanu. Iale nahi bahata vahaeholahi.’ ¹⁰Di louale ke nahate atabena au vaveve toela halei Dilava ehomage Dilava aneluabuna ke elehai vahaeho balugai.”

Abui nanatie deiada

¹¹Iesuu hoto kateale louge uoholige tota au deiada mole loui Balisia ata kebia haivenu. ¹²Isi loui avoe, “Malaha mole move abuitaeau uale debukaveu au mama namihai avoe, ‘A kunai tasalievei daho molete daonela.’ Kateai au mama namihage mamaveu kunai ke tasaliai nanaveho mole omisi avuhoto mole ominu. ¹³Ige hohoveu uniale vani mole au kunai nehe ke ataemo voievei moni malei au mamae o halei haeavamoleve tiale keve vaveve toela moaga vai kemo au moni hatuhatunu. ¹⁴Isime keve au moni hatui gabianu. Iniale vata keve vae balugau lohoge mo keu kunai holioholi selevelanu. ¹⁵Isi tiale malaha moleu ovo ovemale ke namihage au louge au bae avuemo loviai ovove kebia lovi ovema. ¹⁶Ataeau lovi omioholige mo keu kemo vaeta loviai isiviale ovove lovie vate ke isi.

¹⁷Kateinata bae au uvumo huhuai avoe, ‘Di mamae esemu bahata keabuna abu isiviamale ke ige uniabe abuna hanilahagei. Isito dau kove ui vaeai vae ho hatima. ¹⁸Iale di hovelahai talive di mama namihai loui kosea, Mamai, dau Dilava nimo vaveve toela vai a ivi keta aiovavonu. ¹⁹Iale ainaho dahoe loui kosea, Di mo. Isito daho loui kosea, Di esemu.’ ²⁰Kateai huhuai bae hoilahai haeavamole au mamae oe tinu. Isege mamaveu moveu tiale humaha kemo niai uniale moveu humaha kela haeavamolela lohosege ke elehage ninanau uvuve hamage au ke elehai bibuai tiale au mo evudei ulikukuhavonu. ²¹Ige moveu loui avoe, ‘Mamai, dau Dilava nimo vaveve toela vai a ivi keta aiovavonu. Iale ainaho bae daho loui kosea, Di mo.’ ²²Kateai louge mamaveu au esemu namigevei avoe, ‘Solekai ogoe dua mai avuemo holovave. Isi lini mai adavemo hatui tamakata mai velovemo hatuve. ²³Isi talive ovo mole batate hamai mai lohove. Ige nahi lovive vai vahaeholahai. ²⁴Kosealemo di mo kou hatiale nahate vanata nova ua. Kou subuta nahehi uoholinu. Isito aike nahi tota elehalu.’ Hoto kateale louge uoholige abu lovive valu.

²⁵“Abu ke vasege mo ke nanau bulue uniale hoilahai oe vavae lohoi evisege abu sale hamai havulahama. ²⁶Ige au au esemu mole belahai avoe, ‘Abu osioma.’ ²⁷Ige esemuve keu namihai avoe, ‘A hohou ue dua vanata nova hoilahai lohoike vage a mamau ke elehaike vaime ovo mole batate hamai lovive vama.’ ²⁸Ige au hoto ke evisi itumu balugai oe taliho isiviholinu. Ige mamaveu bae lohoale sovavihai namihai avoe, ‘Lohonela.’ ²⁹Ige au au mama namihai avoe, ‘Di hoto louge evinela. Vagana ko moagamo di a tedahoi lovi baluga vanu. Isi di vani bahata a hoto evie dua vama. Isito au vagana ke bahata uvumo vavevebe dua dahoe vaholinu. Isi ovobe ese mai daoge di haokuvuhi lovibe vai ioholinu. ³⁰Isito a mo keu tiale teibae keatehi oai abuemo a moni hatueveniale hoilahai lohoge au ovo batate hamai lovive vanu.’ ³¹Ige mamaveu avuho loui avoe, ‘Di mo, au vani baita daiti ua. Ige di kunai bahata keau a onoeabulikea. ³²Isito nahi vahaeholahage keu duave. Kosealemo a hoho keu tiale hatiale nahate vanata nova nita ua. Keu subuta nahie halevei tinu. Isito aike hoilahai lohoge nahi elehalu.’ ”

Kunaite mole esemuu lulele balugate

16 ¹Iesuu tota au esemu namigevei avoe, “Malaha mole kunai moagate keu esemu mole mage au avuemo loviai monive ke vavoloima. Ilage ata moleu lohoale kosive ke namihanu. ²Ige kosiveveu hohavoge au lohoge au namihai avoe, ‘A osioma. Di evige a di vavohama. Iale a di vavohale ke bahata hisaliai daonela. Kosealemo a bae tota daemo lovalivebene.’ ³Ige esemu keu huhuai avoe, ‘Di kosivena di halege dana osioi. Di heie lovi kemo negoholinu. Isi di moniho ata imigevelihio matianu.’ ⁴Isi kemo huhuai avoe, ‘Di kosivena di halege dana vaveve onole vai atahi haokuvuage abu

elike di mai o hatui.’ ⁵Isi kateai ata degomole hohavege abu loholu. Ata keau subuta kosive kemo kunai baluga malei bukinialu. Iale esemu keu ata igaegae namigevei avoe, ‘A kunai vaesute di kosivemo malenu.’ ⁶Ige moleu loui avoe, ‘Dau olive oele botolo uani handele (100) bukiniai malenu.’ Kateai louge esemu keu namihai avoe, ‘Halege nahi lobohavoi handele (100) haleito vivti (50) loui.’ ⁷Isi halei malaha mole namihai avoe, ‘Isege a. A vaesute di kosivemo bukiniai malenu.’ Ige au loui avoe, ‘Di laisu baeki uani handele (100) maleito ibinave vaholinu.’ Ige esemu keu loui avoe, ‘Halege nahi lobohavoi handele (100) haleito eiti (80) loui.’ ⁸Kateige kosive keu ke evisi loui avoe, ‘Di esemu keu lulelete ata.’ ” Iesuu deiada kateale louito ihuve keta lounu. Isi avoe, “Vatae ata keau abu haokuvuhi igaetoai vaveve kemo lulele balugalu. Isito atagae ata keau kemo luleleholilu.”

⁹Tota namigevei loui avoe, “Evide. La moni la kunai kemo atahi haokuvulahi oveve. Kateige la moniu uoholige kosivena ehue la malevei o hatuevei. ¹⁰Olena vaveve ese kemo inutolotoaniese auna vaveve baluga ketamo inutolotoai. Isito olen vaveve ese kemo loboaniese auna vaveve baluga ketamo loboai. ¹¹Iale lana vatae kunai kemo lobolahaliege oleve kateai bae otogoe kunai seleve malei. ¹²Isi lana la haokuvu kunai ke neniai hoesehavoholiliege oleve kateai bae la ebiaho kunai malei.

¹³“Esemubeu bae kosive abuiho loviaivebene. Auna kateaniese mole isivi omisi mole kabebihavoi. Isi mesoho moleho neniai loviaito moleho neniai loviaivebene. Iale ke nahate la bae Dilavata monita igaetoai ehovalivebene.”

Balisia ataeau Iesu hehavolu.

(Matiu 11.12-13; 5.31-32; Maka 10.11-12)

¹⁴Iesuu kateai louge Balisia ataeau abu uvu mai monimo mavoale keau ke evisi kabebihavoi Iesu hehavolu. ¹⁵Ige Iesuu abuiho loui avoe, “Laeau la ebika tabagevege ataeau la elegevei loui avoe, ‘Keau ata duaea.’ Isito Dilavau la uvu hilokanu. La vaveve kateale vage ataeabuna la hoesegevei. Isito Dilava nimo vaveve katealeu mesiae hisi ke nahate.

¹⁶“Moseseu menaka hisaliage belovetata hisaliale hoto ke ataeau subuta ehovalu. Isito Dioniu lohoaleu ataeau Dilava adae vuvunemo uveve hotoe dua ke loui ata haivege ataeau aike molehi tavala isiviale solekai Kosive adae vuvunemo uliho tai. ¹⁷Dilavau menaka ke bahata loui mamoge keu ua. Iale vatana otogoti uoholiesege menaka ke behameu bae uoholilivebene.

¹⁸“Malaha molena au mahina halei keate mole melameniege au keate ke vavamoike au ke vavoloanu. Isege malaha molena malaha ke keate melameniege malahave ke vavamoike au ke vavoloanu.”

Kunaite malaha isi Lasolo

¹⁹Iesuu hoto kateale louito deiada moleta lounu. Isi avoe, “Vani mole malaha mole kunai moagate keu ogoe dua ibina balugate hatui lovi baluga

isi ua. ²⁰Isege malaha mole kunai vesite ivive Lasolo keu ata kubite. Iale abuna ke melavei loholiege kunai moagate ke udahamo mavogei. ²¹Ige kena kemo ugei. Isivialeike kunai moagate ke lovie sigu igei. Kateai kemo usege toeabuna loholiege kubive ke tevegei. ²²Iniale malaha keu hatige aneluiiau lohoale munanave mai Ebalahamu uale otogo keve tilu. Isege kunai moagate malaha keta hatige ataeau mai abavulu. ²³Ige malaha ke munanau veneu hodovavesiteve vatehani baluga malenu. Isi hovelahai niai elehage haeavamolela Lasolou Ebalahamu vavamo ua. ²⁴Ige au Ebalahamu hohavoi avoe, ‘Di mama, ana valive daho uvuai di tedahoi. Di vene komo uale vatehani baluga malenu. Iale Lasolo hanavoge au loholive au adae viso mai emo manemei mai di nememo mamoge auna seliai.’ ²⁵Kateai louge Ebalahamuu namihai avoe, ‘Di mo, ana huhuanu. Au vatae umale vani kemo au kunaie dua unaha malenu. Isege Lasolo eu kunaie dua maleholinu. Isito Lasolou aike vahaehomo usege au vatetumu malema. ²⁶Di hoto mole louge evinela. Seika baluga nahie vigomo uale no bae oleve kateai ae tai. Isege ata oleve kateai bae noe lohohi. Kateaveveu anakianu.’ ²⁷Ige kunai moagate keu loui avoe, ‘Di mama, kateaito di isiviai a imihai. Lasolo hanavoge au di mamae oe tai. ²⁸Keve talive di hohuvu ada mole haivege abu vatehani malemale matama kove loho halevai.’ ²⁹Ige Ebalahamuu loui avoe, ‘Mosese hoto isi belovetae hoto keau ua. Iale a hohuvu abuna hotoeabe ke eviliege humahae duala tai.’ ³⁰Ige malaha keu Ebalahamu namihai avoe, ‘Di mama, abu bae hoto ke evilivebene. Isito ata mole hatiale kena abue tige abuna hotove evisi abu vaveve toelamo hoidevei.’ ³¹Ige Ebalahamuu loui avoe, ‘Abu Mosese hoto isi belovetae hoto eviholiliege abu bae atatu hatai hovelahale ke hoto evilivebene.’”

Iesuu deiada degomole louevenu.

(Matiu 18.6-7, 21-22; Maka 9.42)

17 ¹Iesuu deiada ke louge uoholige au esemu namigevei loui avoe, “Vani bahata vaveve toelau ataemo velemana. Isito olena louge ataeau vaveve toela vage ata ke nohoma. ²Ata olena isiviai di evievi ese molehame aiohavoge au vaveve toela vage abege ataeau mune baluga mai enoveta etunuvai mai davalamo mihatuge keu duave.

³“Iale la ebia nibievelive la haoka moleu vaveve toela vage talive namihai vaveve ke bamuve. Ige au kemo hoilahage lainaho toelave ke huhuigelive. ⁴Mesoho vani igae kemo au vaveve toela vai la aiogeve seveniaito (7) tota loholive la namigevei au vaveve toela ke louge lainaho bae toelave ke huhualive.”

⁵Ige esemuiabeau namihai avoe, “No evievi negotige auna balugai.”

⁶Ige au namigevei avoe, “Masitae i keu esevehame. Isito mesoho la evievi keu masitae i ke nahate vage lana idi ko namihai kosea, ‘Galata toholahai tota e nimo laminela. Ige auna la hoto evisi vai.

7“Di hoto mole louge evive. La esemu moleu bulumo loviai mesoho ovo nibievenata hoilahi lohoge lana valive avuho loui kosea, ‘Solekai talive lovi inela.’ 8Ba, la bae katealibebene. Isito lana louge auna la lovi vai hamai laoveito la halimo usege lana lovi ive. Keu uoholige esemu kena bae lovi isi. 9La esemu keu vani bahata lovi ke vama. Iale la bae ke hoesehavolivebene. Keu loviveike. 10Ke nahate laeau di esemu. Iale lana di laheho louale ke vai gabialiege loui kosea, ‘Noeau esemu unaha. Keu no lovilike.’ ”

Lebolasite teniau (10) momolelahalu.

11Iesuu kateai louito halei Dielusalema humahala tinu. Isi tiale Galilita Samaliata vatae tamagamo tinu. 12-13Keve tiale o molemo velemaasege lebolasite ada mole isi ada mole keau haeavamole lavisi Iesu elehai hohavoi avoe, “No Kosive Iesu, noheho uvuai no tediaevenela.” 14Kateai louge Iesuu elegevei abuho loui avoe, “Tige dubu nalimaleau bae la vava elehai hilokage la vavahani keu uoholinu.” Kateige abu tisege humaha tavae vavaeabeu dua vanu. 15Ige igaeu au vava elehai hoilahi lohoale baita Dilava imihai hoesehavonu. 16Isi lohoale Iesu vudimo kome bokoai vata bisi holumai Iesu hoesehavonu. Vaveve kateale vale ata keu Samalia ata. 17Ige Iesuu au esemu namigevei avoe, “Dana ata ada mole isi ada molenike hoesegevenu. Iale degomoleau oleve. Isege igae kou hoilahi lohonu. 18Osiohoike vata mole ata ko igaeu hoilahi lohoale Dilava hoesehavonu. Isege Diue ata naini (9) keau hoidevei lohoholilu.” 19Kateai louito malaha ke namihai avoe, “Di a evievimo a hoesehavoale hovelahi tenela.”

Iesuu lohoveve vaveve (Matiu 24.23-28, 37-41)

20Vani mole Balisia ata degomoleau Iesu namihai avoe, “Osiomalela Dilava matamae doge kena bae lohoi.” Ige Iesuu loui avoe, “Vani keu lohoveve ataeau bae elehalibebene. 21Atabeu bae koseale loulibebene. ‘Avuike uoke lohonu.’ O mesoho, ‘Avuiko lohonu.’ Kosealemo la Dilava matama dogae uveve ke hoto evige la uvumo ua.”

22Kateai louito au esemu namigevei avoe, “Vanie toela molena bae lohoge lana isiviale Atae Ese elehai. Isito la bae elehalibebene. 23Vani kela ataeabuna laheho loui kosea, ‘Elehave. Avuike uoke.’ O mesoho, ‘Avuike ko.’ Kateai louge lainaho hotoeabe evisi kaovaho talive. 24Atae Eseu lohoveve keu koseanu. Vau nivolekai solekai otogomo atagai kibalai vaki mole velemai vaki mole velemaale ke nahate Atae Ese vanina bae lohoi. 25Isito vasohuta ataeau vatamo umale koeabuna kabebihavoi aiohavoge auna vatehani baluga malei. 26Ataeau subuta Noa vanimo vamale ke nahate Atae Eseu lohoveve vani ketamo abuna katelahai. 27Noa vani

kemo ataeau lovi isi e isi mahinuvulahama. Abu kateilage Noau bouti uvue tisege e balugau lohoale ata bahata havehatunu. ²⁸Lota vanimo abu vamale keta kateanu. Vani kemo abu lovi isi e isi molela kunai voilahai bululahai o houe vema. ²⁹Isege vani mole Lotau Sodoma o ke halei tisege veneu otogomo dobai lohoale o ke bahata mahoevei gabianu. ³⁰Iale Atae Esena tota hoilahai lohoho vasege ataeabuna katelahai.

³¹“Vani keu lohoge ata moleu oe dokoe uale keu bae oe uvue deluai au kunai maleliho talivebene. Isege ata moleu bulue uale keu bae oe hoilahai talivebene. ³²Iale Lota mahinae vaveve ke huhulahave. ³³Olena au ebika unaha huhuaniege auna uveve dua hosidisi. Isito oleu au ebika huhuholiniege auna uveve dua malei. ³⁴Iale di la namigevege evive. Vani kemo ata abui abuna ava igaemo ladevesege Dilavana mole haleito mole mai tai. ³⁵Isege keate abui abuna igaetoai lovi vasege Dilavana mole haleito mole mai tai. ³⁶Isege malaha abui abuna bulue lovilahasege Dilavana mole haleito mole mai tai.” ³⁷Iesuu kateai louge esemuibeau namihai avoe, “Kosive, auna oleve keve mai tai.” Ige Iesuu namigevei avoe, “Mesia moleu hatisi hisiage uguiau ke iliho mole bevueveale ke nahate vaveve nimotele keabuna velehovoge lana ke elehai huhuige di lohoveve vaniu vuguvuguanu.”

Gobu mole isi atae vaveve kaovamale malaha

18 ¹Vani mole Iesuu dovudovue hoto mole loui au esemu haivei isiviale abu gulguliai kemo kabebi halevai. ²Hoto keu koseanu. “O molemo kotae hoto evimale kosive moleu ua. Kosive keu Dilava vabuhavoholisi ata hoesegeveholima. ³Iale o kemo gobu moleu ua. Gobu kena vani bahata kosive ke oe lohoniege au deiada loui namihai isivialeike ata moleu aiahavomale kemo au tedahoi. ⁴Isito vani moaga kotae kosive keu keate ke tedahoholinu. Ige keate keu negobedai namihalage kosive keu bae huhuai avoe, ‘Di Dilava vabuhavoholisi ata hoesegeveholimale kemo di bae keate ke tedaholivebene. ⁵Isito keate keu lohohi di namihalage di homasiale kemo dana tedahoi. Mesoho dana keate ke tedahoholige keate kena vani baita dae lohohi di namihagei.’” ⁶Iesuu kateai louito tota namigevei avoe, “Lana kosive toelau louale ke evilu. Keu kosive toela. Isito keu keate ke hoto evisi tedahonu. ⁷Iale la huhuige Dilava ata seleve keabuna vanimo vavimo ninalahai namihage Dilavana valive au ata kebia tedaavei. Mena auna vali vesokanata bae tedaavei. ⁸Ba, di la namigevei. Auna solekai kebia tedaavege abuna ue dua vai. Isito Atae Esena valive vatae lohoniege evievi ata moaga elegevei. Emena.”

Balisia isi takesi malemale ata

⁹Iesuu tota dovudovue hoto mole loui isiviale ataeau abu ebia malei hatui ata degomoleho isiviholimale kebia haivei. ¹⁰Isi loui avoe, “Ata

abuiau dubue guliguliho tilu. Moleu Balisia ata. Isege moleu takesi malemale ata. ¹¹Ige Balisia ata keu tiale lamisi guliguliai avoe, ‘Dilava, di vahaehoanu. Ata degomoleau vavoloai moni malei keatehi ladevema. Isito dau vaveve toela kateale vaholima. Dau takesi malemale kebia nahate vai moni vavoloholima. ¹²Bula igae uvumo di a hoesehavoliho vani abui lovi ioholisi di taidi aoma.’ ¹³Isito takesi malemale keu atae iae lamisi ehue nioholisito holumai au ebiamo au ada bisi loui avoe, ‘Dilava, dau atae toela. Iale daho uvuai di tedaho.’” ¹⁴Iesuu deiada ke louito tota namigevei avoe, “Di la namigevege evive. Dilavau takesi malemale ke toelamo hoesehavege uvue duamo oe tinu. Isito Balisia ata ke vaveve toelau ua. Kosealemo oleu au ebika ebagemale ke Dilavana etolemai. Isito oleu au ebika etolemale ke Dilavana ebagemai.”

Iesuu eseese hoesegevenu.

(Matiu 19.13-15; Maka 10.13-16)

¹⁵Vani kela keate degomoleau abu ese malei lohohi isivialeike Iesuu levevei hoesegevei. Isito Iesu esemuiau kebia elegevei iovei avoe, “Halevai teve.” ¹⁶Katelahage Iesuu hohavei avoe, “Lainaho eseese kebia keluevelive. Isege abu dae lohohi. Abu dae lohohale keu duave. Kosealemo eseese kobia uvunahate vamale keabuna Dilava adae vuvunemo ui. ¹⁷Seleveta di la namigevege evive. Oleuoleu eseese kobia uvunahate vaholilieve abu bae Dilava adae vuvunemo ulivebene.”

Kunai moagateu Iesue lohohu.

(Matiu 19.16-30; Maka 10.17-31)

¹⁸Ige Diue kosive moleu Iesu namihai avoe, “No haivemale atae dua, dana onole vai ukolikoli mai.” ¹⁹Ige Iesuu namihai avoe, “A osiohoike daho loui kosea, ‘Atae dua.’ Atabeu duave holioholinu. Isito Dilava igaeu duave. ²⁰Au Dilava menaka hilokanu. Menaka keau loui avoe, ‘Ainaho mole keatehi ladevegeve. Ainaho ata havegeve. Ainaho vavoloageve. Ainaho mole lobogelive. Isi a mamata a neinatae hoto evisi hoesegevenela.’” ²¹Ige malaha keu Iesu namihai avoe, “Di esebuluta menaka kebia bahata ehovei lohoma.” ²²Ige Iesuu hoto ke evisi avuhou loui avoe, “A louale ke bahata a vanu. Isito a vaveve ko igae vaholiale talive a kunai ke bahata malei voiai monive malei kunai holimale kebia oveito lohohi di ehomanela. Ilive elike otogoe ibinae dua manela.” ²³Hoto kateale louge malaha keu ke evisi uvu balugai halei tinu. Kosealemo keu kunai balugate ata.

²⁴Kateige Iesuu ke elehai loui avoe, “Kunaite keau otogoe tiveve keu tolo selevelanu. ²⁵Ovo mole ivi kamela keu nilae vahamo velemaveve keu anakianu. Iale ke nahate kunaite keau otogoe tiveve keu anakianu.” ²⁶Ige ataeau ke evisi namihai avoe, “Kunaite keau otogoe tioholige oleme

igaeabuna otogoe tai.” ²⁷Ige Iesuu namigevei avoe, “Vaveve katealeu ataemo anakianu. Isito Dilavau ke vaveve hiloka.”

²⁸Ige Bitau avuho loui avoe, “Di louge evi. Noeau no onobenobe bahata halevai a ehovalu.” ²⁹⁻³⁰Kateai louge Iesuu au esemu bahata namigevei avoe, “Seleveike. Iale la olena Dilava adae vuvunemo uveve hoto louliho au o halei au mahina halei au hohuvu halevei au mamata au neinata halevei au ese haleveniege auna vata kove onobenobe moaga malei. Ige gabie Dilavana bae ukolikoli mai omisi.”

Iesuu au hativeve hoto lounu.

(Matiu 20.17-19; Maka 10.32-34)

³¹Iesuu kateaito au esemu tuelo (12) unaha kebia holoevei lilikateve tiale kebia namigevei avoe, “Evive. Nahi Dielusalemae timale kove belovetaeau subuta hisaiale hoto ke bahataeabuna Atae Esemu lohohi.

³²Ataeabuna ke mai Diue ata holioholiale kebia ovege abuna hehavo avuemo violahai visuhavo. ³³Keu uoholige abuna mai hamage auna hatai. Isito vani abuita igaetaeabuna uoholige auna tota hovelahai.”

³⁴Kateai louge esemuiabe keau hoto ke evisi dolodololahalu. Abu evisito ihuve ke hilokaholilu.

Iesuu ni kedute hoesehavonu.

(Matiu 20.29-34; Maka 10.46-52)

³⁵Abu tiliale Dieliko oe vavae tisege malaha mole ni kedute keu humahamo ugulamoi moniho ata imigeve. ³⁶Iale keu usege ata moagaeau lohohi evihai tima. Ige au ke evisi belagevei avoe, “La osioma.”

³⁷Ige abu namihai avoe, “Nasaleta ata mole Iesu keike ko nahiela lohoma.” ³⁸Ige ni kedute keu baita hoai loui avoe, “Deividi mo Iesu, dahoe uvuai di tedahonela.”

³⁹Kateai louge ataeau vavavemo uale keau keluai namihai avoe, “Tobekai unela.” Kateai louge malaha keu hotoeabe ke evioholisito negobedai hoai avoe, “Deividi mo, dahoe uvuai di tedahonela.” ⁴⁰⁻⁴¹Kateisege Iesuu lohoale velemai ata namigevei avoe, “Ni kedute ke melavei dae lohove.” Ige abu ke mai avue lohoge au namihai avoe, “A isiviale di ono vade ahoe vai.” Ige keu loui avoe, “Kosive, di isiviale niai.” ⁴²Ige Iesu avuho loui avoe, “Duave au a uvu mai daemo mamoaemo a nina duaveai. Iale nianela.” ⁴³Kateai lousege keu nianu. Isi Iesu ehomai tiale Dilava hoesehavonu. Ige ataeau ke elehai abuta Dilava hoesehavolu.

Iesuu Sakiasi oe tinu.

19 ¹⁻²Iesuu tiale o baluga Dielikoe velemai tisege keve takesi malemale kosive mole ivi Sakiasi keu keve ua. Malaha keu kunai moagate. ³Iale keu isiviai Iesu elehai. Isito ata moagaeau bamuge keu

elehaveveu anekianu. Kosealemo keu atae vugehame. ⁴Iale keu uli holisi tiale idi luaula viatisi isiviai Iesu elehai. Keu hilokage Iesuna humaha kela tai. ⁵Iale Iesuu kela tiale ehue niai Sakiasi elehai namihai avoe, “Sakiasi, solekai lalamoi loho. Di isiviai nova a oe talive aiti lovi isi.” ⁶Kateai louge Sakiasiu vahaehota solekai lalamoi lohoale Iesu melamei avuti au oe tinu. ⁷Ige ataeau vaveve ke elehai isiviholisi loui avoe, “Keu atae toela ke oe tiale avuti lovi ige keu toelanu.” ⁸Ige abu lovi isege Sakiasiu hovelahai lamisi Iesu namihai avoe, “Kosive, evinela. Dana di kunai tasaliai vaki mole malei kunai holimale kebia ovei. Isi ata degomole lobogevei abuemo onoeabe malemale ata kebia dana kunai ove abuiabui.” ⁹Ige Iesuu avuho loui avoe, “A louale kemo Dilavau a toelamo a maveve vaniu nova aemo lohonu. Iale kemo a nova Ebalahamu valada seleve holinu. ¹⁰Iale Atae Eseu vaveve toelamo tebulahamale kebia kaovei malevelihoike au lohonu.”

Monie deiada
(*Matu 25.14-30*)

¹¹Ataeau Iesu hoto evisage au tota dovudovue hoto mole loui haivenu. Kosealemo ataeau huhulahai avoe, “Iesuu aike Dielusalemoe velemage nahiabuna Dilava adae vuvunemo ui.” ¹²Kateisege Iesuu deiada mole loui isiviale abu Dilava adae vuvunemo uveve kemo lulelelahai. Isi loui avoe, “Kosive moleu isiviai tai vata moleve vata ke kosive balugamo vuvune malei tota hoilahai loholive au vata nalisi. ¹³Iale keu au esemu teni (10) hohavege abu lohoge au uani taoseni kina (K1,000) malei igaegaeai ovei namigevei avoe, ‘Di tisege moni ko malei kemo lovilahai elike moni degomole maleve.’ Kateai louito halevei tinu. ¹⁴Isi tisege vatave ataeau avuho isiviholisi iave abu esemu hanavege abu tialeau kosiveabeu timale vata ke kosive baluga namihalu. Namihai avoe, ‘No isiviholilu malaha keu balugai no nalieveliho.’

¹⁵Kateaito malaha keu vuvune malei tota hoilahai lohoale vata ke nalinu. Isi vasohuta au esemu teni (10) kebia hohavege abu lohoge au belagevei isiviale hilokage au moni oveale kemo abu moni vaesute malelu. ¹⁶Ige vasohuta omiale keu lohohoi loui avoe, ‘Di kosive, a moni daoale kemo di teni taoseni kina (K10,000) malenu.’ ¹⁷Ige kosiveveu avuho loui avoe, ‘Duave baua, au esemue dua. Vaveve ese kemo a lovie dua vale dana vuvune malei aoge ana o baluga ada mole isi ada mole nalievenela.’ ¹⁸Kateige iavemo moleu lohohoi namihai avoe, ‘Di kosive, a moni daoale kemo di vai taoseni kina (K5,000) malenu.’ ¹⁹Ige kosiveveu avuho loui avoe, ‘A katealelua o baluga ada mole nalievenela.’ ²⁰Kateige iavemo esemuve moleu lohohoi namihai avoe, ‘A moni mai daoale keike ko. Di ogota viliai mai mahogovanu. ²¹Kosealemo au malaha tolote. Au a ono holioholiale ke ana malegei. Isi a lovi haholimale ke ana heiata malegei.

Ialemoike di a vabuhavoi moni ke mai mahogovanu.’ ²² Ige kosiveveu avuho loui avoe, ‘A keu esemue toela. A hoto louale kena a aiohavoi. A loui kosea, Keu ata tolote. Keu au ono holioholiale ke auna malegei. Isi keu loviholisito auna heiata lovi malegei. ²³ A kateai huhuale kemo a osiohoike di moni ke mai banikamo mamoholinu. Abege a ke malei banikamo otovege keu balugai. Ilive elike moni ke goloe moleta malege duave. Isito a ke vaholinu.’ ²⁴ Au kateai louito au vavamo laviale kebia namigeve i avoe, ‘Avuemo moni ke malei teni taoseni kina (K10,000) maleale ke omive.’ ²⁵ Ige abu ke evisi avuho loui avoe, ‘Ba, kosive, keu moni baluga malege elemua.’ ²⁶ Ige au loui avoe, ‘Di la namigevege evive. Oleu moaga maleale kena moaga malei. Isito oleu maleholiale keu bae onobe malivebene.’ ²⁷ Kateai louito tota loui avoe, ‘Ata neheau di aiohavomaleau daho itumulahai di balugaliho isiviholiale kebia malevei loholive di vudimo havege abu haluvisi.’ ”

Iesuu Dielusalemae tinu.

(Matiu 21.1-11; Maka 11.1-11; Dioni 12.12-19)

²⁸ Iesuu deiada kateale louito halei uli holisi Dielusalemae tinu. ²⁹ Tialeu tana mole Oliveta kemo tige o abuitaeau ua. Moleu Betabedi. Ige moleu Beteni. Iale au o ke vavae taito isiviai au esemu abuita hanavege abu uli holisi tai. ³⁰ Kateai namigeve i avoe, “Talive o kela velehovoi o ke ivie elehage doniki mole dog a abu avuemo uguiavoholisito umuvai mavoale ke vavehai mai lohove. ³¹ La ke vavehasege mesoho ata moleu la belageve i loui kosea, ‘La osiohoike ke lulehama.’ Ige namihai kosea, ‘Kosiveu avuho isiviaike vage.’ ” ³² Iesuu kateai louge abu halevai tiale au louale ke nahate elehalu. ³³ Isi doniki ke vavehasege biaeau abuho loui avoe, “La osiohoike ke lulehama.” ³⁴ Ige abu namigeve i avoe, “Kosiveu avuho isiviaike vage.” ³⁵ Kateai louito mai Iesue tilu. Tialeau abu ogo malei doniki ke inumo bokoai otovege Iesuu biloai golovemo ugulamou. ³⁶ Au kemo biloai tisege abu abu ogo malei humahala detisi tilu. ³⁷ Tiale Oliveta tanamo lagaluvisito hevaluvimale kemo lavisi Dielusalema elehage esemuiabe bahata keau vahaeholahai Dilava hoesehavolu. Isime baita loui avoe, “Ata kou au vuvunemo vikoe vaveve moaga vage no elehalu.” ³⁸ Avoe, “Kosive kou Dilava ivimo lohoale ko nahi hoesehavoi. Otego keu uveve duae matama. Iale nahi Dilava hoesehavoi ivive ebagevai.”

³⁹ Kateai lousege Balisia ata degomoleau Iesu namihai avoe, “Kosive, a esemu namigevege abu hoto kateale lou halevai.” ⁴⁰ Ige au namigeve i avoe, “Ata keabuna di hoesehavoholige dana mune kobia namigevege abuna hotolahai di hoesehavoi.”

Iesuu Dielusalemaho uvuai ninanu.

⁴¹ Au kateaito lohohi nai Dielusalema elehaime ninanu. ⁴² Ninai avoe, “Dielusalema ataea, la uveve duae hoto matahage duave. Isito la

ehalovalu. Ialemo la tota ke mavevena anekiai. ⁴³Iale vani molena lohoge la aiogeveve ataeabuna bae loholiege o ko evilikahavoi mai molehi dai o ko koiai. ⁴⁴Isime o ko bahata aiohavoi la bahata havehatui. Ige munebehameu bae mole golomo ulivebene. Kosealemo Dilavau isiviai la malevei. Isito laeau ke huhulahai luleleholilu.”

Iesuu dubumo ata nunuvenu.

(Matiu 21.12-17; Maka 11.15-19; Dioni 2.13-22)

⁴⁵Kateaito lohoi tiale Diue dubu balugae tige ataeau ui onobenobe voilahama. Ige Iesuu tiale kebia koieveli nunuvenu. ⁴⁶Isi abuho loui avoe, “Dilavau Bukae Hotomo loui avoe, ‘Di isiviale ataeau di o komo guliguliai di hoesehavogei.’ Isito laeau kateholisito vavoloe vaveve avuemo vama.”

⁴⁷Isi vani bahata timale dubue ata haivema. Kebia haivesege dubu nalievemale kosive, Diue menaka loui haivemale isi oe kosive keau isiviale hamage au hatai. ⁴⁸Isito abu hamaveve ke kaovalage humahau uoholinu. Kosealemo ataeau hotove evisi isiviholilu hotovebehame hosidiliho.

Abu Iesu vuvune kaovalu.

(Matiu 21.23-27; Maka 11.27-33)

20 ¹Vani mole Iesuu Diue dubu balugae tiale hotoe dua loui ata haivesege Diue menaka loui haivemalea, Dubu nalimale kosive balugaea isi oe kosive keau loholu. ²Lohoale Iesu namihai avoe, “No namigevenela. Oleike vuvune aoi a namihage au vaveve kateale vama.” ³Ige Iesuu abuho loui avoe, “Usege di hoto mole loui la belagevei. ⁴Ole vuvunemoike Dioniu ata babatisogevunu. Dilava vuvunemo emena atae vuvunemo.” ⁵Kateai belagevege abu hotohotoai moleho loui avoe, “Nahiabuna hoto onole loui. Mesoho nahiabuna loui kosea, ‘Dilava vuvunemo.’ Ige auna loui kosea, ‘Isito osiohoike la Dioni hoto evioholilu.’ ⁶Isi mesoho nahiabuna loui kosea, ‘Atae vuvunemoike.’ Ige ata bahata koeabuna mune malei nahie havei. Kosealemo keau huhuige Dilavau au vuvune omige Dioniu beloveta holinu.” ⁷Hotoeabeu uoholige abu Iesu namihai loui avoe, “No Dioniu olemo vuvune male ke no hilokaholilu.” ⁸Ige Iesuu namigevevei avoe, “La katealemo di bae data ole vuvunemo vaveve kateale vale loui la namigevelivebene.”

Bulu naliale deiada

(Matiu 21.33-46; Maka 12.1-12)

⁹Iesuu kateai loui hilokage keau hotove homasihavolu. Iale keu dovudovue hoto mole loui ata haivei avoe, “Malaha moleu au bulu hai ata degomole namigevege abu bulu ke nalilu. Isito halei tiale vagana moaga matama moleve ua. ¹⁰Keve usege loviu baeveve vaniu lohoge au au esemu

mole hanavoi isiviale au talive ata nehe kebiamo lovi degomole malei lohoi. Isito ata keau esemu ke hamai iovage ada unahala hoilahai tinu. ¹¹Ige au tota esemu mole hanavoge au lohonu. Ige bulu nalimale keau keta hamai aiohavoi iovage ada unahala hoilahai tinu. ¹²Ige au tota esemu mole hanavo moleage au lohonu. Ige abu keta hamai nunuvage au vatehani mai tinu. ¹³Ige bulu ke biageu huhuai avoe, ‘Dana onole vai. Mesoho dana di uvue mo hanavoge abu bae ke aiohavolivebene.’ Kateai loui au mo hanavoge au lohonu. ¹⁴Ige bulu nalimale keau ke elehai mole namigevei avoe, ‘Bulue biage moike ko. Iale nahi hamage au hatige elike bulu kou nahiele holisi.’ ¹⁵Kateai louito mo ke evudei mai tiale bulue iae hamalu.” Iesuu deiada ke louge uoholige au namigevei avoe, “La huhuige bulue biagena kebiaho osoi. ¹⁶Di la namigevei. Auna lohoniege ata kebia havei bulu ke mai ata degomole ovege abuna nalisi.” Ige Diue ataeau ke evisi loui avoe, “Dilavau bae kateale noemo valivebene.” ¹⁷Ige Iesuu niavei namigevei avoe, “Isito Bukau louale ko ihuu oleve kateanu. ‘O houlmale keau mune moleta o houveve ke kabebihavoale keike nova Dilava o hadebiveve mune holinu.’ ¹⁸Oleme abuna mune ke vuvehaliege abu ebia havei haluvisi. Ige mune kena dobai ata mole hamage lave unahana ui.”

Takesiaveve belala

(Matiu 22.15-22; Maka 12.13-17)

¹⁹Iesuu hoto kateale louge Diue menaka loui haivemale isi dubu nalievemale kosive keau hilokage Iesuu deiada ke loualeu vaveveabemoike au ke lounu. Katealemo abu isiviale Iesu mai. Isito abu ata vabugeveale kemo maveve ke halevalu. ²⁰Isito vani bahata nibisi abu esemu degomole bevuevei namigevei avoe, “Talive Iesu namihai lobohavoge au hoto nimolete lousege no bae mai talive gamani vuvunete omige au avuemo kotai.” ²¹Kateai louge esemuiabe keau tiale Iesu namihai avoe, “No haivemale ata, no hilokage a hoto loui ata haivemale keu seleve. Au atae hoto evioholisito Dilava hoto seleve loui ata haivema. ²²Iale hoto mole loui no haivenela. No takesiai Loma gamanie kosive baluga Sisa omiale kena duave. Emena toelanu.” ²³Ige Iesuu loboebae ke hilokai namigevenu. ²⁴Isi avoe, “Monie luhu mai lohoge di elehai.” Ige abu mai omige au namigevei avoe, “Ole munanata ivivetaike moni ko luhumo ua.” Ige abu namihai avoe, “Loma gamani kosive baluga Sisa.” ²⁵Ige au namigevei avoe, “Ito. Iale gamaniele gamani omive. Isi Dilavaele Dilava omive.” ²⁶Kateai louge hotoveu inuige abu ke evisi vikolahai tobekai ua. Katealemo abu atae vudimo maveveu anekianu.

Hatihatimo hoveleveve belala

(Matiu 22.23-33; Maka 12.18-27)

²⁷Ige Sadukea ata degomoleau Iesue loholu. Ata keabuike loui avoe, “Haluviale keau bae hovelevelivebene.” ²⁸Iale ata keau Iesu namihai

avoe, “No haivemale ata, Moseseu menaka mole noheho hisaliai avoe, ‘Mesoho malaha moleu mahinaito eseholisi hatige hohovena hovelahai gobu ke melamei au nanaho ese hou.’”²⁹ Iale no deiada mole louge evinela. Malaha mole igae mohoho bahata seveni (7) houevenu. Iale ovokinave keu mahinaito esebe mamoholisi hatinu.³⁰ Ige valavemo keu hovelahai au nanae gobu melameito avuta esebe mamoholisi hatinu.³¹ Ige valaeabemo keau bahata katelahai gobu ke igae melavei esebe hoveveholisito haluvilu.³² Iale keau bahata haluvige keate keta hatinu.³³ No deiada ke loualemo a huhuige ata seveni (7) kebiabuna hovevege keate kena ole mahina holisi.”³⁴ Ige Iesuu abuhu loui avoe, “Aike vata komo malahaeau keatehi mole holoevema.”³⁵ Isito oleuoleu evievimo haluviale kebia Dilavana huhuevei tatuvege abuna hovevevei ehue tiliege bae mole holoevelivebene.³⁶ Isi anelu nahate vai haluvilivebene. Kosealemo keau haluvisi hoveveveale kemo abuna Dilava ese holieveli.³⁷ Moseseu louale kemo nahi hilokage haluviale keabuna hovevevei. Lana Bukae Hoto huhulahalu. Kemo Dilavau veneu idimo lahale keve Moseseho louge au Kosive namihai avoe, ‘Ebalahamu Dilava, Aisiki Dilava isi Diekobo Dilava ailike.’³⁸ Moseseu kateai louale kemo nahi hilokage keu nova nita uale kebia Dilava isi subuta haluviale munanaeabeu uale kebiatae Dilava. Iale kemo Dilava keu haluviale isi nita uale kebia Dilava.”³⁹ Iesuu kateai louge uoholige Diue menaka loui haivemale degomoleau loui avoe, “No haivemale ata, a louale keu duave.”⁴⁰ Abu tota Iesu belahaliho vabulahalemoike hoto kateale loulu.

Ata tediaeveve kosive Keliso keu ole valadamo lohonu.

(Matiu 22.41-46; 23.1-36; Maka 12.34-40)

⁴¹ Ige Iesuu belagevei avoe, “Diue menaka hisaliamale keau loui avoe, ‘Kelisona Deividi valadamo lohoi.’ Isito auna oleve kateai Deividi valada holisi.”⁴² Kosealemo Deividi biageu Samusi bukamo hisaliai avoe,

‘Dilavau di Kosive namihai avoe, Di ada inute keveatae ugulamo.

⁴³ Isege di a aiahavomale ata kebia malevei a veloe heimo otovege ana Kosiveabe holinela.’

⁴⁴ Iale subuta hoto kemo Deividu loui avoe, ‘Di Kosive.’ Au kateai loualemo Keliso kena oleve kateai Deividi valada holisi.”

⁴⁵ Ige ata bahataeau hotove evisige Iesuu au esemu namigevenu.⁴⁶ Isi avoe, “Diue menaka loui haivemale ata kebia aageveve. Keau isiviale ogoe dua egete hatuevei ata moagaeau umale keve olahai tige ataeau elegevei hoesegevegei. Isi isiviale talive dubue uvue vomue duamo uguivoge ataeau elegevegei. Isi isiviale iveve baluga vamale kemo ivite kebiahi igaetoagei.”⁴⁷ Isi abuna loboe vaveve vai gobuvu lobogevei oabemo kunaiabe malegei. Abuna katelahaito tiliege atae vudila guliguli egete vagei. Abu kateimale vamalemo Dilavana vatehani baluga ovei.”

Gobu mole obelini
(Maka 12.41-44)

21 ¹Iesuu kateai louito niavevevela kunai moagate kebia elegevesege abu moni malei lohohi dubue uvue obelini otovemalemo manevema. ²Ige au elehasege gobu mole kunaivesite keu lohohale benie kina abui mai manemenu. ³Ige au ke elehai loui avoe, “Di la namigevei. Gobu keu mai manemeale keu kunai moagate kebia moni evigevenu. ⁴Kosealemo kunai moagate keau abu moni baluga kemo monie esehame malei lohohi manevelu. Isito gobu keu moniu avuemo ualehameike au ke malei otovege avuemo moni behameu tota uoholinu.”

Vatau gabiaveve vaveve
(Matiu 24.1-21; Maka 13.1-19)

⁵Kateigeto Iesu esemu degomoleau Diue dubu baluga ke elehai namihai avoe, “Munee duata abu o ko houale ko eleha. Isi kunai duata malei kaeahavoale kebiata elegeve.” ⁶Ige Iesuu namigevei avoe, “Vani molena lohoge la dubu ko elehale ke ataeabuna lohohiege koilahage mune moleu bae mune mole golomo ulivebene.”

⁷Iesuu kateai louge abu namihai avoe, “No haivemale ata, vaveve kena osiomalela velemai. Isi vaveve oletena lohoge noeabuna ke elehai hilokage vaniu vuguvuguanu.”

⁸Ige Iesuu namigevei avoe, “La ebika nenigeveve. Onoilage ataeau la lobogevege dobuluvima. Kosealemo ata moagaabuna lohohiege di ivimo lobolahai loui kosea, ‘Dau Keliso.’ O mesoho loui kosea, ‘Vaniveu lohohi.’ Abu kateai louge lainaho bae kebia ehovelive. ⁹Ataeau mole havei tuvaiage lainaho hoto ke evisi vabulahalive. Kosealemo vaveve toela katealeabuna vasohuta lohohi. Igeto gabie vanie gabina bae lohohi. ¹⁰Di hoto mole louge evive. Vani keu lohoho vasege vata mole ataeabuna hovevevei vata mole atahi mole havei. ¹¹Isege vata bahatamo hamu balugana hatui. Ige vae balugana lohohi. Ige vavahanie toelana lohoge ataeabuna kemo haluvisi. Vaveve kateale abuna vatamo lohosege otogomo vaveve nimotele abuna lohohi. Ige ataeabuna ke elehai vabulahai.

¹²“Isito vaveve katealeu lohoholisege ataeabuna la malevei la aiogevei lahavei. Isi abuna la malevei tiliege Diue dubue laemo kotai la malevei dibulae otovei. Isi la di ata holialemo abuna la malevei gamanie kosive kebia vudimo otovege abuna la aiogevei. ¹³Abu kateisege di hotoe dua loui kebia haiveve. ¹⁴Isi lainaho kebia vudimo lavisi hoto louveve ke huhulahagelive. ¹⁵Kosealemo dana hoto laovei lulele keta laovege la aiogevemale keau bae la hotobe hamalivebene. ¹⁶Ige la haokuvu, la mamuvu, la neinuvu isi la abuhi ese igaeale keabuna laheho hailahage ataeabuna bae la malevei lahavei. ¹⁷La di ehovamalemo ataeabuna

laheho itumulahai huhuihuhuie toela vai. ¹⁸Abuna laemo kateale vaito la bae uoholilivebene. Isito Dilavana bae la kinae vomo la vava bahata ke malege lana kemo ue dua vageve. ¹⁹Lana vaveve kemo negolahaliege ukolikoli maleve.

²⁰“Lana vani mole elehasege tuvalie ataeabuna Dielusalema o ko evilikahavoi. Ige lana kemo bae hilokai loui kosea, ‘O ko aiahavoveveu vuguvuguanu. ²¹Iale vani kemo Diudia vatamo umale lana detuluvisi tanae teve. Ige Dielusalemae umale keabuna o ko halevai tai. Ige oleuoleu bulue umale keau bae hoidevei o kove loholivebene. ²²Vani kela Dilavana o ko vaveve toelae ibina vai. Au kateaniege Bukae Hotou louale ke mai selevetisi. ²³Iale vani kela keate ese tobute kebia nohovu. Isege keate degomole ese gite maleale kebiata nohovu. Kosealemo vata komo vatehani balugana lohoge Dilava itumu balugana ata kobiamo lohoi. Ige keate keabuna oleve kateai solekai detuluvisi. ²⁴Vatehani baluga keu koseanu. Tuvalie ataeabuna loholiege benisita ata degomole haveime degomole malevei hanavege abuna vata degomoleve tai ata kebiamo lovilahai. Isege Diue ata holioholiale keabuna loholiege Dielusalema mai avuemo ui. Iliege vani mole kebia vani kena uoholige Diue ataeabuna tota hoidevei o ko mai.”

Iesu lohoveve vaveve

(Matiu 24.29-35; Maka 13.24-31)

²⁵“Vani kela otogomo vaveve nimoletena lohoi. Vanimu, batamo isi didi kebiamo abuna katelahai. Isege heie vata kove davalana vuloi hahosihovoi vatae lohoge ataeabuna ke elehai vabulahai tetelahai. ²⁶Vaveve katealena vatamo lohoge otogomo uale keabuna kibikibiai solahai. Ige ataeabuna ke elehai vabulahai lokihovoi. ²⁷Vaveve kateimalela ataeabuna elehasege Atae Esena au vuvuneta au atagata goe golomo dobai lohoi. ²⁸Vaveve katealeau vasohuta velehovosege hovevevei lavisi ehue nilahave. Kosealemo Dilavau la maleveve vani keu vuguvuguanu.” ²⁹Iesuu hoto ke louge uoholige au hoto mole loui namigevei avoe, “Idie vaveve ke huhulahave. ³⁰Elehalive idie numuiaui humulahage huhulahai kosea, ‘Vaganau vuguvuguanu.’ ³¹Ke nahate elehage otogomo isi vatamo vaveve katealeau velehovoge huhulahai kosea, ‘Dilava matamae dogau lohoveveu vuguvuguanu.’ ³²Iale di hoto seleve louge evive. Ataeau aike uale koeabuna haluviholisege vaveve katealeabuna velehovoi. ³³Ige vatana otogoti uoholisi. Isito di hotou bae uoholilivebene.

³⁴“Iale la ebia nenigeveve. Lainaho vani bahata iveve huhu moagai e toelata i moagagelive. Isi lainaho vatae vaveve ke huhu moagagelive. Lana katelahage vani ke vavevena laemo lohoge lana vikolahave. ³⁵Vani kela vaveve kena kukoi nahate vai solekai tolemai vatae ata bahata

bamuevei. ³⁶Ialelua nilahai ui vani bahata guligulialive elike vaveve toela keu lohoge kemo negolahai Atae Esee vudimo lavie dua vave.”

³⁷⁻³⁸Iesuna vani bahata vavita Diue dubue balugae lohoniege ata haivegei. Imale ataeabuna vavita vavita igaetoai tiliege hotove eviegei. Iniege gutuige Iesuna tiniege tana mole Oliveta keve lahagei.

Diudasiu Iesuho haiale deiada

(Matiu 26.1-16; Maka 14.1-11; Dioni 11.45-53)

22 ¹Iesu kateilage Diue vahaeho vani mole Basova keu vuguvuguanu. Vani kemo abu bae beikini baudata valava mahoale ke ilivebene. Isito abuna vani kela mamoe havei isi Dilava hoesehavoge. ²Isege Diue dubu nalievemale kosive isi Diue menaka loui haivemale keau vabulahai isiviholilu atae vudimo Iesu hamaliho. Isime maveve humaha mole kaovama.

³Isege Seteneu Iesu esemu tuelo (12) ke mole Diudasi Kaliota uvumo deluanu. ⁴Iale keu tiale Iesuho haiai dubu nalimale kosive isi dubue udaha nalimale bukate kebia namigevei avoe, “Dana oleve kateai Iesu mai laovei.” ⁵Ige abu ke evisi vahaeholahi isiviale moni mai omisi. ⁶Kateige Diudasiu loui avoe, “Duave.” Isi tiale Iesu maveve humaha ke kaovama. Isito isiviholiale ataeau ke hilokaliho.

Iesuu au esemuhi Basova lovi ilu.

(Matiu 26.17-25; Maka 14.12-21; Dioni 13.21-30)

⁷Iniale Diue vahaehoe vani keu lohoge abu isiviai mamoe havei Basovae lovi isi. ⁸Iale vani kela Iesuu Bitata Dionita hanavei loui avoe, “Talive nahie Basova lovi ke gadehavove.” ⁹Ige abu namihai avoe, “A isiviale nona oleve keve talive lovi ke bevuai.” ¹⁰Ige au loui avoe, “Talive o kemo velehovoi elehage malaha moleu e bagumo e hai tige ke ehovai talive ovela velehovove.” ¹¹Isi o ke biage namihai kosea, ‘No haivemaleu aho loui avoe, O olete uvumo dana di esemuhi Basova lovi isi.’ ¹²Lana katelahai namihage auna la holoevei o ke ehue tiniege uvu mole baluga mai la haivei. Ige ke uvumo nahie lovi bevuai gadehavove.” ¹³Kateai louge abu halevai tiale au louale ke nahate elehalu. Isime keve Basova lovi iveve ke gadehavolu.

Aleto

(Matiu 26.26-30; Maka 14.22-26; 1 Koliniti 11.23-25)

¹⁴Lovi iveve vaniu gutuige Iesuu lohoale au abostolo tuelo (12) kebiahi lovi iliho ugulelevalu. ¹⁵Ige au abuhu loui avoe, “Dana bae vatehani malei. Iale di isivi balugale lahehi ugulamoi Basova lovi ko isi. ¹⁶Isito di la namigevei. Di bae tota lovi ko ilivebene. Isito Dilava matamae dogau lohoge vani kemo Basova lovi kona bae ihuve seleve holige dana bae

isi.” ¹⁷Hoto ke louito kabu mai hoesehavoi mai au esemu ovei loui avoe, “Ko igaegae mole ovei ive. ¹⁸Di la namigevei. Di bae tota uaini koseale ilivebene. Ilage Dilava matamae doge keve dana bae tota isi.” ¹⁹Kateai louito valava mai hoesehavoi vakoai malei ovei loui avoe, “Di misilike ko di laoveni. Iale ko isi di huhulahave.” ²⁰Ige abu lovi ige uoholige au kabu mai ovei loui avoe, “E kou di tahoike ko. Iale di tahona lotige Dilavana di taho kemo laheho menakae doge vai.

²¹“Isito di hoto mole louge evive. Nahi kove uguiavoi lovi ima. Isito la mole igaena bae di mai atae toela ovei. ²²Ige dana kemo hatai. Kateale keu Dilava isivilike. Isito malaha keu dahoe haiale ke nohoma.” ²³Kateai louge abu hoveveve abu molete namigevei avoe, “Nahiemo ole igaena vaveve ke vai.”

Oleu baluga.

²⁴Abu katelahaito baita moleho loulage moleu loui avoe, “Dau laemo baluga.” Ige moleu avoe, “Ba, dau baluga.” ²⁵Katelahage Iesuu namigevei avoe, “Vatae kosiveau abu vuvunemo abu ata nibivei isivialeike esemuiabeau iviabe tabagevei loui kosea, ‘Laeau no kosive balugaea.’ ²⁶Isito lainaho vaveve ke nahate vagelive. Di isiviale la vaveve koseale vage keu duave. Lana isiviai kosive holiho valiege vasohuta la ebia halevai mole tedaevive hoesegeveve. ²⁷Vatae kosive abuna uguiavo unahai louge esemuiabe abuna lovi malei ovegei. Katealemo lana hilokage oleteu baluga. Oleteu eseve. Isito dau kateholinu. Dau la baluga. Isito di la hoesegevei la tedaevema.

²⁸“Isito vani bahata vaveve toelau daemo lohosege laeau daluvuta ua. ²⁹Iale di Mamau ataeau adave uvumo uveve vuvune mai daoale ke nahate dana vuvune mai laovei. ³⁰Ige lata vani kemo daluvuta igaetoai lovi isi telonamo uguiavoi vuvune kemo Iselala valada tuelo (12) kebia nibivei vaveveabe kaoveve.”

Iesuu Bitau vovohoveve hoto lounu.

(Matiu 26.31-35; Maka 14.27-31; Dioni 13.36-38)

³¹Iesuu hoto ke louge uoholige au Saimoni Bitu namihai loui avoe, “Saimoni, di hoto mole louge evi. Seteneu Dilava namihai isiviale a vaveve bahata kaovai. Keate moleu laisu sesiale ke nahate auna a vaveve bahata kaovai. ³²Isito di aho guliguliai isivialeike a evievi keu bae doba selevealivebene. Iniege vani mole a vaveve toela kemo hoilahaniege talive a haokuvue evievi negotievenela.” ³³Ige Bitau namihai avoe, “Kosive, abuna a mai dibulage dana aiti keve tai. Abu ahavoge dana aiti hatai.” ³⁴Ige Iesuu namihai avoe, “Bitu, di louge evi. Novae vavimo kokoluguu hotoholisege ana hoto koseale lou abuita igaetai kosea, ‘Di ke hilokaholinu.’ ”

³⁵Iesuu tota au esemu bahataho loui avoe, “Di vani mole la hanaveale kemo laeau moni, mogamoga, tamaka maleholilu. Kemo la elemua. Emena la vugeholilu.” Ige abu loui avoe, “Elemua.” ³⁶Ige Iesu tota loui avoe, “Isito aike la monita la mogamogata maleve. Isi mesoho la oleu siga maholialeu au dabae ogo mai voiai moni ke mai siga voiai. ³⁷Iale di la namigevei. Bukae Hoto molena daemo lohoi. Hoto keu loui avoe, ‘Ataeau huhuige keu atae toela mole.’ Iale abu subuta hisaliale kena nova daemo lohoi.” ³⁸Ige abu Iesuu namihai avoe, “Kosive, siga abuitaiko ko.” Ige au loui avoe, “Elemua.”

Iesuu guliguliasage abu ladevelu.

(Matiu 26.36-46; Maka 14.32-42)

³⁹Iesuna vani bahata Oliveta tanae tiniege keve lahagei. Iale au ke louito Dielusalema halei Olivetae tinu. Ige esemuiabeau ehovale. ⁴⁰Iale abu keve velehovoge Iesuu namigevei avoe, “Guligulilahalive elike vaveve toelau laemo lohoge la bae kemo dobuluvilivebene.” ⁴¹Kateai namigeveito halevei ahuvale tiale iekela kome bokoai guligulianu. ⁴²Isi loui avoe, “Mamai, a isivianiege vatetumu daemo lohoveve ke mai evihanela. Isito a isivi unaha. Ana isiviage dana vatetumu ke malei. Isito a isiviholige di bae ke malelivebene.” ⁴³Hoto kateale louge anelu moleu otogomo dobai lohoale mai negotinu. ⁴⁴Ige au tota negobedai guliguliasage uvuve keu isu baluganu. Ige vahotoveu taho nahate bidoai vatamo lotinu.

⁴⁵Au kateinata hovelahai hoilahai tiale au esemu elegevege abu uvulahalata ladevelu. ⁴⁶Ige au namigevei avoe, “La osiohoike ladevema. Hovedevei guligulilahalive elike vaveve toelau lohoge kemo dobuluvi halevave.”

Abu Iesu malu.

(Matiu 26.47-56; Maka 14.43-50; Dioni 18.3-11)

⁴⁷Iesuu kateai namigevesege ata moagaeau loholu. Ige Iesu esemu mole Diudasi keu kebiaho uli holisi lohoale Iesu evudei ulikukuhavonu. ⁴⁸Ulikukuhavoge Iesuu namihai avoe, “Diudasi, ana isiviai di ulikukuhavoale kemo di mai atae toela ovei.” ⁴⁹Ige Iesu esemui au vavavemo laviale keau belahai avoe, “Kosive, noeabuna vali siga malei kebia havei.” ⁵⁰Isi kateisege moleu siga mai dubue kosive baluga ke esemue golema inute heisi etulenu. ⁵¹Ige Iesuu loui avoe, “Halevave.” Isi esemu ke golema levege maholilinu.

⁵²Ige dubu nalimale kosivea, oe kosivea isi dubue udaha nalievemale bukateau Iesu maliho lohoale avuluvuta ua. Ige Iesuu namigevei avoe, “Lana huhuige dau vavoloamale ata. Ilike vage la benisita visuta malei dahavoho loholu. Emena la osioho. ⁵³Dau vani bahata la dubu balugae timale uma. Isege la di elehaito di maholilu. Isito laeau vavie esea. Nova kou la vanilike. Iale la vavi komo lohoale isiviai di male keta duave.”

Bitau Iesu vovohonu.*(Matiu 26.57-58, 69-75; Maka 14.53-54, 66-72; Dioni 18.12-18, 25-27)*

⁵⁴Iesuu hoto ke louge uoholige abu evudei melavei dubu nalimale kosive baluga ke oe loholu. Isege Bitau ialialihavoi ehomai lohoma. ⁵⁵Ige abu ologomo vene beisi venehemo uguiaavosege Bitau lohoale abuhi ugulamonu. ⁵⁶Isege veneu vedodoai nivemo atagage ma moleu nive elehai loui avoe, “Malaha kota avuti umaleike ko.” ⁵⁷Kateai louge Bitau namihai avoe, “Ba, dau ke hilokaholinu.” ⁵⁸Iniale malaha moleu Bitu elehai namihai avoe, “A keu Iesu esemu mole ailike.” Ige Bitau namihai avoe, “Ba, dau ke holioholinu.” ⁵⁹Iliale abu ukaukaito tota malaha moleu negobedai loui avoe, “Seleveta kou Galilie ata nahate. Iale no kemo hilokage kou Iesuti ohanoimale ataike.” ⁶⁰Ige Bitau namihai avoe, “Halenela. Di a hoto louale ke hilokaholinu.” Kateai lousege solekavesite kokoluguu hotoanu. ⁶¹Ige Iesuu hoilalahi Bitu niavoge Bitau Iesuu subuta louale ke huhuanu. Au loui avoe, “Bitu, di louge evi. Novae vavimo kokoluguu hotoholisege ana hoto koseale lou abuita igaetaeai kosea, ‘Di ke hilokaholinu.’” ⁶²Ige Bitau ke huhuai uvu balugai halei tiale iekela nina baluganu.

Abu Iesu hehavoi visuhavolu.*(Matiu 26.67-68; Maka 14.65)*

⁶³⁻⁶⁴Ige ata degomole Iesu nalimale keau Iesu hehavoi ogo mai nive viliasege ata moleu hamai namihai avoe, “Au beloveta ata. Iale no namigevenela. Oleike ahamonu.” ⁶⁵Kateaito hotoe toela moaga loui aiahavolu.

Iesuu Diue kosive vudimo laminu.*(Matiu 26.59-66; Maka 14.55-64; Dioni 18.19-24)*

⁶⁶Vau alamoge Diue kosive moagaeau hotohotoho loholu. Oe kosivea, dubu nalimale kosivea, Diue menaka loui haivemale keau mole bevuevei igaetoai Iesu melavei kotaho loholu. ⁶⁷Isi belahai avoe, “No namigevenela. Ana huhuige Dilavau a hanavoge a Keliso holinu.” Ige Iesu namigevei avoe, “Dana la namigevei loui kosea, ‘Ito. Ige la bae di hoto evilivebene.’” ⁶⁸Iale mesoho dana hoto mole loui la namigevege la bae ibinave loulivebene. ⁶⁹Isito di hoto mole louge evive. Atae Eseu Dilava vuvune mai adave inuteve ugulamoi uveve vaniu vuguvuguanu.” ⁷⁰Kateai louge abu bahata namihai avoe, “Tale Dilava mo anike.” Ige au loui avoe, “La louale keu seleveike.” ⁷¹Ige abu moleho loui avoe, “Nahi bae ata degomolemo ko vaveve kaovalivebene. Nahi hotove evige uoholinu.”

Iesuu Bailoti vudimo laminu.*(Matiu 27.1-2, 11-14; Maka 15.1-5; Dioni 18.28-38)*

23 ¹Abu bahata hoveveime Iesu mai Loma gamani kosive Bailotie tilu. ²Keve tiale kosive ke namihai avoe, “No malaha ko vaveve

kaovalata elehaike vaima mai loholu. Kou no ata aiogevei abuhou loui avoe, 'Lainaho takesi moni malei Loma gamani kosive Sisa omilive.' Isi loui avoe, 'Dau la kosive baluga Keliso.' " ³ Kateai louge Bailotiu Iesu namihai avoe, "Diue kosive anike ko." Ige Iesuu loui avoe, "Ito, avuiki a ke lounu." ⁴ Kateai louge Bailotiu dubu nalievemale kosive isi ata kebia namigevei avoe, "Di komo vaveveve toela kaovage uoholinu. Iale dana oleve kateai hamai." ⁵ Ige abu negobedai Bailoti namihai avoe, "Keu vasohuta Galili vatae tiale haive toela vai no ata aiogevenu. Iale aike Diudia vata komo ke nahate vama."

Iesuu Elodi vudimo laminu.

⁶ Ige Bailotiu hotoeabe ke evisi namigevei avoe, "Galili ataniko." ⁷ Ige abu loui avoe, "Ito." Ige Bailotiu namigevei avoe, "Kosive mole Elodi keu Galili vatae kosive. Keu aike lohoale Dielusalemae ua. Iale ko mai avue teve." ⁸ Ige abu mai Elodie tige au Iesu elehai vahaehoanu. Kosealemo ataeau Iesu vaveve vamale ke louge Elodiu vani moaga ke evisi isiviale Iesu elehai. Keu isiviale Iesuu vaveve nimolete vage au elehai. ⁹ Katealemo au Iesu belahai avuemo vaveveve kaovalage Iesuu hotobehame loui namihaholinu. ¹⁰ Ige dubu nalimale kosivea isi Diue menaka loui haivemale keau hovevevei Iesu vavamo lobolohai isuta Elodi namihai avoe, "Keu vaveve toela moaga vamale ataike." ¹¹ Ige Elodiu au tuvalie esemuhi Iesu hehavo ai ohavolu. Isime lobolohai kosiveu ogoe dua vamale ke nahate mai avuemo hatulu. Hatuge uoholige abu melavei tota hoidevei Bailotie tilu. ¹² Katealemoike Elodiu Bailotiti haokanu. Subuta abu moleho isiviholilu. Isito vani kemo abu avui molehi haokuvualu.

Abu Iesu hamaveve hoto loulu.

(Matiu 27.15-26; Maka 15.6-15; Dioni 18.39-19.16)

¹³ Abu Iesu melavei Bailotie tige Bailotiu hoage dubu nalimale kosiveau, oe kosiveau isi oe ataeau loholu. ¹⁴ Ige au namigevei avoe, "Laeau malaha ko mai dae lohoale di namihai kosea, 'Malaha kou no ata aiogevema.' Ige di la hoto ke avuemo kaovaito toelabe elehaholinu. ¹⁵ Ige Elodi keta toelavebe elehaholisi tota hanavoge lohonu. Iale malaha kou vavevebe toela vaholiale kemo di hamaveve humahau uoholinu. ¹⁶ Iale di esemu abuna visuhavoito iovage auna tai." ¹⁷ Iomaveve hotou koseanu. Vagana bahata Basova vani kena lohoge ataeabuna louge Bailotina dibulae ata igae iomage auna tigei. ¹⁸ Bailotiu hoto ke louge ata bahata keau baita namihai avoe, "Hamage au hatai. Isito no isiviale Balabasi ke iomage au tai." ¹⁹ Balabasi keu ata havemale ataike. Subuta o kemo keu atae toela holoevei isiviale gamani ai ohavoi. Ige abu mai dibulae mavoge ua. ²⁰ Isito Bailotiu isiviale Iesu iomage au tai. Iale tota hoai ata namigevei avoe, "Dana ko hanavoge auna tai." ²¹ Kateai abuhou louge abuta avuhou

loui avoe, “Mai idimo hama.” Isi tota loui avoe, “Mai idimo hama.” ²² Ige au tota namigevei loui avoe, “Osialemo. Vaveve toela onoleu avuemo ua. Di vaveveve kaovanata kemo toelabe elehaholinu. Katealemo dana oleve kateai hamai. Iale di esemu abuna visuhavoime iovage auna tai.” ²³ Kateai lousege abu negobedai baita namihai avoe, “Mai idimo hama.” Ige dubu nalimale keau abuta katelahai negobedai hotove hamalu. ²⁴ Ige au namigevei avoe, “Duave, dana la isivi unaha vai.” ²⁵ Kateai louito malaha nehe ata havei gamani aiohavomale ke iomanu. Isi abu abu isivi Iesuemo valiho mai ovenu.

Iesuu idi ebamonu.

(Matiu 27.32-44; Maka 15.21-32; Dioni 19.17-27)

²⁶ Ige abu mai tialeu Sailini malaha mole ivi Saimoni keluvuta belehovolu. Keu bulue tialeu hoilahai oe lohoma. Iale abu adave butuhai namihai avoe, “Idi ko ebamo.” Ige au idi ke ebamoi Iesu ehomai iavela tinu. ²⁷ Isege ata moagaeau ehovai timale kebia vigomo keate degomoleau avuho uvulahai ninalahama. ²⁸ Kateisege Iesuu abue vudihei namigevei avoe, “Dielusalema keatea, lainaho daho ninalahalive. Isito la ebikaho uvulahai la esetaho uvulahai ninalahave. ²⁹ Kosealemo vanie toelau lohoma. Iale vani kemo ataeabuna bae loui kosea, ‘Keate oleuoleu ese tobute maleholiale keau duave. Isi ese gite houeveholiale keau duave.’ ³⁰ Vani kateimalela ataeabuna loui kosea, ‘Tana baluga isi eseve dobai no bamuevege no haluvisi.’ ³¹ Dau idi isahete ke nahate. Isege laeau idi gilite ke nahate. Iale abu vaveve toela koseale daemo valiege vaveve toela baluga seleve abuna laemo vai.”

³²⁻³³ Kateai louge tuvalie ataeau Iesu melavei dibulae ata abuita kebiata holoevei tiale ata havemale matamae velehovolu. Matama ke ivilike Lolokue matama. Matama keve abu Iesu mai idie domo hamai dibulae ata kebiata havelu. Moleu adave inuteveatae. Isege moleu agiteveatae. ³⁴ Ige Iesu noinoiai avoe, “Mamai, vaveveabe toela uliha. Abu vaveve ko vamale ko abu hilokaholilu.” Kateai lousege tuvalie ataeau Iesu ogo maliho kasilahai ogove igaegaeai malelu. ³⁵ Ige ataeau elehasege Diue kosive keau Iesu hehavo moleho loui avoe, “Keu ata degomole tedaevenu. Isito Dilavau ke ebagemage keu Keliso holivatebene au ebika tedahoi dobai lohonu.” ³⁶ Kateai lousege tuvalie ata kebiata hehavo tiale e toela mai omilu. ³⁷ Isi loui avoe, “A Diue atae kosive holiniege a ebika tedahoi dobai lohonela.” ³⁸ Kateai kinave tatamo hoto mole hisaliai avoe, “Kou Diue kosive balugaike ko.” ³⁹ Ige abu dibulae ata mai hamale ke moleu hotoe toela loui Iesu belahai avoe, “Seleveta Keliso aniko. A Keliso holiniege a ebika tedahoi nota tedaevenela.” ⁴⁰ Kateai louge moleu avuho loui avoe, “Hoto kateale louhalenela. Ana Dilava vabuhavoholinu. Nahiabuna avuluvuta haluvisi. ⁴¹ Nahiau vaveve toela vamale ataea. Iale

ibinavehoike nahi vatehani ko malelu. Isito malaha keu vaveve toela vaholisito vatehani malenu.” ⁴² Kateai au haokaho louito Iesu namihai avoe, “Iesu, a Kosive baluga holisi a matamae dogo kemo lohoniege di huhuanela.” ⁴³ Ige Iesuu avuho loui avoe, “Di ahoe louge evinela. Ana nova daiti ukolikolie matama keve unela.”

Iesuu hatinu.

(*Matiu 27.45-56; Maka 15.33-41; Dioni 19.28-30*)

⁴⁴ Iniale vanie lilimo vata bahatamo vau loai gidualeu tili (3) okoloki masege vaniu tota halunu. ⁴⁵ Isege dubu baluga uvue abu ogo mai uvu mole tumute ke bamuale keu ehula dikolahai heila velemai abuita holinu. ⁴⁶ Isege Iesuu baita loui avoe, “Mamai, di aike hatima. Di isiviale daemo di munana manela.” Kateai louito hatinu. ⁴⁷ Ige tuvalie kosive keu vaveve ke elehai Dilava hoesehavoi loui avoe, “Seleveta ata keu atae dua.” ⁴⁸ Isege ataeau keve igaetoai vaveve ke elehalage uoholige abu halevai uvu balugata hoidevei abu oe tilu. ⁴⁹ Oe tisege Iesu haokuvu isi Galili keate degomole keau Iesu ehovamaleau bahata haeavamole lavisi vaveve ke elehalu.

Iesu mai abavulu.

(*Matiu 27.57-61; Maka 15.42-47; Dioni 19.38-42*)

⁵⁰⁻⁵¹ Alimatia malaha mole ivi Dioseba keu atae dua isi ata uvevete. Iale keu Dilavau Iesu hanavoale ke evisi huhuai avoe, “Kona no kosive baluga holige noeabuna vuvunevemo ui.” Isi kateai ke nihomai uma. Keu Diue kanisoloe kosive. Iale kanisolo keau Iesuemo vaveve kateale vage keu keho isiviholinu. ⁵² Iale keu Iesu vava mai abavuhu tiale gamani kosive Bailoti belahanu. Isi loui avoe, “Dana vali Iesu vava mai talive abavui.” ⁵³ Ige Bailotiu louge au tialeu Iesu vava mai ogoe duata viliai mune vahamo abu subuta kemo atabe mai gulioholiale kemo mai gulianu. ⁵⁴ Kateisege bulau lohohi vage vau loai lohoma.

⁵⁵ Isege Galili keate nehe keau Diosebaluvuta tiale au Iesu vava mamoi abavuale ke elehalu. ⁵⁶ Isime halevai oe tialeau mulamulae dua malei Iesu vava hoesehavoliho bevualu. Isege bulau lohoge abu halevai menaka ehovai bulamo ua.

Iesuu gulimo hovelahanu.

(*Matiu 28.1-10; Maka 16.1-8; Dioni 20.1-10*)

24 ¹ Iliale Sande vavita vae hodohodota keate keau mulamula nehe bevuale ke malei Iesu vutae tilu. ² Tiale keve velehovoge mune balugau Iesu vuta bamuale keu vovolovai badive ua. ³ Ige abu mune ke vahae tialeau isiviai Iesu vava elehai. Isito abu tiale elehaholilu. ⁴ Isi keve lavisi ke huhulahai dolodololahasege malaha mole abuita ogo

levolevote vale keau solekavesite abue loholu. ⁵Ige keate keau vabulahai kome bokoai vata bisi holuiavolu. Ige malaha keau namigevei avoe, “Kou alue vutae matama. Iale la osiohoike kove atau nita uale ke kaovama. ⁶Keu komo uoholinu. Dilavau etuvage keu hovelahanu. Au Galilie ui laheho louale ke lana huhulahalu. ⁷Au loui avoe, ‘Ata molena Atae Eseho haiai mai atae toela ovege abuna mai idie domo hamai. Iniege vanie ni abuitta igaetaeabuna uoholige auna tota hovelahai.’ ” ⁸Kateai louge keate keau Iesu hoto ke huhulahalu. ⁹Isi vutave halevai hoidevei tiale vaveve ke loui Iesu abostolo leveni (11) kebia haivei esemu bahata kebiata haivelu. ¹⁰Keate kebia iviabeike koea. Meli Magidaleni, Dioana, Diemisi neina Meli isi keate degomole. ¹¹Ige Iesu esemu keau hoto ke evisi loui avoe, “Lana tilogoike vaima lobe hoto ke louma.” Isi kateai hotoeabe evioholilu. ¹²Isito Bitau ke evisi hovelahai bibuai tiale vutavela velemanu. Isi holumai ke vahae niai elehage abu viliale ogo ke unahau ua. Ige au hoilahai au oe tiale vaveve ke huhuai avoe, “Vaveve kou oleve kateanu.”

Esemu abuiou Emeasie tima.

(Maka 16.12-13)

¹³Vani ke igaemo Iesu esemu abuitta keau olahai o mole ivi Emeasi keve tilu. Dielusalemale halei o keho tiale egeveu haeava sisina ada mole isi abui. ¹⁴Abu avui taime humaha tavae abu Iesuemo vaveve vamale ke moleho loui tima. ¹⁵Katelahai ke lousege Iesuu iaeabe tialeu abuemo tinu. ¹⁶Ige abu elehaito ke hilokaholilu. ¹⁷Ige Iesuu namigevei avoe, “La avui ono vadeike moleho loui lohoma.” Kateai louge abu avui lavisi uvulahalu. ¹⁸Ige malaha mole ivi Keliobasi keu namihai avoe, “Ata bahata Dielusalemale umale keau vaveve moleu aike Dielusalemale velemaale ke hilokalu. Isito a igaenike ke hilokaholinu.” ¹⁹Ige au belagevei avoe, “Vaveve onoleike.” Ige abu loui avoe, “Vaveve kosealeike abu valu. Nasaleta malaha mole Iesu keu belovetae ata. Iale Dilavau vuvune omige au vaveve nimote vai hoto vuvunete louge ata bahataeau ke elehai vahaeholahai hoesehavolu. ²⁰Isito no dubu nalimale kosive isi oe kosive keau ke mai gamani ata ovege abu loui avoe, ‘Auna hatai.’ Isime mai idie domo hamalu. ²¹No subuta huhulahai kosea, ‘Kena bae kosive holisi Iselala ata tadeavei.’ Isito keu hatiale aike vanie ni abuitta igaeta uoholinu. ²²Ige nova vavita no keate degomoleau hoto mole louge no ke evisi vikolahalu. Abu vae hodohodota tialeau vutave velehovolu. ²³Keve velehovoi Iesu vava kaovage uoholinu. Isime hoidevei lohoale no namigevei avoe, ‘No anelu abuitta elegevege keau no namigevei avoe, Keu hovelahanu.’ ²⁴Isege no ata degomoleau vutave tiale elehage uoholige abu loui avoe, ‘Keate keau hoto seleveike abu loulu.’ ”

²⁵Abu deiada ke louge uoholige Iesuu namigevei avoe, “La keau vaveve kemo luleleholilu. Isi belovetaeau louale hoto ke la solekai evisi maholilu.

²⁶Belovetau louale ke nahate Kelisona vatehani malei hatai hovelahai tota au otogoe ataga nehe ke mai. Lana ke hilokalu.” ²⁷Kateai louito subuta Moseseu hotove hisaliale isi beloveta bahataeau hisaliale ke loui kebia haivenu.

²⁸Au kateai haivelage abu tiale o nehe abu avue tiveve ke vavae loholu. Isege Iesuu isiviale eve tai. ²⁹Isito abu negobedai kelulahai namihai avoe, “Vau loalelua nohehi unela.” Ige au tiale abuhi ua. ³⁰Iniale abuhi lovi iliho uguiavosege au valava mai hoesehavoito vakoai malei ovenu. ³¹Kateai lovi ovesege niabeu alamo seleveage abu bae lulelelahai Iesu hilokalu. Isege au solekavesite uoholinu. ³²Ige abu mole namigevei avoe, “Keu humaha tavae nahehi hotohotoai Bukae Hoto loui nahi haiveale hotove keu venee nahate vanu.”

³³⁻³⁴Abu kateai louito solekai hovedevei Dielusalemae hoidevelu. Keve velehovosege Iesu esemu leveni (11) isi esemuve degomole keau igaetoai uliale kebia namigevei avoe, “Seleveta Iesuu hovelahai Saimoni Bitae lohoge au elehanu.” ³⁵Ige malaha abuita keau abuta namigevei avoe, “Nota humaha tavae katelahalu. Isito no Kosive ke hilokaholilu. Ige au valava vakoai noevesege no bae hilokalu.”

Iesuu au esemuemo velemanu.

(Matiu 28.16-20; Maka 16.14-18; Dioni 20.19-23; Abostolo 1.6-8)

³⁶Ata abui keau kateai namigevesege Iesuu solekavesite vigoeabemo lamisi ua. Isi namigevei avoe, “Lana ue dua vama.” ³⁷Ige abu ke elehai huhulahai avoe, “Mesoho aluike no ko elehalu.” Isime vabue toela valu. ³⁸Katelahage au namigevei avoe, “Osiohoike la uvuu kibikibianu. Oleve katealemoike la uvuu dolodoloanu. ³⁹Isito di adau di veloti samagulahale ko elegeveve. Dailike ko. Dau alu holioholinu. Alu keau misioholisi itavaholilu. Isito dau kateholinu. Iale daela holisi hilokave.” ⁴⁰Kateai namigeveito au ada isi au velo malei haivenu. ⁴¹Ige abu ke elehai vahaeholahaito ke huhulahai dolodololahalu. Isege au belagevei avoe, “La ivevebena ua.” ⁴²Kateai louge abu huena mole mahoale ivi mai omilu. ⁴³Ige au ke mai vudiabemo inu.

⁴⁴Isi namigevei avoe, “Di subuta lahehi ui hoto koseale loui la namigevenu. ‘Di vaveve bahata Moseseu subuta hisaliale, belovetaeau hisaliale isi Samusimo hisaliale keabuna bahata seleve holisi.’ ” ⁴⁵Kateai louito uvuiabe alavoge abu bae Bukae Hoto kemo lulelelahalu. ⁴⁶Ige au haivei avoe, “Bukae Hotou louale Kelisona vatehani malei hatiniege vanie ni abuita igaetaeau uoholisege auna tota hovelahai. ⁴⁷Auna hovelahage ataveabuna ivivemo ata haivei namigevege abuna vaveve toela halevage Dilavana ulihai. Ige abuna vasohuta Dielusalem kove ata haiveito gabie bae vata bahatae tai ata haivei. ⁴⁸Bukae Hotou louale keu seleve holige la vaveve ke bahata elehai hilokalu. ⁴⁹Isito kove usege di Mamau louale ke di di Munana Tumute hanavoge au la malevei negotievei.”

Iesuu otogoe veatinu.
(Maka 16.19-20; Abostolo 1.9-11)

⁵⁰Iesuu hoto ke louge uoholige au au esemu holoevei Dielusalemae halei Beteni oe tinu. Keve tiale au ada ebagemai kebia hoesegevenu. ⁵¹Hoesegeveito halevei otogoe veatisi tinu. ⁵²Veatisi tisege abu hoesehavoito halevai vahaehota hoidevei Dielusalemae loholu. ⁵³Iliale vani bahata Diue dubu baluga keve Dilava hoesehavoma.